

ሉቃስ ፃፊዳ ሚሺራቸው ቃላ ጌሉዋ

ሉቃስ ፃፊዳ ሚሺራቸው፡ ዩሱሳ ኮይሮ ያናዋ ያጌቲ ናባቱዋን አባይ ኦዴቲዳዋ፡ ዳሮ ዋዲያፕ ናጌቲዳ ሂደታው ሁጹ ጊዳዳዋ፡ ኢስራዔሊያ አሳይ ናጊዳ ዳዒያ ያሳኒ ኦኩቴዳዋ፡ አሳ ዘሬላ ኡባ አሺያዋ ጊዲያዋ ቆንጨሴ። ዩሱሲ ያሳ አወዋፕ ሂደሳቶ ሚሺራቸው ቃላ ኦዳናው ኪቴቲዳዋ ጊዲያዋኔ ሃ ሚሺራቸው ቃላይ አሳሲ ዳዒያ ዳማ ዳማ ሜቱዋ ቃሪያ ዋልቃ ኦይቄዳዋ ጊዲያዋ ሉቃስ ኦዴ። ሉቃሳ ሚሺራቸው ቃላ ጊደን፡ ዩሱሳ ዩሳባ ኦዲያ ኮይሮ ሽምፓቱዋኒኔ ቃሲካ ዩሱሲ ሳሉዋ ፑዴ ኬሴዳዋ ኦዲያ ወርሴላ ሽምፓቱዋን ሎይሊዴ፡ ኦዴቲዳዋ ናሽቻባ። ዩሱሲ ሳሉዋ ኬሴዳዋፕ ጉዩያን አማኑዋባይ ዋኒ ዲጩዳዳንቶኔ ዋኒ አኩዳንቶ ኦዲያ ታሪኪያ ሃ ማፃፋ ፃፊዳ ቢታኒ ዩሱሲ ኪቴዳዋንቱ ኦሱዋ ማፃፋን ኦዴዳ።

ኪታንቻቱዋ ዩሳባይ፡ ዩሱሲ ዩሌቲዳ ዋዴ ወዲያ ሄሚያዋንቱ ቢዴ ቤዔዳዋ ኦዲያ ታሪኪ፡ ዩሱሲ ናዓቲላን ዳዒዴ ጌሻ ጎሊያ ቤዳባይ፡ ቃሪታንቻ ሳሚራዊያኔ ባዩዴ ቤቲዳ ናዓ ታሪኪ ሉቃሳ ሚሺራቸው ፃላላን ቤቲያዋንታ። ሃ ሚሺራቸው ቃላ ጊደን ሃ ጋፃፕ ሂኒ ጋፃ ጋካናው ሁጹ ጊዲዴ ያሌቲዳባይ ዋሳባ፡ ጌሻ አያናባ፡ ዩሱሳ ኦሱዋ ጊደን ማጫ አሳው ዳዒያ ሳባኔ ያሳይ ናጋራ አቶ ያጊያባ።

ሽምፓቱዋ ኡባቱዋሲ አሜቲዳ ቃንሳ ቆፋቱዋ

- ጌሉዋ (1:1-4)
- ፃማቂያ ዮሃንሳኔ ዩሱሳ ዩሌታ (1:5-2:52)
- ፃማቂያ ዮሃንሳ ኦሱዋ (3:1-20)
- ዩሱሳ ዪንቃታኔ ፓጪያ (3:21-4:13)
- ዩሱሲ ኦሱዋ ጋሊላን ደሞዋ (4:14-9:50)
- ዩሱሲ ጋሊላፕ ዩሩሳላሜ ቦዋ (9:51-19:27)
- ዩሩሳላሜኒኔ ኢዚ ዩሹዋን ዩሱሳ ወርሴላ ሳሚንታ (19:28-23:56)
- ጎዳ ዩሱሳ ዳንዲዋ፡ ቆንጨዳኔ ሳሉዋ ቡሳ (24:1-53)

1-4 ቦንቸቲዳ ቶሬሎሳ፣ ኮይሮ ባሬንቱ ኣይፊያን ቤዔዳዋንቲኔ ባሬንቱ ቃላን ማርካቲዳዋንቲ ኑሲ ኦዴዲኖ። ፃፊቲዳ ዩወዋ ታ ባገን ኡባ ፃጹዋፔ ቢዳ ፃሎዋፔ ጉዬ፣ ታሪኪያ ማራ ናጌዳ ኦጊያን ኔው ፃፋናው ሎዓ ጊዴዳዌ ታው ቤቲዳ።

ፃማቂያ ዮሃንሳ ዩሌታይ ኮይሮ ኦዴቲዳ

5 ዪሁዳ ጋዲያ ካቲያ ሄሮዲሳ ዋዲያን፣ * ኣቢያ ቄሳቲላ ኦሱዋ ባገፔ ጊዴዳ ዛካራሳ ጌቲቲያ ኢቲ ቄሳይ ዴዔ። ማቻታካ ኤልሳቤያ ጌቲቲያ ኣሮኔ ያራፔ ዩሌቲዳዉኖ። 6 ላዓቲካ ጎዳ ኣዛዙዋኔ ሴራ ዲሪሲዴ ናጊያዋንታኔ ካቄ ባንታን ያሳ ሲንላን ዴዒያ ፃላቲዋ። 7 ጊዶፔ ኣቲን ኤልሳቤያ ማንላ ጊዶ ዲራው፣ ዩሉ ኡንቲንቶ ባዋ። ላዓቲካ ላይላ ሱጌዳዋንታ።

8 ኢቲ ጋላሲ ዛካራሲ ባሬ ባገ ካላን ያሳ ሲንላን ቄሳቲላን ኦሲያ ዋዴ። 9 ባሬ ቄሳቲላ ዋጋ ደያዲን ጌሻ ጎሊያ ጌሊዴ ኢፃና ጨዊሱዋ † ሳማይ ኣ ጋኬዳ። 10 ኢፃናይ ጨዊያ ዋዴ ኣሳይ ኡባይ ካሬን ኤቂዴ ዋሲ ዴዔ።

11 ጎዳ ኪታንቻይ ኢፃና ያርሹዋሳፔ ኡሼቻና ኤቂዴ ኣው ቤቲዳ። 12 ዛካራሲካ ቤዔዳ ዋዴ ዳጋሚዴ ያሻን ሚቲቲዳ። 13 ኪታንቻይካ ቃሲ ያጌዳ፣ «ዛካራሳ፣ ያዮፓ፤ ኔ ዋሳይ ሲሴቲዳ፣ ኔ ማቻታ ኤልሳቤያ ኣቲማ ናዓ ዩላናውኡ። 14 ኣ ዩሌታን ናሽታይኔ ኢሻሉ ኔው ሃናናዋ፤ ጮራቲካ ኢ ዩሌቶ ዲራው ሃሹ ጋናዋንታ፤ 15 ኢካ ጎዳ ሲንላን ዳራ ጊዳናዋ። ማሉዩያ ዋዩኒያ ኡሻ ጊዶ ሃራ ማሉዩያ ኡሻ ኣይኔ ኡሹና፤ ባሬ ዳይ ኡሉዋን ዴዒሺን ኣያና ጌሻይ ኣኒ ኩማናዋ።

16 «ኢሲራዔሊያ ኣሳቲዋፔካ ጮራቲዋ ኡንቲንቲ ጎዳ ያሳኩ፣ ኢ ዛራናዋ። 17 ኢካ ጊጌና ኣሳ ጎዳው ጊጊሳናው፣ ኣዋቲዋ ዋዛና ናናቲዋኩ፣ ኣዛዜቲናዋንታካ ፃሎቲላ ኤራኮ ዛራናው፣ ኤላሳ ‡ ኣያናኒኔ ዋልቃን ጎዳፔ ሲንላና ቤ።»

18 ዛካራሲካ ኪታንቻ፣ «ታኒ ጨማዲ፣ ታማቻታካ ባሬ ላይላን ሱጌዳዉኖ፣ ሃዋ ታኒ ኣያን ኤራኒታ?» ጌዳ።

19 ኪታንቻይካ ዛሬዴ፣ «ታኒ ያሳ ሲንላን ኤቂያ ጋብሬላ፤ ሃዋ ሚሺራቹዋ ኔው ኦዳናው ኔኮ ኪቲታዲ፤ 20 ሄኮ ሄ ዋዲያን ሃናና

* 1:5 ዪሁዳ፣ ሃዋኒ ዪሁዳ ጋዲያ ጌቲቲዳዌ ፊልሰፃሚ ጋዲያ ኡባ ቤሲያዋ።
1:5 1ኦድ 24:10 † 1:9 ኢፃና ጨዊሱዋ፣ ሃዋ ጉሳይ ጨዊያ ዋሳ ኮታ ያሳኮ ጋኬ ጊዴ ዋንታኔ ኦማርሲ ዋዴ ጨዊሲያ ዋጋ። 1:15 ፓይ 6:3 ‡ 1:17 ኤላሳ፣ ሃዌ ጌቲቲዳዋ፣ ካሴ ኤጫ ጫቁዋ ማፃፃን ናቢያ ኤላሰ ኦራላባ ኦሲያ ዋልቃኒ ኤሬቲዳዋ ዲራሳ። 1:17 ሚላ 4:5፣ 6 1:19 ዳን 8:16፤ 9:21

ታ ቃላ ኔ አማና ቤና ዲራው፥ ሃ ዩዉ ሃናና ጋላሳይ ጋካናው ኔኒ ዲዴ ገደናሳ፤ ሃሳያናዉካ ደንደያካ» ጌዳ።

21 ሄ ዎዴ አሳይ፡ ዛካራሲ ጌሻ ጎሊያፔ ከሴናን አያው ጋሚዔዴንቶ ማለሌተዴ ናጊኖ። 22 ከሴዳ ዎዲያንካ ሃሳያናው ደንደይቤና፤ ጌሻ ጎሊያን ሳፃ ኢ ቤዔዳዎ አከከዲኖ፤ ኢካ ሃሳያናው ደንደይቤናዎ ያርሲ ቤሲዴ፡ ዲዴ ገዲዴ ዴዔዳ።

23 ዛካራሲካ ባሬ ኦሱዎ ዎዲያ ዉርሶ ዎዴ፡ ባሬ ጎሌ ሲሜዳ። 24 ሄዎፔ ጉዩያን አ ማቻታ ኤልሳቤፃ ሻሃራዴ ኢቼሹ አጌና ባሬና ጌንሳዱ። 25 ኤልሳቤፃካ፡ «ታ ቶሺያ አሳ ገደፔ ዲጋናው § ጎዳይ ባሬ ማርቴላን ታና ፃሎ ዎዴ፡ ሃዎዳን ታው አሴዳ» ጋዲ።

ዩሱሳ ዩሌታይ ካሴቲዴ አዴቲዳ

26 ኡሱፑንሳ አጌናን ያሳ ኪታንቻ ጋብሬል ጋለላ ጋዲያን ናዚሬቲ ካታማ 27 ዳዊታ ያራፔ ገዴዳ ዮሴፋ ጌቲቲያ ቢታኔው ኦሺታ ቃሽቲዳ ዎደራቲኮ ያሳ ማታፔ ኪቲቲዳ፤ ዎደራቲ ሱንሳይካ ማይራዎ ጌቲቲ። 28 ኪታንቻይካ ማይራሚኮ ዩዴ፡ «ዳሪሳዴ ደሴታዉኔ፡ ሳርቴላይ ኔው ገደ፤ ጎዳይካ ኔናና ጋሶ ዴዔ፤ ኔኒካ ማጫዋንቱ ገደን አንጄቲዳዉኖ» * ያጌዳ።

29 ማይራማካ አ ሃሳያፔ ዴንደዎን ዳሪሳ ዳጋማዴ፡ «ሃዎ አያ ማላ ሳርታ ገዳኔ» ጋዴ ዩዉዎ ቆፓዲ። 30 ኪታንቻይ ኢዞ፡ «ሃኔ ማይራሜ፡ ያሳ ማታን ሳባ ዴማዳ ያዮፓ። 31 ኔኒ ሻሃራዴ፡ አቱማ ናዓ ዩላናሳ፤ አ ሱንሳካ ዩሱሳ ጋናሳ። 32 ኢካ ዳራ ገደናዎ፤ ኡባፔ ቶቃ ያሳ ናዓ ጌቲታና፤ ጎዳ ያሳይ አ አቡ ዳዊታ ካዉቲላ ኦይዲያ አው አማናዎ። 33 ኢካ ያዩቆባ ጎሊን ሜዲናው ካዉታናዎ፤ አ ካዉቲላዉካ ዉርሴላይ ባዎ» ያጌዳ።

34 ማይራማካ ኪታንቻ፡ «ታኒ ዎደራቶ ገደ ዲራው፡ ሃዎ ዎቲ ሃናናዎ?» ያጋዲ።

35 ኪታንቻይካ ዛሪዴ ኢዚው፡ «አያና ጌሻይ ኔ ቦላ ያናዎ፤ ቶቃ ያሳ ዎልቃይ ኔናን ሺምፓናዎ። ሄዎ ዲራው፡ ኔፔ ዩሌቲያዎ ጌሻ ያሳ ናዓ ጌቲታና። 36 ኔ ዳባታ ኤልሳቤፃ ባሬ ጨማቴላ ዎዲያን

§ 1:25 ታ ቶሺያ አሳ ገደፔ ዲጋናው፡ አሲና ጌሌዳ ሚሺራታ ናዓ ዩሌናን አቶፔ፡ ኢሲራዔሊያ አሳ ቆፋን፡ «ያሳይ ኢዞ ሙሪ ዴዔ» ያጌታው። 1:27 ማት 1:18

* 1:28 ኔኒካ ማጫዋንቱ ገደን አንጄቲዳዉኖ፡ ሃ ቆፋይ ቤኒ ጨሜዳ ግሪኪያ ማፃፋን ባይናዎ ገዲያ ዲራው፡ ኢቲ ኢቲ ኢንጊሊዜሉዎኒኔ አማራሉዎ ማፃፋኒካ ባዎ።

1:31 ማት 1:21 1:33 2ሳም 7:12፣ 13፣ 16፤ ኢሳ 9:7

አቱማ ናዓ ሻሃራዲ። ማንላ ጌቲቲዳወና ኤልሳቤፃ ሻሃሮዳፎፎ ኡሱፑንላ ኣገና ኦይቃዲ። 37 ያሳ ያኒያ ዬዉ ባዋ» ያጌዲ።

38 ማይራማካ፡ «ታኒ ጎዳ ኣይላቶ፤ ኔኒ ጎዋዳን ሃና» ጋዲ። ሄዋፎ ጉዩያን ከታንቻይ ኢዚ ማታፎ ቤዳ።

ማይራማካ ኤልሳቤፃ ኣቻናው ባዲ

39 ማይራማካ ሄ ኣገና ጊዶን ዳንዳዳ ከሊ ዘዘቲያ ዪሁዳ ጋዴን ዳዒያ ኣቲ ካታማ ኤሌላ ኮሳዲ። 40 ዘካራሳ ጎሌ ጌላዳ ኤልሳቤፃ ሳሮታዲ። 41 ኤልሳቤፃካ ማይራማ ሳሮታ ሲሴዳ ዎዳ፡ ኢዚ ኡሉዋን ዳዒያ ሻሃራይ ጉፎዳ፤ ኤልሳቤፃካ ኣያና ጌሻን ኩማዲ። 42 ባሬ ኮሻካ ጶቁ ኦላዳ፡ «ኔኒ ማጫዋንቲ ጊዶፎ ኣንጃቲዳዉና። ኔፎ ዩሌቲያዌካ ኣንጃቶዋ። 43 ኔኒ ታ ጎዳ ዳያ ታኮ ያናው ታኒ ኦኔ? 44 ሄኮ ኔ ሳሮታ ኮሻይ ታ ሃይላን ሲሴቲዳ ዎዳ፡ ታ ኡሉዋን ዳዒያ ሻሃራይ ናሼቻን ጉፎዳ። 45 ጎዳይ ፖሌፎ ጊዳ ኢዚው ኦዳዳዋ ኣማኔዳዉና ኢዛ ኣንጃቲዳዉና» ያጋዲ።

ማይራማ ጋላታ ዬላ

(1:46-53)

46 ማይራማካ፡

«ታ ሼዎፓታ ታ ጎዳ ቦንቻው፡

47 ታ ኣያናይካ ታ ያሳ፡ ታ ጳሊያን

ሎይላ ናሼታው።

48 ኢካ ባሬ ኣይላቲ ቶሺያ

ፃሌዲ።

ሃቼፎ ዶሚዳ ዩሌታይ ኡባይ

ኣንጃቲዳዉኔ ጊኖ።

49 ዎልቃማ ጊዳዳ ኢ ዳሮ

ዬዉዋ ታው ኦሴዳ፤

ኣ ሱንሳይካ ጌሻ።

50 ኣ ማሮታይ ያዩያዋንቲሲ ዩሌታፎ ዩሌታይ

ጋካናው ዳዔ።

51 ባሬ ዎልቃን ሚኖ ከታ ከቲቲዳ፤

ባሬንቲ ዎዛና ቆፋን ኦቶሬቲያዋንታ

ላሌዳ።

52 ዎዲያዋንታ ካዉቲላ ማታ ኦይዲያፎ ዎሴዳ፤

ኣሺካቲዋካ ቃሲ ጶቁ ጶቁ ኦሴዳ።

53 ኮሻቲዳዋንታ ሎዎ ዩዉዋን ካሊሴዳ፤

ዲራቱዋ ቃሲ ሜላ ዩዳርሴዳ
 54 ባሬ ማርቲሳ ቆፒዳ
 ባሬ ኣይሊያ ኢሰራዔሊያ ማዳዳ።
 55 ኑ ኣዋቶ ኢ ኦዴዳዋዳን
 ኣብራሃሚዉኔ ኣ ያራው ጌዳዋ
 ማዲናው ናጋና ዲራሳ»
 ያጋዲ።

56 ማይራማካ ሄዙ ኣጌና ከና ኤልሳቤዲ ማታን ጋሚዖዋፕ
 ጉዩያን ባሬ ጎሌ ሲማዲ።

ፃማቂያ ዮሃንስ ዩሌታ

57 ኤልሳቤዲዉካ ዩሊያ ዋዲ ጋከና፣ ኣቱማ ናዓ ዩላዲ።
 58 ኢዚ ሾራቱኔ ኢዚ ዳቦ ጊዳዳዋንቱ፣ ጎዳይ ማርቲሳ ኢዚው
 ኦሌዳዋ ሲሲዳ ኢዚና ኢቲፕ ናሹቲዲኖ።

59 ሆሰፑንጎሳ ጋላሳን ናዓ ቃፃራናው ዩዲኖ፤ ኣ፣ ኣዉዋ ሱንጎሳን
 ዛካራሳ ጊዳ ሱንጎሳናው ኮዩዲኖ። 60 ኣ ዳያ ቃሲ፣ «ሃኔና፣
 ዮሃንስ ጌቲታናው ኮሼ» ያጋዲ።

61 ኡንቱንቱካ ኢዞ፣ «ኔ ዳባቱዋፕ ሃቼ ጋካናው ኢቱካ ሃ
 ሱንጎሳን ጸሴቲቤና» ያጌዲኖ።

62 ኣ ኣባ፣ ኦና ጊያ ሱንጎሳን ጭታናው ኮዩንቶ ዮርሲ ኦቼዲኖ።

63 ኣ ኣቡካ ያፊያባ ኦቼ ኣኪዳ፣ «ናዓ ሱንጎሳይ ዮሃንስ» ጊዳ
 ያፊና፣ ኡባቱካ ዩዉዋን ማላሌቲዲኖ። 64 ሄዋንካ ዛካራሳ ደናይ
 ደዬቲዳ፣ ኣ ኢንፃርሳይካ ቢሌቲና ሃሳያ ደሜዳ፣ ያሳካ ጋላቲዳ።

65 ኣ ሾራቱካ ዴዒያሳ ኡባን ያሻን ኩሚዲኖ። ሃ ዩዉካ
 ዘዜቲያ ዩሁዳ ጋዲያ ኡባን ዳሪ ሃሳዬቲዳ። 66 ሃዋካ
 ሲሴዳዋንቱ ኡባቱ፣ «ሃ ናዓይ ኣያ ጊዳኔሻ?» ያጊዳ ዩዉዋ
 ባሬንቱ ዋዛናን ኦይቄዲኖ፤ ያሳይካ ኣናና ዴዒያዋ ኤሬዲኖ።

ዛካራሳ ጋላታኔ ቲምቢቲያ ኦዲዋ

67 ዮሃንስ ኣቡ ዛካራሲ ኣያና ጌሻን ኩሚዳ ቲምቢቲያ ያጊ
 ኦዴዳ፣

68 «ኢሰራዔሊያ ጎዳይ ያሳይ ኣንጃቶ፤
 ዩዳ ባሬ ኣሳ ያሞሴዳኔ ዋዜዳ።

69 ባሬ ኣይሊያ ዳዊቲ ጎሊያን፤
 ዋልቃማ ኣሺያዋ ኦሲ ጊጊሴዳ።

70 ሃዌካ ቤኒ ጎዳ ጌሻ ናባቱዋ
 ደናን ኦዴቶዋዳን፣

71 ኢ ኦና፣ ኑ ሞርኬቱዋፔኔ

- ኑናና ኤቄቲያዋንቱ ኩሺያፔ አሻናሳ።
- 72 ሃዋካ ኢ ኦሴዳዌ፣ ኑ አዋቶ
ማርቴላ ቤሳናሳ፤
ባሬ ጌሻ ጫቁዋ ዎዛና አላናሳ።
- 73 ኑ አዉዋ አብራሃሞሲ
ጫቁዳ ጫቁዋ ቆፓናው።
- 74 ኑ ሞርኬቱዋ ኩሺያፔ ኬሲዴ
ያሻይ ባንታን አው ኦላናዳን
ማታ ኑሲ አሜዳ።
- 75 ሃዌኔካ፣ ኑና ኑ ዎዲያ ኡባን
ጌሻቴላኒኔ ዲሎቴላን
ባሬ ሲንላን ኤሳና ዲራሳ።
- 76 ዛሪዴካ፣ ኔኖ፣ ታ ናባው።
ጶቃ ያሳ ናቢያ
ጌቴታናሳ፤
ኦጊያ ገገሳናው ጎዳፔ ሲንላና
ባናሳ።
- 77 አሳ ናጋራ ማሪያ አቶቴላ ኤራ
ኡንቱንቶ አማናሳ።
- 78 ሃዌካ ኪሊፔ ዬዳ ፖፐ።
ኑና ያሞሴዳዌ ኑ ያሳ ማርቴላኔ
ቃሬታ ጋሱዋና።
- 79 አ ፖፐካ ቋማኒኔ ሃይቁዋ ኩዋን
ኡቴዳዋንቶ ፖሲሴ፤
ኑ ጌዲያካ ሳርቴላ ኦጊያን ሱሪሴ።»
- 80 ናባይካ ዲጨዴ፣ አያናን ሚኔዳ፤ ኢስራዔሊያ አሳው ቤቴዳ
ጋላሳይ ጋካናው ማላ ቢታን ዴዔዳ።

2

ዬሱሳ ዬሌታባ (ማጥ 1:18-25)

1 ሄ ዎዴ * ሮማ ካዉቲላ ጋርሳን ዴዒያ አሳይ ኡባይ ሱንላ
ፃፊታናዳኒኔ ፓይዴታናዳን አዉጊስፆሴ ቁሳሬፔ † አዛዙ ኬሴዳ።

* 2:1 ሃዎዴ፣ ጌቴቶዌ ፃማቂያ ዮሃኒሲ ዬሌቲ ሲሚዴ ቢሮ ጉላቴላን ዴዒሺን ዬሱሲ
ዬሎቶ ዎዲያና። † 2:1 ቁሳራ፣ ጊያ ሱንላይ ካቲያ ጉሳ። ሃዌኔካ ጮራ ጋዲያ
ሞዲያ ዎልቃይ ዴዒያ ጮራ ካታቱዋ ካቲያ ጉሳ።

2 ሃዌኔካ፣ ቄሬኔዮሴ † ሶሪያ ጋዲያ ሞዲያ ዎዴ ሃኔዳ ኮይሮ አሳ ፓይዲዎ።

3 ሃዎ ዲራው ኢቲ ኢቲ አሳይ ፃፊታናው ባሬ ካታማ ባሬ ካታማ ቤዳ። 4 ዮሴፎካ ዳዊታ ጎሊያፔኔ ያራፔ ጊዲያ ዲራው ጋሊላ አወራጃን ዳዒያ ናዚሬቲ ካታማፔ ዴንዲዳ ዳዊታ ካታማ ጊዴዳወኒኮ ዪሁዳን ዳዒያ ቤቴሊሄሜ ጌቴቲያ ካታማ ኬሴዳ።

5 ሄ ዎዴ ዩሊያ ዎዲ ማቴዳ አው ኦሼታ ኡቴዳ ማይራማካ አናና ኢቲፔ ባዴ። 6 ኡንቴንቴ ሄዎን ዳዒሺን ኢዚው ዩሊያ ዎዲ ጋኪ አጌዳ። 7 ኢዛካ ባይራ ናዒ § ጊዴዳ አቲማ ናዒ ዩላዲ፤ ኢማላይ ሸምፒያሳ ዳማ ቤና ዲራው፣ ናዒ ማዩዋን ፃፃዴ ጋጳቲያን * ቄራዲ።

ዉዲያ ሄሚያዋንታኔ ኪታንቻቱዋ

8 ሄ ጋዲያን ቃማ ባሬንቴ ዉዲያ ሄሚዳ ዳምባን አቂያዋንቴ ዳዒኖ። 9 ያሳ ኪታንቻይ ቆፔናን ዪዴ ኡንቴንቴ ሚዪያን ኤቄዳ፤ ጎዳ ቦንቹ ኡንቴንቴ ዩሹዋን ፖዔዳ ዎዴ፣ ዎልቃማ ያሻይ ኡንቴንታ ኦይቄዳ። 10 ኪታንቻይ ኡንቴንታ፣ «ያዮፒቲ፣ አሳው ኡባው ሃኒያ ዳሮ ናሹቲያ ሚሺራቹዋ ታኒ ሂንቴንቶ አሃዲ። 11 ሃቹ ዳዊታ ካታማን አሺያዌ ዩሌቴዳ። ኢካ ጎዳ ኪሪሰቶሳ። 12 ሃዌ ሂንቴንቶ ማላ ጊዶ፣ ጋጠኖ ናዒይ ማዩዋን ፃፃቲዳ ጋጳቲያ ጊዶን ጊሴዳዋ ዳማኒታ» ያጌዳ።

13 ቆፔናን ጮራ ያሳ ኪታንቻቱ ኮይሮ ኪታንቻና ኢቲፔ ቆንጨዲኖ።

14 ያሳካ ጋላቲዳ፣ ሃዎዳን ጌዲኖ፡

«ቦንቹ ያሳው

ቦላ ሳሉዋን ጊዶ።

ሳዒን ኢ ደሲያ አሳው

ሳሮቴላይ ጊዶ»

ያጌዲኖ።

15 ኪታንቻቱ ኡንቴንቴፔ ሻኬቲዳ ሳሉዋ ኬሶዋፔ ጉዬ፣ ዉዲያ ሄሚያዋንቴ፣ «ጎዳይ ኑሲ ቆንጨሴዳዎ፣ ሃዎ ሃኔዳ ዩዉዋ ቤዓናው ቤቴሊሄሜ ቦይቴ» ጌቴቴዲኖ።

† 2:2 ቄሬኔዮሳ፣ ጌቴቴያዌ ሮማ ካቲ አወጊሰዎሴ፣ ሶሪያ ጌቴቴያ ዪሁዳኔ ጋሊላ አወራጃቱዋ ኦይቄዳ ጋዲያን ሱንጻዬዳዎ። § 2:7 ባይራ ናዒ፣ ኢሲራዒሊያ አሳይ ዩሌቴዳ ናዒ ኡባ ጎሊያንካ ያሳው ቤሲያዋ ጊኖ። * 2:7 ጋጳቲያ፣ ሃ ሚሻይ ሚያይ ሚያባይ ሳዒን ላሌቴናን ማና ማላ ዩጊዴ ኢሚያባ።

16 እንቱንቱካ ኤሌሊዳ ቤዲኖ። ማይራሞኔ የሴፋ ዳሚዳ። ጋጠኖ ናዓይካ ጋጳቲያን ጊሴዳዋ ቤዒዲኖ። 17 ሄዋፔ ጉዩያን ጉላ ናዓ ዲራው ኦዴቲዳዋ ቆንጨሲዳ ኦዴዲኖ። 18 ሃዋ ሲሴዳ ኡባይ እንቱንቱ ኦዴዳ ዩወዋን ማላሌቲዲኖ። 19 ማይራማ ቃይ ሃዋ ኡባ ባሬ ዋዛናን ኦይቃዴ ቆፓዴ ጋሚዒዲ። 20 ወዲያ ሄሚያዋንቱካ ኡባ ዩወ እንቱንቱ ኦዴቲዳዋዲን ሃኒና ዳሞ ዲራው። ሲሴዳዎኔ ቤዒዳዋ ኡባው ያሳ ቦንቲዲኔ ጋላቲዳ ሲሜዲኖ።

21 ናዓው ሆሰፑን ጋላሳ ጊዲና ቃፃሬቲያ ዋዲ ጋኮ ዋዴ። ኢ ኣቲ ኡሉዋን ኣታናፔ ካሴ። ኪታንቻይ ኬሶ ሱንላን፣ ዩሱሳ ጌቲቲዳ።

ዩሱሲ ጌሻ ጎሊያን ያሳው ሼጴቲዳ

22 ሙሴ ዋጋ ማራዳን ጌዩያ ዋዲ ተ ፖሌቲዳ ዋዴ የሴፎኔ ማይራማ ጋጠኖ ናዓ ያሳው ሼጳናው ዩሩሳላሜ ኣኪ ቤዲኖ። 23 ሄዌኔካ ጎዳ ዋጋን፣ «ኣቲማ ናዓ ጊዴዳ ባይራ ናዓይ ተ ኡባይ ያሳው ዲማቲዳዋ ጊዳናዋ» ጌቲቲ ፃፌቲዳዋዲኒ። 24 ቃሲካ ጎዳ ዋጋን፣ «ላዑ ደጎማቲዋ ዋይ ላዑ ሃራጶ ማራቲዋ» ጌቲቶዋዲን፣ ጎዳው ያርሹዋ ያርሻናው ኣፌዲኖ።

25 ሄ ዋዴ ፃሎኔ ጌንጫ ጊዴዳ ሲሞና ጌቲቲያ ኢቲ ቢታኒ ዩሩሳላሜን ዳዔ። ኢካ፣ ኢሰራዔሊያ ኣሳው ኣቶቲላ ሂዶታ ናጊያዎኔ ኣያና ጌሻይ ኣ ቦላን ሸምፔዳ ኣሳ። 26 ጎዳን ኦኬቲዳ ኪሪሰቶሳ ቤዒናን ሃይቄናዋ ኣያና ጌሻን ኣው ቆንጨሲዳ።

27 ኢካ ሄ ዋዴ ኣያና ጌሻይ ካሌሊና፣ ጌሻ ጎሊያ ጌሌዳ። ናዓ ዩላዋንቲ ኤሪያ ዋጋ ማራዳን፣ ኮሺያዋ ኣው ፖላናው ጉላ ናዓ ዩሱሳ ኦይቄዴ ጌሎ ዋዴ። 28 ሲሞኔ ሞኪ ኣኪ ናዓ ኢዲሚዴ ያሳ ጋላቲዴ ሃዋ ያጌዳ።

29 «ጎዳው፣ ኔኒ ቃላ ጌሎ ማራዳን ሃዒ ታና ኔ ኣይሊያ ሳሩዋን ኔኮ ኣፋ።

30-31 ጋሱካ፣ ታ ኣይፋቲ ኣሳ ኡባ ሲንላን ኔኒ ጊጊሴዳ፣ ኣሺያ ሂዶታ ቤዒዲኖ።

32 ሄዌካ ኢሰራዔሊያ ጊዴና ኣሳው

2:21 ዋግ 12:3፤ ሉቅ 1:31 ተ 2:22 ጌዩያ ዋዲ፣ ኣዩሁዳቲዋ ማጫ ኣሳይ ኣቲማ ናዓ ዩሎዋፔ ጉዩያን፣ «ጌሻ ጊዴኩ» ያጊ ቆፐኖ። ቃይካ ሄ ናዓይ ቃፃሬታና ጋካናው ኢካ ሶጪፔ ኬሴናዲን ኡዶታው። ሃ ዋዲ፣ ጌዩያ ዋዲያ ጌቲቲ። ተ 2:23 ባይራ ናዓይ፣ 2:7 ጸሊቲ። 2:23 ኬሰ 13:2፣ 12

ቆንጮላ ኢሚያ ፖዑዋ።
ቃሲ ኔ ኣሳው ኢስራዔልው ቦንቹዋ።»

33 ዮሴፎን ኣ ዲያ ኣ ዲራው ሃሳዬቲዳ ዩወዋሲ ማላሌቲዲኖ።

34 ሲሞኒካ ኣንጂዴ ማይራዋ። «ሃዌ ናዓይ ኢስራዔሊያን ጮራቲዋሲ ዴንዲዋሲ ኩንዳላው ጋሶ ጊዳናው፣ ቃሲካ ኢታ ሃሳዪያዋንቲሲ ማላ ጊዳናው ዶሬቲዳ። 35 ጮራቶካ ዋዛና ቆፋይ ቆንጮዋ ጊዳናው፣ ኔ ሼምፑካ ማሻን ቃንዖዋዲን ሴሌታናዋ » ያጌዲ።

36 ቃሲካ ኣሴራ ያራፔ ጊዳዳ ፓኑዔላ ናታ ሃኖ ጌቲቲያ ናባታ ዴዓው፤ ኢዛካ ሎይላ ጨማዲ። ባሬ ዋዶሮቲላን ጌሌዳ ኣሲናና ላፑ ላይላ ዴዳዳውኖ። 37 ኢዚ ላይላይካ ሆሰፑን ታማኔ ኦይዲዋ ጊዳና ጋካናው ጋላሳኔ ቃማ ጌሻ ጎሊያፔ ሻኬቲናን ዖማኒኔ ዋሳን ከቲታይ ኣምዔ ስ ጊዳዴ ጋሚዳዲ።

38 ሄ ዋዴካ ሺቃዴ ዖሳ ጋላታዲ፤ ቃሲካ ዩሩሳላሜ ኣሳይ ዋዜታናው ናጊያዋንቶ ኡባቶ ጋጨኖ ናዓ ዩሱሳባ ኦዳዲ።

ዮሴፎን ማይራማ ናዚሬቲ ሲሜዲኖ

39 ዮሴፎን ማይራማ ጎዳ ሂጊያን ኣዛዜቲዳዋ ኡባ ፖሎዋፔ ጉዬ ጋላላ ኣወራጃን ዴዒያ ባሬንቲ ካታማ ናዚሬቲ ሲሜዲኖ።

40 ጉላ ናዓይካ ዲጨዴኔ ሚኒዴ ቤዳ፤ ኣቶ ኤራኒካ ኩሜዳ፤ ዖሳ ኣቶ ኬካቲላይ ኣቦላን ሼምፔዳ።

ጉላ ናዓ ዩሱሲ ጌሻ ጎሊያን

41 ዮሴፎን ማይራማ ላይላን ላይላን ፓሲጋ ባላ ቦንቻናው ዩሩሳላሜ ካታማ ቢኖ። 42 ናዓወካ ታማኔ ላዑ ላይላ ጊዶ ዋዴ ደያዳን ባላው ሂኒ ዩሩሳላሜ ኬሴዲኖ። 43 ባላ ፖሎዋፔ ካላ ባሬንቲ ጎሌ ኡንቲንቲ ሲሞዴ ጉላ ናዓ ዩሱሲ ዮሴፎን ማይራማ ኤሬናን ዩሩሳላሜን ኣቲ ኣጌዳ። 44 ኡንቲንቲና ኢቲፔ ዴዒያዋ ማላቲና ኢቲ ጋላሳ ኦጊያ ሃሜቲዲኖ። ጉዬፔ ቃሲካ ባሬንቲ ዳባቲዋናኔ ባሬንቲ ሲቄቲያዋንቲ ማታን ኮሻ ደሜዲኖ።

45 ጳዮ ዋዴ ኮዪዴ ሂኒ ዩሩሳላሜ ሲሜዲኖ። 46 ሄዙ ጋላሳፔ ጉዬ፣ ታማሪሲያዋንቲ ጊዶን ዩሱሲ ኡቲዴ ኡንቲንቲ ጊያዋ ሲሲዴኔ ኡንቲንታ ኦቲዴ ጌሻ ጎሊያ ጋርሳን ዴዒያዋ ቤዔዲኖ።

47 ሲሲያዋንቲ ኡባቲካ፣ ኣ ኣኬካኒኔ ኣ ዛሩዋን ማላሌቲዲኖ።

§ 2:37 ኣምዔ፡ ኣምዔ ጉሳይ ኣሲናይ ሃይቁና ጌሊናን ጋሚዳዳ ማጫወኖ። ሃ ፓይዲዋን ዓፊቲዳ ሚሺራታ ላፑ ላይላ ዓላላ ኣሲናና ጋሚዖዋፔ ጉዬ 84 ላይላ ኡባ ኣምዔ ጊዳዴ ጋሚዳዲ። 2:39 ማኑ 2:23 2:41 ኬስ 12:1-27፤ ዛር 16:1-8

48 የሱጫኔ አ ዳያ አ ቤዎ ዎዴ ማላሌቴዲኖ። አ ዳያካ፣ « ታ ናዓው፣ አያው ኑና ሃዎዳን ኦላይ? ኔ አቡኔ ታኔ ኔና ኮዪዴ፣ ዳር ሜቶቴደ» ያገዱ።

49 ዬሱሲካ ኡንቱንቶ፣ «አያው ታና ኮዪቴ? ታ አቡ ጎሌን * ዴዓናው ታው ኮሺያዎ ኤሪቤይኪቴ?» ያገ ዛሬዳ። 50 ሄዎ ያገ ኦዶፕ አቲን፣ ኡንቱንቶ ኢ ኦዴዳ ዬዉ አያ ገንቶ ጌሊቤና።

51 ሄዎፕ ሲሚዴ፣ ኡንቱንቱና ኢቲፕ ሂኒ ናዚሬቴ ቤዳ፤ ሄዎንካ ኡንቱንቶ አዛዜቴ። አ ዳያካ ሄዎ ኡባ ባሬ ዎዛናን ዎላዲ። 52 ዬሱሲካ ኤራኒኔ ጌሳን፣ ሳባኒካ ያሳኔ አሳ ሲንሳን ዲጨዳ።

3

ፃጃቂያ የሂኒሲ ዬሱሳው አገያ ገገሴ
(ማት 3:1-12፤ ማር 1:1-8)

1 ደባሪዮሳ ጌቴቲያ ካቲ ካዉቴዳ ታማኔ ኢቼሽሌያ ላይላን ጳንጻናዊያ ጳላዎሲ ዪሁዳ ዎዲያ ዎዴ፣ ሄሮዲሴ ጋለላን ኦይዴንሌያ ሻኩዎ ዎዲያ ዎዴ፣ አ ኢሻይ ፒሊጳሲካ ኢፀሪያኒኔ ዪርኮንዶሳን ኦይዴንሌያ ሻኩዎ ዎዲያ ዎዴ፣ ሊሳኒዮሲካ አቢሌኔን ኦይዴንሌያ ሻኩዎ ዎዲያዎ ገዲዴ ዎዲ ዴዒሽን፣ 2 ሂኒኔ ቄያፋይ ቄሳቱዎ ካፓቱዎ * ገዲዴ ዴዒሽን፣ ያሳ ቃላይ ዛካራሳ ናዓ የሂኒሳኮ ሜላ ቢታን ዬዳ። 3 የሂኒሲ ዮርዳኖሳ ሻፋ ሄራ ኡባ ቢዴ፣ «ሂንቴ ናጋራይ አቶ ጌቴታና ማላ ናጋራ ፓዲዴ ፃጃቂቴቴ» ያገ ታማሪሴዳ።

4 ናቢያ ኢሲያሳ ማፃፋን ፃፊቴዳ ቃላዳን፣

«ሜላ ቢታን ዎሲያ ቢታኒያ ኮሻይ፣

ኅዳው አገያ ገገሴቴ፤

አ አገያካ ሱሪሲቴ።

5 « ኦላይ ኡባይ ኩዎ፤

ዴሪኔ ዞዚ ዴንባ ገደ፣

ገጌና ኦጊ ኡባይ ገሳ፣

ሃንቺር ኦጊ ኡባይ ሊቆ።

6 « ሄዎ ገደፕ አሳይ ኡባይ ያሳይ ኢሺያዎ ቤዓና »

* 2:49 ታ አቡ ጎሌን፣ ጉሳይ፣ ታ አቡ ኪቴዳ ኦሱዎ ፖላናው ቤሴ ጉሳ። 2:52 1ሳዎ 2:26፤ ለዎ 3:4 * 3:2 ቄሳቱዎ ካፓቱ ሂኒኔ ቄያፋይ፣ ሃና ካፖቴላ ዎዲ ዬሱሲ ዬሌታናፕ ካሴ 6-15 ላይላ ጋካና። ቄያፋ ጌቴቲያ ሃና ቦሉ 18-37 ላይላ ካፖ ገዲዴ ዬሱሳ ዬሌታፕ ካሴ ጋሚዳዳ። 3:4 ኢሳ 40:3-5

ያጌዳ።

7 ሃዋ ዲራው የሃረሲ ኣ ኩሺያን ፃማቂታናው ኬሴዳ ኣሳው ሃዋዳን ኣዲዋ ደሜዳ፡ «ሂንቴኖ፡ ሸሻ ናቶ፤ ዪያ ሃንቁዋፔ ኣታና ማላ ሂንቴንታ ኦኒ ማቂዳ? 8 ሲሚ ሂንቴንቱ ናጋራፔ ሲሜዳዋንቶ ቤሲያ ኣይፊያ ኣይፊቴ። ሂንቴንቱ ዋዘናን ኣብራሃሞ ኑ ኣቡ ዴዔ ጎፒቴ። ያሳይ ኣብራሃሞሲ † ናና ሃ ሹቻቱዋፔ ዴንሳናው ዳንዳይ ያጋዴ ታኒ ሂንቴንቶ ኦዳይ። 9 ሃዒ ኡባ ቤዒ ሚላ ፃጵዋን ቃንፃናው ገቢ ኡቴዳ፤ ሲሚ ሎዖ ኣይፊያ ኣይፊና ሚላይ ኡባይ ቃንፃቲዳ ታማን ኦሌታናዋ።»

10 «ያቲና ሃዒ ኑ ኣያ ኡዳኔ?» ያጌዳ ኣ ጮራ ኣሳይ ኦቼዳ።

11 የሃረሲካ፡ «ላዑ ማዩ ዴዒያዌ ባይናዎ ኣሞ፤ ቁማይ ዴዒያዌካ ባይናዎ ጌሾ» ያጌ ዛሬዳ።

12 ቃራፃ ሺሺያዋንቱካ ፃማቂታናው ዪዳ፡ «ታማርሲያዎ፡ ኑ ኣያ ኡዳኔ?» ያጌ ኦቼዳና።

13 ኢ ኡንቴንቶ፡ «ጌቴቶዋፔ ኣጶ ቃራፃ ኣሊ ሺሾፒቴ» ያጌ ኦዳዳ።

14 ሃዋፔ ካላ ዋታዳራቴ፡ «ኑኒሺ፡ ኣያ ኡዳኔ?» ያጌ ኣ ኦቼዳና።

የሃረሲካ፡ «ኣሳ ሻሉዋ ናቁዋን ቦንቂ ኣኮፒቴ፡ ኦናኔ ዋርዲዋን ዋቶፒቴ፡ ሂንቴንቱ ዲርጉ ሂንቴንቶ ጌዳና» ያጌ ዛሬዳ።

15 ሄ ዎዴ ኣሳይ ኡባይ ኪሪሰቶሳ ዩሳ ናጌዴ ዴዒያ ዲራው የሃረሳ፡ «ሃዌካ ኪሪሰቶሳ ጌዳናን ኣቴና» ያጌዴ ባሬንቱ ዋዘናን ማሌዲና። 16 የሃረሲ ኡባቱዋካ፡ «ታኒ ሃላን ፃማቃይ፤ ጌዶፔ ኣቲን ታፔ ዎልቃማይኔ ታኒካ ኣ ጫማ ቃሹዋ ቢላና ዳንዳይናዌ ‡ ቢር ያናዋ፤ ኢካ ኣያና ጌሻኒኔ ታማን ፃማቃናዋ፤ 17 ኣ ኩሺያን ካላ ዳላፔ ሻኪ ጌሺያ ላይዳይ ዴዒ። ካላ ኡዲማን ቡኮዋ ጌሺ ፑኒዴ ኣይፊያ ዲዪያን ቆሌ፤ ሺን ዳላ ቶዔና ታማን ጉዴ።»

18 የሃረሲካ ሃራ ጮራ ቃላን ጮራ ኣሳ ማቂዳ ሚሺራቸዋ ቃላ ኦዳዳ።

ሄሮዲሴ ፃማቂያ የሃረሳ ቃቼዳ

19 ኃሊላ ዋዲያ ሄሮዲሳ ቃሲ ባሬ ኢሻ ፒሊጶሳ ማቻቶ ሄሮዲያዶ ኢ ኣኬዳ ዲራዉኔ ሃራካ ጮራ ኢታ ኪታ ኪቲቶ

3:7 ማት 12:34፤ 23:33 † 3:8 ኣብራሃሞሲ ናና፡ ኣዪሁዳ ኣሳቱ ባሬንታ ያሳይ ደሬዳ ኣሳ ያጌ ቆፒና። ጋሱኔካ፡ ቤኒ ሂዶታ ቃላይ ያሳፒ ኑ ኣቡ ኣብራሃሞሲ ኣሜቴዳ ያጌዴ ቆፒያ ዲራሳ። 3:9 ማት 7:19 3:12 ሉቅ 7:29 ‡ 3:16 ኣ ጫማ ቃሹዋ ቢላና ዳንዳይናዌ፡ ሃዌ ቆማ ዎይ ዳንጋዒራቲ ኦሱዋ።

ዲራው፡ የሃኒሲ ሴሬዳ። 20 ሃዋ ዲራው ሃ ኡባ ጉጂዳ ሄሮዲሴ የሃኒሳ ቃሾ ጎሌ ጌልሴዳ።

የሃኒሲ ዩሱሳ ፃግቄዳ
(ማጥ 3:13-17፤ ማር 1:9-11)

21 አሳይ ኡባይ ፃግቄቲ ሲሞዋፕ ጉዩያን ዩሱሲ ፃግቄቲዳ። ኢ ዋሲ ዳዲሺንካ ሳሉ ዶዬቲ አጌዳ። 22 ጌሻ ኢያናይካ ሃራጲያ ማላቲዳ አ ቦላን ዋጂዳ። ሳሉዋፕካ፡ «ታ ደሲያ ናዓይ ኔና፤ ኔናን ታኒ ናሹታይ» ያጌያ ቃላይ ዩዳ።

ዩሱሳ ዩሌታይ ካሴ ጉዬ ማዩዛፔ ዳዲያ ፓይዱዋ
(ማጥ 1:1-17)

23 ዩሱሲ ታማርሱዋ ደሞዳ አው ሃታሙ ላይላ ገዳዳ፤ ጮራ አሳይካ ባሬንቶ ማላቶዋዳን አ የሴፎ ናዓ ያጌና፤ የሴፎ ኤሌ ናዓ፤ 24 ኤሌ ማቲ ናዓ፤ ማቲ ሌዊያ ናዓ፤ ሌዊ ሚልኮ ናዓ፤ ሚልኮ ዮና ናዓ፤ ዮኒ የሴፎ ናዓ፤ 25 የሴፎ ማታቲያ ናዓ፤ ማታቲ አዋፃ ናዓ፤ አዋፃ ናሆሜ ናዓ፤ ናሆሜ ኤሲሊሜ ናዓ፤ ኤሲሊሜ ናጌ ናዓ፤ 26 ናጌ ማዓቲ ናዓ፤ ማዓቲ ማታቲዩ ናዓ፤ ማታቲዩ ሴሜዬ ናዓ፤ ሴሜዬ ዮሴቆ ናዓ፤ ዮሴቆ ዮዳ ናዓ፤ 27 ዮዳ ዮናና ናዓ፤ ዮናና ሬሴ ናዓ፤ ሬሴ ዜሩባቤላ ናዓ፤ ዜሩባቤሊ ሳላቲያላ ናዓ፤ ሳላቲያላ ኔሌ ናዓ፤ 28 ኔሊ ሚልኮ ናዓ፤ ሚልኮ ሃዴ ናዓ፤ ሃዴ ዮሳሴ ናዓ፤ ዮሳሴ ቆሳማ ናዓ፤ ቆሳማ ኤልማዶሜ ናዓ፤ ኤልማዶሜ ኤሬ ናዓ፤ 29 ኤሬ ዮሴዔ ናዓ፤ ዮሴዔ፡ ኤሊዔዜራ ናዓ፤ ኤሊዔዜሬ፡ ዮራሜ ናዓ፤ ዮራሜ ማፃቲ ናዓ፤ ማፃቲ ሌዊያ ናዓ፤ 30 ሌዊ ሲሞና ናዓ፤ ሲሞኔ ዪሁዳ ናዓ፤ ዪሁዳይ የሴፎ ናዓ፤ የሴፎ ዮናና ናዓ፤ ዮናና ኤሊያቄማ ናዓ፤ 31 ኤሊያቄማ ሜሊያ ናዓ፤ ሜሊዬ ማዩናና ናዓ፤ ማዩናና ማፃቲ ናዓ፤ ማፃቲ ናታኔ ናዓ፤ ናታኔ ዳዊቲ ናዓ፤ 32 ዳዊቲ ኢሴይ ናዓ፤ ኢሴይ ኢዮቤዳ ናዓ፤ ኢዮቤዳ ቦዔዛ ናዓ፤ ቦዔዛ ሳልሞና ናዓ፤ ሳልሞኒ ናሂሾና ናዓ፤ 33 ናሂሾኒ አሚናደባ ናዓ፤ አሚናደቢ ራማ ናዓ፤ ራሚ አሪና ናዓ፤ አሪናይ ሄዝሮና ናዓ፤ ሄዝሮኒ ፔሬዛ ናዓ፤ ፔሬዚ ዪሁዳ ናዓ፤ 34 ዪሁዳይ ያዩቆባ ናዓ፤ ያዩቆቢ ዩሳቃ ናዓ፤ ዩሳቄ አብራሃሞ ናዓ፤ አብራሃሞ ታራ ናዓ፤ ታራ ናኮራ ናዓ፤ 35 ናኮሪ ሴሮሂ ናዓ፤ ሴሮሂ ራጋዋ ናዓ፤ ራጋዋ ፔሌጋ ናዓ፤ ፔሌጊ አቤራ ናዓ፤ አቤሪ ሳላ ናዓ፤ 36 ሳሊ ቃይናና ናዓ፤ ቃይናኒ አርፋኪሲዬ ናዓ፤ አርፋኪሲዬ ሴሜ ናዓ፤ ሴሚ ኖሄ ናዓ፤ ኖሄ ሳሜሄ ናዓ፤ 37 ሳሜሄ ማቱሳላ ናዓ፤ ማቱሳሊ ሄኖኬ ናዓ፤ ሄኖኪ ያሬዳ ናዓ፤

3:20 ማጥ 14:3-4፤ ማር 6:17-18 3:22 ደሞ 22:2፤ ማዘ 2:7፤ ኢሳ 42:1፤ ማጥ 1:17፤ ማር 1:11፤ ሉቅ 9:35

ያሬዲ ማላሊዔላ ናዓ፤ ማላሊዔላ ቃይናና ናዓ፤ 38 ቃይናኒ ሄኖሳ ናዓ፤ ሄኖሲ ሴቲ ናዓ፤ ሴቲ ኣዳማ ናዓ፤ ኣዳሚ ያሳ ናዓ።

4

ዩሱሳው ሺቄዳ ዓላሂያ ፓጪያ
(4:1-13፤ ማጉ 4:1-11፤ ማር 1:12፤ 13)

1 ዩሱሲ ጌሻ ኣያናን ኩሚዳ ዮርዳኖሳ ሻፋፔ ሲሜዳ፤ ኣያናን ሚላ ሳዓ ካሌሴቲዳ ቤዳ። 2 ሄዋን ኣይታሙ ጋላሳ ደቢሎሳን ፓጩቲዳ። ሄ ጋላሳቱዋን ኣያኔ ሚቤና ዲራው ወርሴላ ፖሉዋ ሄራን ኢ ኮሻቲዳ።

3 ደቢሎሲካ፡ «ኔኒ ያሳ ናዓ ጊዶፔ ሃ ሹቻ፡ (ኡኪላ ጊዳ) ጋዴ ኣዛዛ» ያጌዳ።

4 ዩሱሲካ፡ « (ኣሳይ ያሳ ቃላ ኡባፔ ኣቲን ኡኪላ ዓላላን ዴዔና) ጌቲቲ ያሳ ቃላን ዓፊቲዳ» ያጊ ዛሬዳ።

5 ደቢሎሲካ ጶቃ ጊዳዳ ዴሪያ ዩሱሳ ኬሲዴ ኣላሚያ ካወቲላ ኡባ ሊጶ ኣይፊ ሰማናው ቤሴዳ። 6 ደቢሎሲካ፡ «ሃ ካወቲላ ማታይኔ ቦንቹ ኡባይ ታው ኣሚቲዳ። ታኒ ታ ደሲያ ኦሲኔ ኣሚና፤ ኔወካ ኣሚና። 7 ሄዋ ጊዲያ ዲራው፡ ኔ ታ ሲንላን ታው ጎዩኖፔ ሃ ኡባይ ኔሳ ጊዳናዋ» ያጌዳ።

8 ዩሱሲካ ዛሬዳ፡ « (ሳዳ ያሳው ጎዩና፡ ኣ ዓላላ ጎዳያ) ጌቲቲ ያሳ ቃላን ዓፊቲዳ» ያጌዳ።

9-11 ደቢሎሲካ ዩሱሳ ዩሩሳላሚ ኣፊዴ ጌሻ ጎሊያ ሁጲያ ኬሲዴ፡

« (ያሳይ ኔና ናጋና ማላ

ኪታንቻቱዋ ኪታናዋ፡

ኡንቲንቲካ ኔ ጌዲ ሹቻን ቆቤቲና ማላ

ባሬንቲ ኩሺያን ኔና ዴንላናዋንታ)

ያጌቲዴ ጌሻ ማዓፋን ዓፊቲዳ፤

ኣኔ ኔኒ ያሳ ናዓ ጊዶፔ

ሃዋፔ ዲጌ ኔና ኦላ»

ያጌዳ።

12 ዩሱሲካ ዛሬዳ፡ « (ኔ ጎዳ ያሳ ፓጩፓ) ጌቲቲዳ» ያጌዳ።

13 ደቢሎሲካ ፓጪያ ኡባ ወርሶዋፔ ጉዬ ጉላ ዋዴው ዩሱሳፔ ሻኬቲዳ።

ዩሱሲ ጋሊላን ኦሱዋ ደሜዳ
(ማጥ 4:12-17፤ ማር 1:14፤ 15)

14 ዩሱሲካ ኢየና ዋልቃን ጋሊላ ጋዲያ ሲሜዳ። ኣ ዋሪካ የሹዋን ዳዒያ ኡባ ጋኬዳ። 15 ዩሱሲካ ኣዪሁዳቱዋ ዋሳ ጎሊያን ታማሪሲዳ ኣሳን ኡባን ጋላቴቲዳ።

ናዚሬቴን ዩሱሳ ኢጄዲኖ
(ማጥ 13:53-58፤ ማር 6:1-6)

16 ኢ ባሬ ዲጮ ካታማ ናዚሬቴ ዩዳ፤ ካሴ ኦሊያዋዳንካ ሳምባታ ጋላሲ ኣዪሁዳቱዋ ዋሳ ጎሌ ጌሊዳ ናባባናው ዳንዲዳ ኤቄዳ። 17-19 ናቢያ ኢሲያሳን ፃፊቲዳ ፃፃቴዳ ማፃፋ ኣው ኢሜዲኖ። ሄ ማፃፋ ቢሊዳ።

«ታኒ ሂዩሳቱዋሲ ሚሺራቹዋ ኦዳናው ኦኬቴዳ ዲራው ጎዳ ኢያናይ ታ ቦላን ዳዔ።

ቃሽቴዳዋንቱሲ ቢሌላ፡
ቆቃቱዋሲ ፃላና ማላ ኦዳናው፡
ቃይካ ናቄቴዳዋንታ ናቁዋፔ
ኬሳና ማላ ደሴቴዳ ጎዳ ላይላ
ኦዳና ማላ፡ ታና ኪቴዳ»

ጌቴቲ ፃፊቴዳሳ ዳሜዳ።

20 ማፃፋካ ፃፃዳ ኣዪሁዳቱዋ ዋሳ ጎሊያን ኦሊያዋ ኢሚዳ ኡቴዳ። ኣዪሁዳቱዋ ዋሳ ጎሊያን ዳዒያ ኣሳይ ኡባይ ኣ ጫዲ ፃሌዳ። 21 ዩሱሲካ፡ «ሃቹ ሂንቴው ናባቤቲና ሂንቴንቱ ሲሴዳ ቃላይ ፖሌቴዳ» ያጌዳ።

22 ኡባይ ኣው ማርካቴዲኖ። ኣ ዶናፔ ኬሲያ ኣቶ ኬካቴላ ቃላፔ ዳንዳዳዋን ማላሌቲዳ፡ «ሃዌ የሴፎ ናባ ጊዳኔ?» ጌዲኖ።

23 ዩሱሲካ ሲዴ ባንታን ሃ ለሚሱዋን፡ «ሂንቴንቱ ታው ሓሊያ ጎዳው፡ ኔ ሁጲያ ፓላ፡ ኔኒ ቂፊሪናሆማን ኦሊና ኦ ሲሰዋ ኡባ ሃ ኔ ካታማኒካ ቃሲ ኦላ) ያጊዳ ኦዲታ» ያጌዳ። 24 ቃሲካ፡ «ቱሙዋ ያጋይ፡ ናቢ ባሬ ዩሌቶ ጋዲያን ጋማካ ቦንቹቴና።

25 «ዩዉዋን ቃሲ ቱሙዋ ኦዳይ፡ ኤላሳ ዋዲያን ሄዙ ላይላኔ ኡሱቸን ኣኔና ኢራይ ቡኬናን ኢደና ሳባ ኡባን ዋልቃማ ኮሻይ ጌሌዳ ዋዳ፡ ኢሰራዔልን ጮራ ኣምባቱ ዳዒኖ።

26 ኤላሲካ ሲዶና ጋዲያን ዳዒያ ሴራፍታ ሄራ ኢቲ ኣምባቲኮ ኪቴቴዳፔ ኣቲን ኦኮኔ ኪቴቴ ቤና። 27 ናቢያ ኤልሳባ ዋዲያንካ

ኢስራዔሊያን ጮራ ኦሎዋ ሃርጊያን * ኦይቄቴዳዋንቱ ዳዒኖ፤ ሶሪያ ቢታን ዳዒያ ኒዒማኔፔ ኣቲን ኡንቱንቱፔ ኦኒኔ ፓዒ ቤና» ያጌዳ።

28 ኣዪሁዳቱዋ ዋሳ ጎሊያን ዳዒያዋንቱ ኡባቱ ሃዋ ሲሲዴ ዳሪሲዴ ሃንቄቴዳኖ። 29 ኡንቱንቱ ዳንዲዴ ዩሱሳ ካታማፔ ጋፃ ኬሲዴ ዱጌ ኦላናው ካታማይ ኬፃቴዳ ዳሪያ ሁጲያ ኣፌዲኖ።

30 ሺን ዩሱሲ ኡንቱንቱ ጊዱዋና ኣጂዴ ቤዳ።

ኢታ ኣያናይ ኦይቄዳ ቢታኒያ (4:31-37፤ ማር 1:21-28)

31 ሄዋፔ ጉዪያን ዩሱሲ ጋሊላ ጋዲያን ዳዒያ ቁፊሪናሆማ ካታማ ቤዳ። ሳሞባታ ጋላሳንካ ኣሳ ታማሪሴዳ። 32 ኢ ታማሪሴያ ቲማርቲ ማታን ጊዲያ ዲራው ሲሴዳ ኣሳይ ኡባይ ማላሉቲዲኖ።

33 ኣዪሁዳቱዋ ዋሳ ጎሊያን ኢታ ኣያናይ ኦይቄዳ ቢታኒ ዳዒ፤ ባሬ ኮሻ ጶቄ ኡዲ ዋሲዳ። 34 «ሃያ ጎዶ ኣጋሪኪ ናዚሬቲያ ዩሱሳ፤ ኩሲ ኔናና ኣይ ኢቲፔቴላይ ዳዒ? ኦና ባዩዛናው ያዲ? ኔኒ ኦኔንቶ ኤራዲ፤ ኔኒ ያሳ ኣዉ ኪቲዳ ጌሻ ጊዲኪ!» ያጌዳ።

35 ዩሱሲካ፡ «ጮፀ ጋ፡ ኣፔካ ኬሳ» ያጌ ሴሬዳ። ኢታ ኣያናይ ቢታኒያ ኡንቱንቱ ጊዱዋን ኩንዲሲዴ ኣይኔ ቆሃናን ኣፔ ኬሴዳ።

36 ኣሳይ ኡባይ ማላሉቲዳ ኢቲ ኢቶ፡ «ሃዌ ኣያ ቃሌ? ባሬው ዳዒያ ማታኒይ ዋልቃን ኢታ ኣያናቱዋ ሴሬ፤ ቃሲ ኢታ ኣያናይካ ኬሴ» ያጌዴ ሃሳዩዲኖ። 37 ኣ ዋሪካ ሄ ዩሹዋን ዳዒያ ጋዲያ ኡባ ጋኬዳ።

ዩሱሲ ጮራ ሃርጋንቻ ኣሳ ፓሌዳ (ማት 8:14-17፤ ማር 1:29-34)

38 ዩሱሲ ኣዪሁዳቱዋ ዋሳ ጎሊያፔ ዳንዲዴ ሲሞና ጎሊያ ጌሌዳ፤ ሲሞና ቦሎታታ ዋልቃማ ቆፀዋ ሃርጊያን ሃርጌታዳ ጊሴዳዉኒው ዩሱሲ ኢዞ ፓላናዳን ኣሳይ ኣ ዋሴዳ። 39 ኢ ማታን ኤቄዳ ቆፀዋ ሃርጊያ ሴሪና፡ ሃርጊ ዩዲሹዳ፤ ሄዋዲያንካ ዳንዲዴ ኡንቱንቶ ኪቲታዲ።

40 ኣዋይ ዉሎ ዋዲያን ዲማ ዲማ ሃርጊያን ኦይቄቴዳ ሃርጋንቻቱዋ ኡባ ኣኮ ኣሄዲኖ፤ ኢካ ኢቲዋ ኢቲዋ ቦላ ባሬ ኩሺያ ዋሊዳ ፓሌዳ። 41 ኢታ ኣያናቱካ፡ «ኔኒ ኪሪሰቶሳ ያሳ

* 4:27 ኦሎዋ ሃርጊያ፡ ያሳ ቃላይ ታማሪሴቲያ ዋዲያ ኡባን፡ «ኦሎዋ» ጊያ ቃላይ ጋልባ ቦላን ሳኪያ ሳኩዋ ኡባሲ ኣኩቲያዋ። 4:27 2ካት 5:1-14 4:32 ማት 7:28፣ 29

ናዓ» ያገ ሞሲዴ ጮራ አሳፔ ኬሴዲኖ። ኢ ኪሪስቶስ ገደዎ ኡንቱንቱ ኤሬዳ ዲራው ሃሳዬና ማላ ዲጌዳ።

ዩሱሲ ጋሊላን ታማሪሴዳ
(ማት 4:23-25፤ ማር 1:35-39)

42 ሳዓይ ዎንቶ ዎዴ አሳይ ባይናሳ ቤዳ፤ አሳይ ኡባይ አ ኮዪዴ ኢ ዴዒያሳ ዩዲኖ። ባሬንቱፔ ሻኬቲ ቤናዳን ዲጋናው ኮዩዲኖ። 43 ኢ ቃይ፡ «ሂኒ ሃራ ካታማቱዋሲ ባዴ ያሳ ካወቱላ ሚሺራቸዋ ቃላ ኦዳናው ኮሼ፤ ታኒ ኪቱቱዳዌ ሃዋ ዲራሳ» ያጌዳ።

44 ጋሊላን ዴዒያ አዩሁዳቱዋ ዎሳ ጎሌን ቃላ ታማሪሴዴ ጋማዒዳ።

5

ዩሱሲ ኮይር ባሬና ካሊያዎንታ ደሬዳ
(ማት 4:18-22፤ ማር 1:16-20)

1 ኢቲ ጋላሲ ዩሱሲ ገንሳሬፄ አባ * ጋፃን ኤቂዴ ዴዒሺን ጮራ አሳይ አኮ ሺቂዴ ያሳ ቃላ ሲሳናው ሱጌቲ ዴዒኖ። 2 ሄ ዎዴ ላዑ ዎንገራቱ † አባ ጋፃን ኤቆዋ ኢ ቤዔዳ፤ ሞሊያ ጲሪያዎንቱ ቃሲ ዎንገራቱዋፔ ዎዲዴ ባሬንቱ ዳባ ሜጪ ዴዒኖ። 3 ዩሱሲ ዎንገራቱዋ ገደፔ ሲሞናዉኖ ገዴዳዉኒኒ ጌሊዴ ሳዓፔ ያ አባኮ ጉላ ሺሻናዳን ኦቹዳ። ሄዋፔ ጉዬ ዎንገሪያ ቦላን ኡቲዴ አሳ ታማሪሱዋ ደሚዳ።

4 ታማሪሱዋ ቤሶዋፔ ጉዩያን ሲሞና፡ «ዎንገሪያ ያ አባ ጪሙዋኮ ሺሺቲ፤ ሂንቱንቱ ዳባካ ሞሊያ ጲራናው ኦሊቱ» ያጌዳ።

5 ሲሞኒካ፡ «ጎዳው፡ ቃማ ኩሜንላ ዳቡሪ አቂዴ አዩኔካ ኦዩቂቤይኮ፤ ሺን ሃዒ ኔኒ ጎዋዳን ዳባ ኦሌቶ» ያገ ዛሬዳ።

6 ሄዎዳንካ ኦሌዳ ዎዴ፡ ዳር ጮራ ሞሊያ ኦይቂዲኖ። ኡንቱንቱ ዳባቱካ ዴፄሬታናው ሃኔዲኖ። 7 ሃራ ዎንገሪያን ዴዒያ ሳጌላቱ ዩዴ ማዳናን ወቱዲኖ፤ ኡንቱንቱ ላዑ ዎንገራቱዋንካ ሞሊያ ኩንሊና ዎንገራቱ ሚቱቱሳ ደሚዲኖ።

* 5:1 ገንሳሬፄ አባ፡ ጋሊላ አባሲ አሜቲዳ ዳማ ሱንላ። 5:1 ማት 13:1፣ 2፤ ማር 3:9፣ 10፤ 4:1 † 5:2 ዎንገሪያ፡ ዎንገሪያ ጌቱቶዌ፡ ዎጋ ሃላ ዎይ አባ ቦላን አሳይ ሄፊንላ ባጋ ፐናናው ጎዔቲያ ሚሻ። ሃይቆ አሳይ ሞጌቲያዎ ገዴናዎ ኤራናው ኮሼ። 5:5 ዮሀ 21:3 5:6 ዮሀ 21:6

8 ሲሞኒ ጳጳርሲካ ሃዋ ቤዔዳ ዎዴ ዩሱሳ ጉልባታን ኩንዲዴ፡ «ጎዳው፡ ታኒ ናጋሪንቻ ኣሳ ጊዶ ዲራው ታፔ ሻኬታ» ያጌዳ።
 9 ሃዋ ጌዳዌ ኢኔ ኣናና ኢቲፔ ዴዒያዎንቱ ኡባይ ባሬንቱ ኦይቄዳ ሞሊያ ጮራቴላን ማላሌቴዲኖ። 10 ሃዋዳንካ ቃይ ሲሞና ላጌላ ጊዴዳዎንቱ ዛቢዲዮሳ ናናቱ ያዩቆቢኔ ዮሃኒሲ ማላሌቴዲኖ።

ዩሱሲካ ሲሞና፡ «ያዮፓ ሃዋፔ ጉዩያን ኣሳ ጲሪያዎ ጊዳናሳ» ጌዳ።

11 ኡንቱንቱካ ዎንጊራቱዎ ሃላፔ ጋፃ ኬሲዴ፡ ኡባባ ኣጊዴ ዩሱሳ ካሌዲኖ።

ዩሱሲ ኦሎ ኦይቄዳ ቢታኒያ ፓሌዳ
 (ማጥ 8:1-4፤ ማር 1:40-45)

12 ዩሱሲ ካታማቱዎፔ ኢቱዎን ዴዒሺን ኦሎ † ቦላ ኡባ ማዳ ቢታኒ ዴዒያዌ ዩሱሳ ቤዒዴ ኣ ሲንሳንካ ኩንዲዴ፡ «ጎዳው፡ ኔኒ ኮዮፔ ታና ፓላናው ዳንዲያ» ያጊዴ ዎሴዳ።

13 ዩሱሲካ ባሬ ኩሺያ ዩዲ ቦቹዴ፡ «ዶሳይ ጌያ!» ጌዳ። ሃምንዲያንካ ኦሎ ኣ ዩዴዳ።

14 ዩሱሲ ኣ፡ «ሃዎ ኦሲኔ ኦዶፓ። ሺን ቄሳኮ ባዴ ኔና ቤሳ። ሃዎፔ ጉዩ ኦሎዎ ሃርጊያፔ ፓፂዳዎሲ ማርካ ጊዳናዳን ሙሴ ሂጊያን ኣዛዜቴዳ ያርሹዎ ሺሻ» ጌዳ።

15 ጊዶሺን ኣ ዋሪ ሎይሌ ኣኪዴ ቤዳ፤ ዳር ጮራ ኣሳይካ ዩሱሲ ኦዲያዎ ሲሳናውኔ ባሬንቱ ሃርጊያፔ ፓፃናው ሺቄዲኖ።
 16 ዩሱሲ ጮራ ዎዴ ጌማሳ ቢዴ ዎሴ።

ዩሱሲ ቦላይ ሲሌዳ ቢታኒያ ፓሌዳ
 (5:18-26፤ ማጥ 9:2-8፤ ማር 2:3-12)

17 ኢቲ ጋላሲ ዩሱሲ ታማሪሲዴ ዴዒሺን ጋሊላፔኔ ዪሁዳ ሄራ ኡባፔ፡ ዩሩሳላሜ ዩዳ ፓሪሳዎቱኔ ሂጊያ ታማሪሲያዎንቱ ኡቲ ዴዒሺን ሃርጋንቻቱዎ ፓላና ማላ ያሳ ኣዉዎ ዎልቃይ ኣው ኢማቴዳ። 18 ሄ ዎዴ ቦላይ ሲሌዳ § ኢቲ ቢታኒያ ኣማራዳ ኣሳይ ሻንቻማን ቶኪ ኣሂ ጎሌ ጌልሲዴ ዩሱሳ ሲንሳን ዎላናው ኮዩዲኖ። 19 ኣሳ ጮራቴላፔ ዴንዴዳዎን ዩሱሳኮ ሺቃናው

† 5:12 ኦሎዎ: 4:27 ጻሊቴ። § 5:18 ቦላይ ሲሌዳ: ሃዎ ጉሳይ ግሪኬ ቃላን «ፓራሎሞሳይ» ጌተቲያዎ። ሃ ቃላ ቢሌሳይ ኢንጊሊዜሉዎን «ፓራላዩዚድ» ጉሳ። ሃ ላዓቱዎካ ዳዉርሉዎን ቢሌላ ኣሞዴ፡ ኬቹዳዎ ዎይ ቃፃና ማላ ዳቡራዳዎ ጉሳ።

ዳንዳዬ ቤይኪኖ። ሄዋ ዲራው ቦላው ገቢ ጎሊያ ካራ * ቃሪዳ ኣ፥ ሻንቻማና ኣሳ ገደን ዩሱሳ ሲንሳን ዋሌዲኖ።

20 ዩሱሲካ ኡንቱንቱ ኣማኑዋ ቤዒዳ፥ «ሃ ቢታኔው፥ ኔ ናጋሪይ ኣቶ ጌቲቲዳ» ያጌዳ።

21 ሙሴ ሂጊያ ታማሪሲያዋንቱኔ ፓሪሳዋቱ፥ «ሃዌ ያሳ ቦሪያዌ ኣኔ? ኣቲ ያሳፔ ኣቲን ናጋራ ኣቶ ጋናው ኦኒ ዳንዳዬ?» ያጌ ቆፋ ደሜዲኖ።

22 ዩሱሲካ ኡንቱንቱ ቆፋ ኤሮ ዲራው ሃዋዳን ጌዳ፥ «ኣዩሲ ሂንቲንቱ ዋዛናን ሃዋዳን ቆፒቲ? 23 ኔ ናጋሪይ ኣቶ ጌቲቲዳ ጋናዋፔ ኔ ዳንዳዬ ባ፥ ጋናዋፔ ሃቃዌ ማቲ? 24 ዩዉዋን ቃሲ ሃዋ ታኒ ጌዳዌ፥ ኣሳ ናዓይ ቢታ ቦላን ናጋራ ማራናው ማታይ ዴዒያዋ ሂንቲንቱ ኤራናዳና።» ሄዋፔካ ጉንዴዳ ቢታኒያ፥ «ዳንዳ ኔ ሻንቻማ ቶካዳ ኔ ጎሌ ባ ጋይ» ያጌዳ።

25 ጉንዳይካ ኣሳ ሲንሳን ዴንደዋሺን ባሬ ሻንቻማ ቶኪዴ ያሳ ጋላቲዳ ባሬ ሶይ ቤዳ። 26 ሃ ዎዴ ኡባቲካ ዳሪ ማላሌቲዲኖ፤ ያሳካ ጋላቲዳ፥ «ሃቹ ማላባ ቤዔደ» ያጌዳ ያሻን ኩሜዲኖ።

ዩሱሲ ለዊያ ደሬዳ

(5:27-32፤ ማት 9:9-13፤ ማር 2:13-17)

27 ሄዋፔ ጉዩያን ዩሱሲ ኬሲዳ ቤዳ፤ ለዊያ ጌቲቲያ ቃራፃ ሺሺያዌ፥ ቃራፃ ሺሺያሳን ኡቶዋ ቤዒዳ፥ «ታና ካላ» ጌዳ። 28 ኢካ ዴንዲዴ ኡባባ ኣጊዴ ኣ ካሌዳ።

29 ሄዋፔ ሲሚዴ ለዊ ባሬ ጎሌን ዳሮ ሸቢያ ገጊሴዳ፤ ጮራ ቃራፃ ሺሺያዋንቱኔ ሃራ ጮራ ኣሳይካ ኡንቱንቱና ኡቲዳ ሚዳዒኖ። 30 ፓሪሳዋቱኔ ሂጊያ ታማሪሲያ፥ ኡንቱንቱና ኦሊያዋንቱ፥ ዩሱሳ ካሊያዋንቱ ቦላን፥ «ኣዩሲ ቃራፃ ቃንዲያዋንቱናኔ ናጋራንቻቱዋና ሚቲኔ ኡሺቲ?» ያጌዳ ዙዙሜዲኖ።

31 ዩሱሲካ፥ «ሃርጋንቻ ኣሳፔ ኣቲን ፓፃ ኣሳሲ ኣኪሚያ ኮሸና። 32 ታኒ ዩዳዌ፥ ናጋራንቻቱ ባሬንቲ ናጋራ ፓዲዳ ሲማናዳናፔ ኣቲን፥ ዊላቲዋ ዌሳናው ያቤይኬ» ያጌ ዛሬዳ።

ዩሱሲ ያማባ ኣሽቴዳ

(5:33-39፤ ማት 9:14-17፤ ማር 2:18-22)

* 5:19 ካራ፥ ሃ ፓይዲዋን ጌቲቲዳ ጎሊያ ካራይ ዳዉርዋ ማላ ገደናዳን፥ ፓሌሰቲኔ ጋዴን ጎሊያ ቦላን ዴዒያ ካራይ ጌዴ ቁሬቲዳ ከዌቲ። ሄዋ ያቲዳ ቃይ ዲፊቲዳ ጋፃን ጋፃን ሃራ ሚላይ ቲጩቲና ሎይላ ከዌቲ። ሄዋ ማላ ከዓይ ኦራላ ቃላ ጫቁዋ ዎዲያን ኤሬቲዳዋ። 5:30 ሉቅ 15:1፣ 2

33 ሃዋጥ ጉዩያን ዩሱሳ፡ «የሃኒሳ ካሊያዋንቱኑ ፓሪሳዎቹዋ ካሊያዋንቱ ኡባ ዎዴ የሚኖኔ ዎሲኖ፤ ሺን ኔና ካሊያዋንቱ ቃሲ ኡባ ጋላሲ ሚኖኔ ኡሺኖ» ያጊዴ ኦቹዲኖ።

34 ዩሱሲካ፡ «ሚሺራይ ኡንቱንቱና ዴቢሺን ሚያታቱ የማናው ዳንዳዩኖ? 35 ዩዉዋን ቃሲ ሚሺራይ ኡንቱንቱ፤ ሻኬቲዴ ባና ዎዲ ያናዎ፤ ሄ ዎዴ የማናዋንታ» ያጊ ዛሬዳ።

36 ዩሱሲካ ካሊያ ሌሚሱዋ ኦዴዳ፡ «ኦራሳ ማዩዋ፤ ፔዲ ኣኪዴ ኤጫ ማዩዋ ቦላን ዴፒያዌ ባዎ፤ ጋሱካ ሃዋዳ ኡደፔ ኦራሳ ማዩዋ ፔዴ፤ ኦራሳ ዴፊካ ኤጫ ማዩዋን ጊጌና። 37 ሃዋዳንካ ኤጩዳ ጨልጊያን † ኦራሳ ዎዩኒያ ኤሳ ዎሊያዌ ባዎ፤ ዎሶፔ ቃይ ኦራሳ ዎዩኒያ ኤሳይ ጨልጊያ ዱሴ፤ ኤሳይካ ጉኩ፤ ጨልጋዩካ ባዩ። 38 ኦራሳ ዎዩኒያ ኤሳ፡ ኦራሳ ጨልጊያን ዎላናው ቤሴ። 39 ኤጫ ዎዩኒያ ኤሳ ኡሺዴ ኦራሳ ኮዩያዌ ኦኒኔ ባዎ፤ ጋሱካ ኤጫይ ማልዴ ጊያ ዲራው።»

6

ዩሱሳ ካሊያዋንቱ ሳምባታን ቲሻ ዲሌዲኖ
(ማት 12:1-8፤ ማር 2:23-28)

1 ሳምባታ ጋላሲ ዩሱሲ ባሬና ካሊያዋንቱና ኢቲፔ ኢቲ ሳሻ ጊዲዎና ኣዲያ ዎዴ ኣ ካሊያዋንቱ ዛርጋፔ ቲሻ ዲሌዴ ባሬንቱ ኩሺያን ሺጌቹዴ ሙሳ ደሚዲኖ። 2 ፓሪሳዎቹዋ ጊደፔ፡ «ሳምባታ ጋላሳን ኦላናው ዎጋ ጊዴናዎ ኣያው ኦሊቱ?» ያጌዲኖ።

3 ዩሱሲ፡ «ካቲያ ዳዊቲኔ ኢቲፔ ዴቢያዋንቱ ኮሻቲዳ ዎዴ ኦሌዳዎ ናባቢ ቤይኪቲ? 4 ዳዊቲ ያሳ ጎሊያ ጌሊዴ ቄሳቲዋ፤ ኢቲን ሃራ ኣሳይ ማናዳን ዲጌቲዳ፡ ያሳው ያርሼቲዳ ቁማ ማዳ። ኢቲፔ ዴቢያዋንቱካ ኢ ኢሚናዴ ማዲኖ» ያጊ ዛሬዳ።

5 ሃዋጥ ካሊዴ ዩሱሲ፡ «ኣሳ ናባይ ሳምባታው ጎዳ!» ጌዳ።

ዩሱሲ ኩሺ ጉንዴዳ ቢታኒያ ፓሌዳ
(ማት 12:9-14፤ ማር 3:1-6)

6 ሃራ ሳምባታ ጋላሳን ዩሱሲ ኣዩሁዳቲዋ ዎሲያ ጎሊያ ጌሊዴ ታማሪሲ ዴዴ። ሄዋንካ ኡሺቻ ኩሺ ሲሌዳ ቢታኒ ዴዴ። 7 ሂጊያ ታማርሲያዋንቱኑ ፓሪሳዎቹ ዩሱሳ ሞቲያ ጋሱዋ ዴማናው ኢ ሳምባታን ኣሳ ፓሶፔ ቤዓና ጊዴ ናጊ ዴዲኖ። 8 ኢካ ኡንቱንቱ

† 5:37 ጨልጊያ፡ ሃዎ ዳዉርሱዋን ኢሜቲያ ጉጃ ቢሌላይ ኤሳ ናባይ ኦሳዲዎ።
6:4 ዎግ 24:9

ቆፋ ኤሪዳ ኩሺ ሲሌዳ ቢታኒያ፡ «ዴንዳ አሳ ጊዲዋን ኤቃ» ያጌዳ። ቢታኒካ ዴንዲ ኤቆዳ።

9 ሃዋፔ ሰሚዳ ዩሱሲ፡ «ሃኒንቶኔ ሳምባታ ጋላሳን ሎያባ ኦላናው ቤሲዬ ኢታባ ኦላናው ቤሲ? ሸምፑዋ አሻናው ቤሲዬ ዋቆናው ቤሲ?» ያጌዳ። 10 ዩሱሲ ባሬ ዩሹዋን ዴዲያ አሳ ኡባ ጭሎዋፔ ጉዩያን ቢታኒያ፡ «ኔ ኩሺያ ሚጫ!» ያጌዳ። ኢካ ሚጫዳ ፓዌዳ።

11 ኡንቱንቱ ሎይሊ ሃንቄቲዳ ዩሱሳ ቦላ ኦላናዋ ባሬንቱ ጊድን ማቄቲዲኖ።

ዩሱሲ ታማኔ ላዑ ኪቲቲዳዋንታ ዶሬዳ

(ማት 10:1-4፤ ማር 3:13-19)

12 ሄ ዋዲያን ዩሱሲ ዴሪያ ቦላ ዋሳናው ኬሴዳ፤ ሄዋንካ ቃማ ኩሚንሳ ያሳኮ ዋሲዳ አቆዳ። 13 ሳዓይ ዋንቶዋን ባሬና ካሊያዋንታ ጭሴዳ። ሄዋንቱፔካ ታማኔ ላዓቱዋ ዶሪዳ፡

«ኪቲቲዳዋንታ» * ያጌዳ ሱንጮዳ። 14 ኡንቱንቱ ሱንላይካ፡ ጳደርሳ ጊዴ ኢ ሱንጮዳ ሲሞና፡ አ ኢሻ ኢንዲራሳ፡ ያዩቆባ፡ ዮሃንሳ፡ ፒሊጶሳኔ ባርታላሞሳ፡ 15 ማቶሳ፡ ቶማሳ፡ ኢልፒዮሳ ናዓ ያዩቆባ፡ ባሬ ጋዴው ሴሌቲያ ሲሞና፡ 16 ያዩቆባ ናዓ ዩሁዳኔ ዩሱሳ አሊ ኢሜዳ አስቆርቱ ዩሁዳ። †

ዩሱሲ ጮራ አሳ ታማሪሴዳኔ ፓጮዳ

(ማት 4:23-25)

17 ዩሱሲካ ኡንቱንቱና ኢቲፔ ዴሪያፔ ዋቋዳ ዴምባሳን ኤቆዳ። አ ካሊያዋንቱፔካ ጮራ አሳይ ሄዋን ዴዔ። ቃይካ አፔ ሲሳናዉኔ ባሬንቱ ሃርጊያፔ ፓፃናው ዩሁዳ ጋዲያፔ፡ ዩሩሳላሚ ካታማፔ፡ አባ ማታን ዴዲያ ጂርሳፔኔ ሲዶናፔ ዩዳ ጮራ አሳይ ሄዋን ዴዲኖ። 18 ሃ አሳይካ አ ሲሳናዉኔ ባሬንቱ ሃርጊያፔ ፓፃናው ዩዲኖ። ቱና አያናን ኦይቄቲዳ ሜቶቲያዋንቱካ ፓዌዲኖ። 19 ዋልቃይ አፔ ኬሲዳ ኡባ ፓሊያ ዲራው አሳይ ኡባይ አ ቦቻናው ኮዬ።

ኢንጂዋባኔ ሜቱዋባ

(ማት 5:1-12)

20 ባሬና ካሊያዋንታ ጭሊዳ ያጌዳ፡

* **6:13** ኪቲቲዳዋንታ፡ ሃዋ ጉሳይ ታማኔ ላዑ ዩሱሲ ኪቲዳ ሃዋራቱዋ ጉሳ።
† **6:16** አስቆርቱ፡ ሃዋ ጉሳይ አዩሁዳ ጋዲያን ዴዲያ አስቆርቱ ጌቲፔያ ጋዲያፔ ዩናን አቴና ጉሳ። ሃ ሱንላ ቢሌላይ፡ «ዋርዳንቻ»። ቃይካ፡ «ሃይቆ አሊ ኢሜያዋ» ጉሳ።

«ሂንቴንቱ ማንቃቱ አንጃቴዳዋንታ፤
አዪሲ ጎፔ፣ ያሳ ካወቴላይ ሂንቴንቱዋ።

21 ሂንቴንቱ ሃዒ ከሻቲያዋንቱ አንጃቴዳዋንታ፤
ጊዲኒ ካላኒታ፤ ሂንቴንቱ ሃዒ ዬኪያዋንቱ
አንጃቴዳዋንታ፤
ጊዲኒ ሚጫኒታ።

22 «አሳ ናዓ ዲራው ሂንቴንታ አሳይ ኢዲያ ዋዴኔ ቶቲያ ዋዴ፥
ሂንቴንቱ ሱንላካ ኢታን ዴንሴያ ዋዴ፥ አንጃቴዲታ። 23 ሳሉዋን
ሂንቴንቱ አካና ዋይታይ ዳራ ጊዲያ ዲራው ሄ ጋላሲ ናሼቻን
ጉፒቲ፤ ጋሱካ ካሴ ሂንቴንቱ አዋቱ ናባቱዋ ቦላን ሃዋዲን ኦሴዴ
ዴዔዲኖ።

24 ዬወዋን ቃሲ ዱሬ አሳቶ
ሂንቴንቶ አዬ፤ ሂንቴንቱ አሻሎ ዴዑዋን ዴዔዲታ።

25 ሂንቴንቶ ሃዒ ካሌዳዋንቶ አዬ፤
ጊዲኒ ከሻታኒታ፤

ሂንቴንቶ ሃዒ ሚጫያዋንቶ አዬ፤
ጊዲኒ ካዮታኒታኔ ዬካኒታ።

26 አሳይ ኡባይ ሂንቴንቱ ሎዖቴላባ ሃሳዪያ ዋዴ፥
ሂንቴንቶ አዬ፤
ካሴ ሂንቴንቱ አዋቱ ዋርዶ ናባቶ
ሃዋዲን ኦሴዲኖ።

ዋርኪያ ሲቃናው ቤሴ
(ማት 5:38-48፤ 7:12)

27 «ሺን ታኒ ኦዲያዋ ሲሲያዋንቶ ያጋይ፥ ሂንቴንቱ ዋርኪቱዋ
ዶሲቲ፤ ሂንቴና ኢዲያዋንቶ፥ ሎዑዋ ኦሴቲ፤ 28 ሂንቴና
ሹቋያዋንታ አንጃቴ፥ ሂንቴና ናቋያዋንቶ፥ ዋሲቲ። 29 ኢቲ ባጋ
ሻዪያ ባቋያዋ፥ ላዔሉዋካ ቤሳ፤ ኦኒኔ ኔ ኮቲያ አኪያዋ፥ ኔ
ሻሚጫያካ ዲጎፓ።

30 «ኔው ዴዒያዋ ኔና ዋሲያዋ፥ ኢማ፤ ኔዋ አኬዳዋ፥ ዛራ
ጋዴ ኦቾፓ። 31 አሳይ ሂንቴንቶ ኦላና ማላ ሂንቴንቱ ዶሲያዋዲን፥
ሂንቴንቱካ ሃራው ሃዋዲን ኦሴቲ።

32 «ሂንቴንታ ዶሲያዋንታ ፃላላ ዶሶፔ አይ ጋላታይ ዴዒ?
ሃዋ ጊዶፔ ናጋራንቻቱካ ባሬና ዶሲያዋንታ ዶሲኖ። 33 ሂንቴንቶ
ሎዖባ ኦሴያዋንቱ ፃላላው ሂንቴንቱ ሎዖባ ኦሶፔ ሄዎ አይ
ጋላታይ ዴዒ? ናጋራንቻቱካ ሃዋዲን ኦሴኖ። 34 ታልዒዴ ሂንቴው
ዛራናው ዳንዳዪያዋንቱ ፃላላው ታልዖፔ አይ ጋላታይ ዴዒ? ባሬ
ታልዔዳዋ ዛሬዴ አካናው ናጋራንቻቱካ ባሬንቱ ጋርሳን ታልዔቲኖ።

35 ሺን ሂንቴንቱ፣ ሂንቴንቱ ሞርኪያ ደሴቱ፤ ኡንቴንቶካ ሎቦባ ኦሊቲ፤ ሂንቴንቱ፣ ታልቦባ ዛሪዲ ኣካናው ቆፖፒቲ። ሃዋ ሂንቴንቱ ፖሎፕ ሂንቴንቶ ጋቲ ዳራናዎ። ቃሲ ሂንቴንቱ ኡባፕ ቦላ ያሳ ናና ጊዳኒታ። ኢ ኢታቶኔ ጋላቴናዎንቶካ ከካ። 36 ሂንቴንቱ ኣቡ ማሪያዎ ጊደዎዳን ሂንቴንቱካ ማሪያዎንታ ጊዳቲ።

ሃራ ኣሳ ፒርዳናው ቤሴና (ማት 7:1-5)

37 «ኦ ቦላንካ ፒርዳፒቲ፣ ሂንቴንቱ ቦላንካ ፒርዳቴና፤ ሃራ ቦላ ኩናኒያ ኦሎፒቲ፤ ሂንቴንቱ ቦላንካ ኩናኒ ኦሴቴና። ኣቶ ጊቲ፤ ያሳይ ሂንቴንቶ ኣቶ ጋና። 38 ኢሚቲ፤ ሂንቴንቶ ኢሚታና። ሂንቴንቱ ማኬዳ ማካን ሂንቴንቶ ማኬታና። ባቂ ናቂና ሲሊ ኩሚ ፓላህ ላሌቲያ ማካ ሂንቴንቱ ከዉዋን ኢዲንሳና» ጌዳ።

39 ቃሲካ ዬሱሲ ሃዋፕ ካሊያ ለሚሱዋ ኦዴዳ፤ «ቆቃይ ቆቃ ካሌላናው ዳንዳዪ? ቆቃይ ቆቃ ካሌላፕ ላባቲካ ኦይቂቲዳ ኦላን ኩንዲኪና? 40 ታማሪያዌ ባሬና ታማሪሲያዎፕ ኢዴና፤ ታማሪያዌ ሚኒ ታማሮፕ ባሬና ታማሪሶዋ ማላ ጊዳናው ዳንዳዪ።

41 «ኔ ኣይፊያ ጊደን ዳዲያ ሱላ ኣያው ያላይ? 42 ኔ ኣይፊያ ጋርሳን ዳዲያ ቱሳ ቤዔናን ሃራ ኣሳኩ ሺቃዴ፣ ተ ኢሻው፣ ኔ ኣይፊያ ጋርሳፕ ሱላ ታ ኬሶ?» ያጋናው ዎታ ዳንዳይ? ሃ ሎዑዋ ማላቲያ ኢታው፣ ኮይሮታዴ ኔ ኣይፊያ ጊደን ዳዲያ ቱሳ ኬሳ። ሄዋፕ ጉዪያን ኔ ኢሻ ኣይፊያ ጊደን ዳዲያ ሱላ ኬሳናው ጌሻዴ ያላናው ዳንዳይ።

ሚላቶኔ ኢዛ ኣይፊዳ ኣይፊያ (ማት 7:16-20፤ 12:33-35)

43 «ሎዎ ሚላይ ኢታ ኣይፊያ ኣይፊና፤ ሄዋዳንካ ኢታ ሚላይ ሎዎ ኣይፊያ ኣይፋናው ዳንዳይና። 44 ሚላይ ኡባይ ባሬ ኣይፊያ ኣይፊያዎን ኤሬቴ፣ ኣፕንላፕ ዎዴንላ ኣይፊ ማፀቴና፤ ሃዋዳንካ፣ ፀንዲቂያፕ ፥ ላዲያ ኣይፊያ ማፃናው ዳንዳይና። 45 ሎዎ ኣሳይ ባሬ ሎዎ ዎዛናፕ ሎዎ ዬዉዋ ሃሳዬ። ቃይ ኢታ ኣሳይ ባሬ ኢታ ዎዛናፕ ኢታ ዬዉዋ ሃሳዬ። ኣዪሲ ጎፕ፣ ኣሳይ ባሬ ዶናን ሃሳዪያዌ ባሬ ዎዛናን ኩሚዳዎ ዶናይ ሃሳዪያ ዲራሳ።

ላዑ ቆዋ ጎሊያ ኬዲያ ኣሳ (ማት 7:24-27)

6:39 ማት 15:14 ፥ 6:44 ፀንዲቂያ፣ ሃ ሚላይ ጎሚሪያ ዛሪያ ጊዳዴ ኣ ኣዪደ ኣያዉኔ ማዴናዎ። 6:44 ማት 12:34

46 «ታሲ ኦደዋ ኦሊኪታ፡ ሺን ኣያው ጎዳው፡ ጎዳው፡ ያጊዴ ታና ያጊቴ? 47 ታኮ ዪያ ኡባይ ታ ቃላካ ሲሲዴ ኦሱዋን ፔሺያዌ ኦና ማላቲንቶ ታ ሂንቲንታ ቤሳና፤ 48 ኢካ ጎሊያ ከፂዴ ዳሮ ኦላ ቦኪዴ ዛላ ቦላ ጊንቢዴ ከፂዳ ኣሳ ማላቲ፤ ዲቡ ዲቢዴ ሄ ጎሊያ ሱጊናካ፡ ሚኖ ዛላ ቦላ ከፂቶ ዲራው ቃላናው ዳንዳይቤና። 49 ቃይ ታ ቃላ ሲሲዴ ኦሱዋን ፔሺና ኡራይ ባሱ ባንታሳ ሻፊያ ቦላን ጎሊያ ከፂዳዋ ማላቲ። ዲቡ ዲቢዴ ሄ ጎሊያ ሱጎ ዋዴ ማንዲያንካ ኩንዴዳ፤ ሄ ጎሊካ ኢታ ዋዳ ዋዲዴ ባዬዳ» ያጌዳ።

7

ዩሱሲ ጭቱዋ ካፑዋ ቆማ ፓሌዳ
 (ማጎ 8:5-13፤ ዮሀ 4:43-54)

1 ዩሱሲካ ሃዋ ኡባ ኣሳ ሲንላን ሃሳይ ወርሶዋፔ ጉዩያን ሂኒ ቀፊሪናሆማ ቤዳ። 2 ሄዋንካ ኢቲ ጭቱዋ ካፑ ደዒ። ኢ ዳሮፔ ደሲያ ኣ ቆማይ ሃርጊዴ ሃያናው ማቲዳ። 3 ኢካ ዩሱሳባ ሲሲዳ ዋዴ፡ ባሬ ቆማ ዋሲዴ ፓላና ማላ ዪሁዳ ጨማቱዋ ሂኒ ኣኮ ከቲዳ።

4 ኡንቲንቲካ ዩሱሳኮ ዪዴ፡ «ሃ ቢታኒ፡ ኔኒ ኣ ማዳናዳን ዳሮፔ ኮዬዳ፤ 5 ጋሱካ ኦ ኣሳ ኢ ዳሮፔ ደሲዴ ኣዪሁዳቱዋ ዋሲያ ጎሊያ ከፂሶዌካ ኣ» ያጊዴ ዳሮፔ ዋሴዲኖ።

6 ዩሱሲካ ኡንቲንቲና ኢቲፔ ቤዳ። ኢካ ሂኒ ጎሊያ ሄራ ጋከዳ ዋዴ ጭቱዋ ካፑ ባሬ ላጌላቱዋ ባሬኮ ጭሲዴ፡ «ታ ጎዳው፡ ዳሱሮፓ፤ ኣዪሲ ጎፔ፡ ኔና ታ ጎሊያ ካራፔ ጋርሳ ባጋና ጌልሳናው ታው ቤሶና። 7 ሃዋ ዲራው ኔ ሲንላን ኤቃናወካ ሃራይ ኣቶ ቤሲያዋ ጊዲከ። ሺን ኔኒ ቃላ ፃላላ ኦዳ፤ ታ ቆማይካ ፓፃናዋ። 8 ታኒ ታፔ ቦላና ማታይ ዳዒያዋንቲሲ ኤኖ ጋዴ ዳዒያ ኣሳ። ታፔ ጋርሳናካ ታኒ ከቲሲያ ዋታዳራቱ ዳዒኖ። ኢቱዋ፡ (ባ) ያጊያ ዋዴ፡ ቤ፤ ሃራካ ቃይ፡ (ሃያ) ጎፔ ዩ። ታ ቆማይካ፡ ሃዋ (ኦሳ) ጊያ ዋዴ ኣዛዜቲ፤ ኦሌ» ያጌዳ።

9 ዩሱሲካ ሃዋ ሲሲዴ ኣ ዩወዋን ማላሌቲዳ፤ ጉዬ ሲሚዴ ኣ ካሊያ ዳሮ ኣሳ፡ «ታኒ ሂንቲንቶ ቱሙዋ ጋይ፤ ታኒ ሃዋ ማላ ኣማኑዋ ሃራይ ኣቶ፡ ኢሰራዔሊያ ጋርሳንካ ቤዓቤይከ» ያጌዳ። 10 ካሴ ከቲቲዳ ኣሳቲካ ጭቱዋ ካፑዋ ጎሌ ጉዬ ሲሚያ ዋዴ፡ ኣ ቆማይ ፓዎዋ ቤዒዲኖ።

ዩሱሲ ኣምባቲ ናዓ ሃይቁዋፔ ዴንሌዳ

11 ዋንቲሳ ጋላሲ ዩሱሲ ባሬና ካሊያዋንቱናኔ ጮራ አሳና ኢቲፔ ናይኖ ጌቲቲያ ካታማቶ ቤዲኖ። 12 ዩሱሲ ካታማ ጋካና ማቶ ዋዴ፣ አሳይ ሃይቄዳ አጎ ቶኪዴ ኬሴዲኖ። ሃይቆዌካ ባሬ ዳዩው ማዲ ኢቲ ናባ፤ አታካ እስናይ ባይና አምዓቶ። ዳሮ ካታማ አሳይካ ኢዞ ካሌዲኖ።

13 ዩሱሲካ ኢዞ ቤዔዳ ዋዴ ቃሬቲዴ፣ «ዩኮፓ!» ያጌዴ። 14 ሺቂዴ ሻንቻማ ቦቼዳ፤ ቶኮዋንቲካ ኤቄዲኖ። ዩሱሲ፣ «ኔኖ ያላጋው፣ ዴንዳ ጋይ!» ያገና፣ 15 ቢታኒ ሱሪ ኡቲዳ። ሃሳያካ ደሜዳ። ዩሱሲካ አ፣ አ ዳዩው ኢሜዳ።

16 ኡባይካ ያሻን ኩሚዴ፣ «ዋልቃማ ናቢ ኑ ጋርሳን ዴንዴዳ፤ ያሳይካ ባሬ አሳ አሻናው ዩዳ!» ያገዴ ያሳ ጋላቲዲኖ። 17 ሄዌኔካ ዩሱሳ ዋሪ ዩሁዳ ዩሹዋን ዴዲያ ጋዲያ ኡባን ሲሴቲዳ።

**ፃማቂያ ዮሃንሳ
(ማት 11:1-19)**

18 ዮሃንሳ ካሊያዋንቲ ሃኖዋ ኡባ አው ኦዴዲኖ። ዮሃንሲካ ባሬና ካሊያዋንቲፔ ላዓቲዋ ዪሲዴ። 19 «ያናዌ ኔኔዬ? ዋይ ኮኒ ሃራ ናጋኔ?» ያገ፣ ኡንቲንቲ ኦቻና ማላ ሂኒ ዩሱሳኮ ኪቲዳ።

20 አሳቲካ ዩሱሳኮ ዩዴ፣ «ፃማቂያ ዮሃንሲ፣ ያና ጌቲቲዳዋ ኔኔዬ? ዋይ ሃራ ናጋኔ? ያገዴ ኦቻና ማላ ኔኮ ኪቲዳ» ያጌዲኖ።

21 ሄ ዋዲያን ዩሱሲ ጮራ አሳ ዲማ ዲማ ሃርጊያፔ ፓሌዳ፤ ቱና አያናቲዋካ አሳፔ ኬሴዳ፤ ጮራ ቆቃቲዋ አይፊያ ደዩዳ።

22 ዩሱሲካ ዮሃንሲ ኪቶዋንቶ፣ «ቢዴ ሂንቲንቲ ቤዔዳዋኔ ሲሴዳዋ ዮሃንሳው ኦዲቲ፤ ቆቃቲ፣ ፃላናዋንታ፤ ጉንዳቲ ሃሚታናዋንታ፤ ኦሉ ኦይቆዋንቲ ጌያናዋንታ፤ ቱሌዳዋንቲ ሲሳናዋንታ፤ ሃይቄዳዋንቲ ዴንዳናዋንታ፤ ሂዩሳቲዋሲካ ሚሺራቹዋ ቃላይ ኦዴታናዋ። 23 ታናን ቆቤቲና አሳይ ኡባይ አንጄቲዳዋንታ» ያጌዴ።

24 ዮሃንሲ ኪቲዳዋንቲ ቢዲሳዋፔ ጉዩያን ዩሱሲ አሳው ዮሃንሳዋ ኦዲዋ ደሜዳ፣ «አያ ቤዓናው ቢታ ባዙዋ ኬሴዲቲ? ጫርኩ ቃሊያ ኡሱሳ? 25 ዋይ አያ ቤዓናው ኬሴዲቲ? ሎዎ ማዩዋ ማዩዳ አሳ ዴዐዋ? ሎዎ ማዩዋ ማዩዳዋንቲኔ ባሬና ገገሲያዋንቲ ካቲያ ጎሌን ዴዲኖ። 26 ዋይ አያ ቤዓናው ኬሴዲቲ? ናቢያ ቤዓናው ኬሴዲቲ? ኤ፤ ታኒ ሂንቲንቶ ያጋይ፤ ሂንቲንቲ ቤዓናው ኬሶዌ ናቢያፔካ አቆዋ። 27 ያሳ ማፃፋን፣ ሳ ኡጊያ ኔፔ ሲንፋና ገገሲያ ኪታንቻ ኔፔ ሲንፋዳ ኪታና ጌቲቲ ዮሃንሳባይ ፃፊቲዳዋ ሃዋ። 28 ማጫዋንቲፔ ዩሌቲዳዋንቲ

ጋርሳን ፃማቂያ የሃረሳ፣ አዲያ ኦሪብ ባዎ። ያሳ ካወቁትን ቃሲ ኡባ፣ ላፋ ጌቲቲያዊካ ኣፎ ኣቆናዎ» ያጌዳ።

29 ሃራይ ኣቶሺን ቃራፃ ከሲያዎንቱ ኣቴናን ሃዎ ዩሱሲ ሃሳዮዎ ሲሴዳ ኡባይ የሃረሳ ኩሺያን ፃማቂቶዎንቱ ያሳው ቤሲያ ቦንቹዎ ኢሜዲና። 30 ሺን ሂጊያ ታማሪሲያዎንቱኔ ፓሪሳዎቱ የሃረሳን ፃማቂቲቤና ዲራው። ያሳይ ኡንቱንቶ ቆፔዳዎ ኢፃዲና።

31 ዩሱሲ፡ «ሲሚ ታኒ ሃ ዎዲያ ኣሳ ኣያና ለሚሶ? ኡንቱንቱ ኣያ ማላቲና? 32 ኡንቱንቱ ጌያሳን ኡቲዳ ኢቱ ኢቱዎ ፃሲዳ፡ «ሱሱሊያ ሂንቲንቶ ፑኒናካ ካዲቤይኪታ፤

ዩኩዎ ዩላ ከሴዶሺንካ ዩኪቤይኪታ

ያጌቲያ ናና ማላቲና» ጌዳ።

33 ፃማቂያ የሃረሲ ቁማ ሜናን ዎዲያ ኤሳካ ኡሺናን ዩና፡ «ኣ ቦላን ጋሌናይ ዴዔ» ያጌዳታ። 34 ታኒ ኣሳ ናባይ ማዴኔ ኡሻዴ ዩና፡ «ሃዌ ናፊሳማ፤ ዎዲያ ኤሳካ ኡሺያዎ፤ ቃራዲያዎንቶኔ ናጋራንቻቶ ዳቡዎ» ያጌታ። 35 ጌዶፔ ኣቲን ያሳ ኣቶ ኤራቴላይ ባሬ ኡሱዋን ቱማ ጌዲዳ ቤቴዳ» ያጌዳ።

ፓሪሳዊያ ሲሞና

36 ፓሪሳዎቱዎፔ ኢቱ ባሬናና ቁማ ማና ማላ ሸቢና፡ ዩሱሲ ኣ ሶይ ቢዳ ማናው ኡቴዳ። 37 ሄ ካታማን ናጋራንቻ ጌቲቴዳ ኢቲ ሚሺራታ ዴዔወና፡ ዩሱሲ ኣ ሶዩን ኡቴዳዎ ሲሳዳ፡ ኣልባስፂሮሳ ጌቲቴያ ሹቻፔ ኦሴቴዳ ቢልቃሲያ ኩሜዳ ሺቱዎ ኣካ ያዲ። 38 ጉዩና ኣ ጌዲያ ማታን ኤቃዳ፡ ዩካዳ ኣ ጌዲያካ ባሬ ኣፎላን ኦካ ዶማዲ፤ ኢዚ ኣፎላይ ባዩዜዳ ኣ ጌዲያካ ባሬ ሁጲያ ቢናናን ቁጫዴኔ ኣ ጌዲያ ዩራዳ ጌዲያን ሺቱዎካ ጫጫፋዲ።

39 ዩሱሳ ባሬ ሶይ ፃሴዳ ፓሪሳዊካ ሃዎ ቤዲዳ፡ «ሃዌ ናቢያ ጌዴዳንቶ፡ ሃና ኣ ቦቹያ ሚሺራታ ኦኔንቶኔ ቃይካ ኢዛ ናጋራንቻ ጌዲያዎ ኢ ኤራናሺን» ያጌዳ።

40 ዩሱሲካ ዛሬዳ፡ «ሲሞና፡ ታኒ ኔው ኦዲያ ዩዉ ዴዔ» ያጌና፡

ሲሞኒካ፡ «ታማሪሲያዎ፡ ኦዲ» ያጌዳ።

41 ዩሱሲ፡ «ኢቲ ቢታኒያፔ ሚሻ ታልዔዳ ላዑ ኣሳቱ ዴዲና። ኢቱዎ ማታን ኢቹሹ ፃቱ ዲናሪ፡ ቃይ የኩዎ ማታን ኢሻታሙ»

7:29 ማት 21:32፤ ሉቅ 3:12 7:38 ማት 26:7፤ ማር 14:3፤ ዮሀ 12:3

ዴዔ። 42 ለዓቶካ ጨገያዌ ቆይና፣ ለዓቱዋ አጩዋካ ማሪ አገዳ። ሃዋንቱ፤ ሃቃዌ ሎይሉ ደሲያዋ ማላቲ?» ያገዳ።

43 ሲሞኒካ ዛሪዴ፣ «ዳሩዋ አገዋ ማላቲ» ያገዳ። ዩሱሲካ፣ «ቱሙዋ ዛራዳ» ያገዳ።

44 ዩሱሲ ሚሺራቲኮ ያለዴ፣ ሲሞና ሃዋዳን ያገዳ፤ «ሃኖ ሚሺራቶ ቤዓዲ? ታኒ ኔ ጎሌ ዪና ሃራይ አቶሺን ሃላካ ታ ጌዴው አማቤይካ፤ ሺን ኢዛ ባሪ አፎላን ታጌዲያ ኢርዒሳዲ፤ ባሪ ሁጲያ ቢናናኒካ ቁጫዲ። 45 ኔ፣ ታና ዩራ ቤይካ፤ ሺን ኢዛ ታኒ ጌሎዴ፤ ደማዴ ታጌዲያ ዩሪያዋ አጋ ቤይኩ። 46 ኔ፣ ታ ሁጲያን ዛይቲያ ኦካ ቤይካ፤ ሺን ኢዛ ታ ጌዲያን ሺቱዋ ጫጫፋዲ። 47 ሃዋ ዲራው ታ ሂንቲንቶ ኦዳይ፣ ዳርፔ ኢዛ ደሴዳዋ ዲራው፣ ዳር ናጋራይ ኢዚው ዴዒያዌ ማሬቲዳ፤ ጉላይ ማሬቲያዌ ጉላ ደሴ» ያገዳ።

48 ዩሱሲ ሚሺራቶ፣ «ኔ ናጋራይ ቁጩቲዳ» ያገዳ።

49 ዩሱሳና ኢቲፔ ቁማ ማናው ኡቲዳዋንቱ ባሪንቱ ዋዛናን፣ «ናጋራ ማራናው ዳንዳዪያዌ ሃዌ ኦኔ?» ያገዳዲና።

50 ዩሱሲ ሚሺራቶ፣ «ኔ አማኑ ኔና አሼዳ፣ ሳርቲላን ኔ ጎሌ ባ» ያገዳ።

8

ዩሱሳ ካሌዳ ማጫዋንታ

1 ዩሱሲ ሃዋ፤ ሲሚዴ፣ ሳባኪዲኔ ያሳ ካወቲላ ሚሺራቶዋ ቃለ ካታማኒኔ ሄራን ኦዲዴ አጴዳ። ታማኔ ላዑ ዩሱሳ ካሊያዋንቱካ አናና ኢቲፔ ዴዒና። 2 ኢታ አያናፔኔ ዋልቃማ ሃርጊያ፤ ፓዳዳዋንቱ ኢቲ ኢቲ ማጫዋንቱካ ዴዒና። ሄዋንቱካ፣ ላፑ ፃላሂ ኬሴዳ ማግዳላ ጌቲቲያ ካታማ፤ ዩዳ ማይራዎኔ። 3 ሄርዲሳ ጎሊያን ሱንላ ጊዴዳ ኩዛ ማቻቲ ዮሃና፣ ሶሲና ጌቲቲዉናኔ ሃራ ጮራቱዋና ኢቲፔ ጊዲዴ፣ ዩሱሳኔ አ ካሊያዋንታ ሚሻን ማዴዲና።

ዜሬላ ሌሚሱዋ (ማጉ 13:1-9፤ ማር 4:1-9)

4 ጮራ አሳይ ዳር ካታማቱዋ፤ ሺቁዴ፣ ዩሱሳኩ ዩዳ ዋዲያን ሌሚሱዋን። 5 «ዜሪያዌ ዜሬላ ዜሪናው ኬሴዳ። ዜሪያ ዋዴ ኢቲ ኢቲ ዜሬላይ፣ አጊያ ደናን ዋዲዴ ዩዴቲዳ። ያቲና ሳሉዋ ካፉ ሄዋ ሚዳ። 6 ሃራይ ቃይ ዛላ ቦላ ዋዲዴ ደሌዳ ዋዴ ኩሺያ ሃላ ዴሚና ዲራው ሚሊዳ። 7 ሃራ ዜሬላይ አጉንላ ጋርሳን ዋዲዳ። አጉንላይ ኢቲፔ ዲጨዴ ሚቲዳ። 8 ሃራይ ሎዒያ ቱዔ

ቢታን ወደዎት። ደሎዋ፤ ጉዲያን፤ ዘራቶዋ፤ ያቲ ኩሺያ ዳኩዋ ሞኬዳ» ያጌዳ።

ዩሱሲ ለሚሱዋን ሃሳዬዳ ጋሱዋ
(ማጥ 13:10-17፤ ማር 4:10-12)

ዩሱሲ ሃዋ ሃሳዬዳ፡ «ሃይላይ ዴዲያ ኡባይ ሲሶ» ያጌ ቃላ ጶቁ ኡዲዴ ዋሴዳ።

9 አ ካሊያዋንቱ፡ «ሃ ለሚሱ አያ ጉሴ?» ያጌ አ ኦቼዲኖ።
10 እካ ዛሪዴ፡

«ሂንቱንቶ ያሳ ካዉቲላ ፀራ ኤራይ አሜቲዳ፤ ሺን ሃራቶ፤ ያሊዲካ ኤራና ማላ፤ ሲሲዲካ አኬኬና ማላ ለሚሱዋን ኦዳይ» ያጌዳ።

ዩሱሲ ዜራላ ለሚሱዋ ቢሊዴ ኦዴዳ
(ማጥ 13:18-23፤ ማር 4:13-20)

11 ዩሱሲ፡ «ዜራላ ለሚሱ ሃዋ፡ ዜራላይ ያሳ ቃላ። 12 ኦጊያ ጋፃን ወደዎት ዜራላይ፡ ጉላ ዋደው ቃላ ሲሲያ አሳ፤ ኤሌካ ያላሂ ዩኔ፤ ኡንቱንቱ ሲሶዋን አማን አቲና ማላኔ ቃላይ ዋዛና፤ ደጌታና ማላ ኦሌ። 13 ዛላ ቦላን ወደዎት ዜራላይ፡ ኮይሮ ቃላ ናሹቻን ሲሲያዋንታ። ሄዋንቲካ ጉላ ዋዲያ አማኒኔ ፓጪ ጋኪያ ዋዲያን ያጵ ባንታ ዲራው ኤሌካ አማኑዋ ካዲኖ። 14 አጉንላ ጋርሳን ወደዎት ዜራላይ፡ ቃላ ሲሲያዋንታ፤ ሺን ዴዑዋ ሂርጋይኔ ዲራቲላ አሻሉ ጩሌዳዋንታ። ሄዋንቲ ሎዖ አይፊያ አማናው ዲንዳዩኪኖ። 15 ሎዖ ቱዔ ቢታን ወደዎት ዜራላይ ቤሲያዋ፡ ሎዓኔ ያሎ ዋዛናን ቃላ ሲሲዴ ናጊያ አሳኔ ሄ ቃላን ሚኒ ኤቂዴ ሎዖ አይፊያ አይፊያዋንታ።

ያምፒያ
(ማር 4:21-25)

16 «ያምፒያ ሳሊዴ አቲባን ቁምዒ አጊያዌ ዋይ አርሳ፤ ጋርሳና ዋሊያዌ ኦኒኔ ባዋ። 17 ቆንጩናን ቆሱዋን አቲያባይ አቲ ዩዉኔ ባዋ። ኤራቲናኒኔ ቤቲያሳ ኬሴናን አታናባይ አይኔ ባዋ። 18 ሄዋ ጊዲያ ዲራው ሎይሊ አኬካን ሲሲቲ። ዋዛና፤ ሲሲያዋ ኡባው ጉጂ አኬካይ አሜታና፤ አኬኬናዋ፤ ሄ አው ዴዲያዋ ማላቲያ አኬካይካ አኬታናዋ» ያጌዳ።

8:10 እሳ 6:9 **8:16** ማጥ 5:15፤ ሉቅ 11:33 **8:17** ማጥ 10:26፤ ሉቅ 12:2 **8:18** ማጥ 25:29፤ ሉቅ 19:26

ዩሱሳ ዳዮኔ እ ኢሻቱዋ
(ማጥ 12:46-50፤ ማር 3:31-35)

19 ሄ ዋዲያን አታኔ ኢሻቱ ዩሱሳና ጋኬታናው አኮ ዩዲኖ፤ ሺን አሳ ጮራቴላፔ ዳንዶ ጋሱዋን እ ዳማናው ዳንዳይቤይኪኖ።

20 ኢቲ ቢታኒ፣ «ኔ ዳያኔ ኔ ኢሻቱ ኔናና ጋኬታናው ኮዮ ዲራው ካሬን ዪዴ ኤቁዲኖ» ያጊ ኦዴዳ።

21 ኢካ፣ « ታ ዳያኔ ታ ኢሻቱ፣ ያሳ ቃላ ሲሲዴ ኦሱዋ ቦላን ፔሺያዋንታ» ያጊ ዛሬዳ።

ዩሱሲ ቤታ ጮዑ ኦሌዳ
(ማጥ 8:23-27፤ ማር 4:35-41)

22 ኢቲ ጋላሲ ዩሱሲ ባሬና ካሊያዋንቱና ኢቲፔ ዋንጊሪያ ጌሊዳ፣ «አባፔ ሄፊንሳ ቦይቲ» ጌዳ። ኡንቱንቱካ ዳንዲዳ ሃሜታ ደሚዲኖ። 23 ፒኒ ዳዲያ ዋዴ፣ ዩሱሲ ጌሚዲሹዳ። አባን ጎቱዋ ጫርኩ ዳንዶ ዲራው፣ ዋንጊሪያ ጋርሳን ሃላይ ኩሚና ዳር ማቶቲዲኖ። 24 ኡንቱንቱ ዩሱሳኮ ሸቂዳ፣ «ጎዳው፣ ጎዳው! ኩኒ ባዮይቲቲ!» ያጊዳ እ ቤጎሌዲኖ።

ኢካ ቤጎቲዳ ጎቱዋኔ ሃላ ቤታ ሴሪና፣ ጎቱኔ ሃላ ቤታይ ኤቁዳ፤ ኡባባይካ ጮዑ ጌዳ። 25 ኢካ፣ «ሂንቱንቶ አማኑ ሃቃን ዳዲ?» ያጊዳ።

ኡንቱንቱካ ያዪ ማላሌቲዳ ኢቱ ኢቱዋ፣ «ሃዋዳን ጫርኩኔ ሃላይ ጮዑ ጊቱ ጊና አዛዜቲያዌ ሃዌ እኔ?» ያጊቴዲኖ።

ዩሱሲ ፃላሂ ኦይቁዳ ቢታኒያ ፓሌዳ
(ማጥ 8:28-34፤ ማር 5:1-20)

26 ጋሊላ አባፔ ሄፊንሳና ዳዲያ ጌርጌሴኖና ጌቲቲያ ጋዲያ፣ ዩሱሲኔ እ ካሊያዋንቱ፣ ዋንጊሪያን ፒኒዳ ጋኬዲኖ። 27 ሄ ሃላፔ ፒኒ ሳዓ ዋዶ ዋዴ፣ ኢታ አያናን ኦይቁቲዳ ኢቲ ቢታኒ፣ ካታማፔ ኬሲዳ እናና ጋኬቲዳ። ዳር ዋዲያፔ ደሚዳ ማዩዋ ማዬናን ካሎ ጎሊያ እጊዳ ዲፋዋን ዳዴ።

28 ዩሱሳ እ ዳዋዋፔ ጉዩያን፣ ዋሲ እ ሲንሳን ጉፋኒዳ ዋልቃማ ኮሻን፣ «ዋልቃማ ያሳ ናዓ ዩሱሳ፣ ታዉኔ ኔው አይቤ ኢቲፔቲላይ ዳዲ? ታና ዋዩሶፓሪኪ፤ ታ ኔና ዋሳይ» ያጊዳ። 29 ኢ ሄዋ እዩሲ ጌዴ ጎፔ፣ ቢታኒያ ዩጊ ኬሳና ማላ ዩሱሲ እ አዛዙ ዲራሳ።

ኢታ አያናይ ቢታኒያ ኦይቆዴፔ ዳር ዋዴ ጊዶ ዲራው፣ ቢራታ ሳንላላታን ጌዲያኔ ኩሺያ ቃሺቲዳ ናጌቲ። ሳንላላታ ዲሊ አኪዳ ኢታ አያናይ ካሌሊና ባዙዋ ቤ።

30 ዩሱሲካ፡ «ኔ ሱንላይ ኦኔ?» ያገ ኦቼዳ። ኢካ ጮራ ኢታ ኣያናይ ጌሊ ኡቶ ዲራው፡ «ሌጊዮና» * ያጌዳ። 31 ባሬንታ ዩሱሲ፡ «ሂኒ ጨዋ ኦላ ቢቲ» ያጌና ማላ ዎሴዲኖ።

32 ሄዋን ዳዒያ ዘዚያ ጋፃን ሄሜቲያ ጮራ ጉዲንላቱ ዳዒኖ። ጮራ ቱና ኣያናቱ፡ ሄ ጉዲንላቱዋ ጋርሳ፡ «ጌሊቲ» ጋና ማላ ዩሱሳ ዎሴዲኖ። ኢካ፡ «ቢዳ ጌሊቲ» ጌዳ። 33 ኢታ ኣያናቱካ ቢታኒያፔ ኬሲዳ ጉዲንላቱዋ ጋርሳ ጌሌዲኖ። ጉዲንላ ዉዲካ ላንቂያፔ ካጆቲዳ ኤሌካ ኣባን ሚቲቲዲኖ።

34 ጉዲንላ ሄሚያዎንቱ ሃኖዋ ኡባ ቤያ ዎዳ ሃራሳ ቢዳ፡ ሄ ካታማኒኔ ዩሹዋን ሃኖዋ ኦዳዲኖ። 35 ኣይ ሃኔዴንቶ ቤዓናው ኬሲዳ፡ ኣሳይ ዩሱሳኩ ዩዲኖ። ኢታ ኣያናይ ኬሴዳ ቢታኒ፡ ኣ ዎዛናይ ሲሚና ማዩዋ ማዩዳ ዩሱሳ ጌዲያ ማታን ኡቶዋ ቤዒዳ ያዩዲኖ።

36 ኢታ ኣያናን ኦይቄቲዳ ቢታኒ ዎቲ ፓዌዴንቶ ቤዒዳ ኣሳይ፡ ሃራ ኣሳው ኦዳዲኖ። 37 ጌርጌሴኖና ጋዲያኒኔ ሄ ሄራን ዳዒያ ኣሳይ ኡባይ ዳሪ ያዩዳ ዲራው፡ ዩሱሲ ባሬንቲ ማታፔ ባና ማላ ዎሴዲኖ። ኢካ ዎንጊሪያን ጌሊዳ ቤዳ። 38 ኢታ ኣያናይ ኬሴዳ ቢታኒካ ዩሱሳና ባና ጊዳ፡ ኣ ዎሴዳ፤ ሺን ዩሱሲ፡ 39 «ኔ ጎሌ ሲሚዳ ያሳይ ኔው ኦሉ ዎልቃማባይ ኣዩንቶ ማርካታ» ያገ ዩዳዳ።

ሃይቄዳ ናቶኔ ሳኬቲያ ሚሺራቶ
(ማጥ 9:18-26፤ ማር 5:21-43)

40 ዩሱሲ ሲሚዳ ዎዳ ኣሳይ ኡባይ ናገ ዳዒያ ዲራው፡ ኣ ዎኪ ኣኬዲኖ። 41 ሄ ዎዳ፡ ኣዩሁዳ ኣሳ ዎሳ ጎሌው ሱንላ ጊዳዳ ያዒርሳ ያጌቲያ ቢታኒ ኣኮ ዩዳ። ኢካ ዩሱሳ ጌዲያ ሲንላን ኩንዲዳ፡ ባሬ ጎሌ ጌላና ማላ ዎሴዳ። 42 ጋሶቲላይካ ታማኔ ላዑ ላይላይ ኩሚዳ ኣው ዳዒያ ኢቲ ናታ ሃይቃናው ማታ ኡቶ ዲራሳ።

ዩሱሲ ቢያ ዎዳ ጮራ ኣሳይ ኣ ዩሹዋን ሱጌቲዳ ሚቶሌዲኖ። 43 ሄ ኣሳ ጊደን ሄ ዎዲያን ታማኔ ላዑ ላይላ ኡባ ሱላይ ጎጊያ ሚሺራታ ዳዓው። ባሬ ዳዒያ ሻሉዋ ኡባ ጳሊያ ኤሪያዎንቶ ዉርሲናካ ፓላናው ዳንዳዮዌ ኦኒኔ ባዎ።

44 ጉዩና ያዳ ኣ ማዩዋ ማጫራ ቢቻዲ፤ ሄ ማንዒያንካ ኢፔ ጎጊያ ሱላይ ኤቂ ኣጌዳ። 45 ዩሱሲ፡ «ኦኔ ታና ቦቾዌ?» ያጌዳ።

* 8:30 ሌጊዮና፡ ሃ ሱንላይ ገሪኬ ጌቲያ ቃላፔ ኣኬቲዳ። ሱንላ ቢሌላይ «ጮራ» ጉሳ።

ኡባይ ካዲና ጳጳሮሲ፡ «ጎዳው፡ አሳይ ሱጌቲዳ ሜቶሊያ ዎዳ፡ (ኦኔ ታና ቦቾዌ) ያጋይ?» ጌዳ።

46 ሺን ዬሱሲ፡ «ኢቲ አሳይ ታና ቦቾዳ፤ ዎልቃይካ ታፔ ከሶዎ ታኒ ኤራይ» ያጌዳ። 47 ሚሺራታካ፡ ዬሱሳ ኢዛ ቦቾዌ ኤራይናን አቲቤናዎ ኤራይ፡ ኮኮራዳ ዮና ዬሱሳ ሲንላን ኩንዳ አጋዳ። አያ ጋሱዎን ዬሱሳ ቦቾዳንቶ ኢዛ ገጾዎ ኡባ አሳ ሲንላን ኦዳዱ።

48 ኢካ ኢዚው፡ «ሃ ሚሺራቲ! ኔ አማኑ ኔና ገሌዳ፤ ሳር ባ» ያጌዳ።

49 ዬሱሲ ሃሳይ ዴቢሽን፡ አዪሁዳ አሳ አማኒያዎንቲ ሱንላ ሶዪፔ ኢቲ ቢታኒ ዬዳዌ፡ «ኔ ናታ ሃያዱ፤ ሲሚ ታማሪሲያዎ ሚቶቶፓ» ያጌዳ።

50 ዬሱሲ ሃዎ ሲሲዳ፡ «ያዲርሳ፡ አማናፔ አቲን፡ ያዮፓ! ኢዛ ገጻናውኑ» ያጌ ዛሬዳ።

51 ሶይ ጌሊዳ፡ ጳጳሮሳ፤ ያዪቆባ፤ ዮሃንሳ፤ ናቲ አቡፔኔ ናቲ ዳዪፔ አቲን፡ ኦኒኔ ጌላናዳን ኤኖ ጊቤና። 52 ኡባይ ሄ ናቲው ዬኪዳኔ ካኖቲዲ ዴቢሽ። ሺን ዬሱሲ፡ «ዮኮፒ፤ ጊሳዲፔ አቲን ሃያቤይኩ» ያጌዳ።

53 ኢዛ ሃይቄዳዎ ኤሪዳ አ ቦላ ሚጨዳዲና። 54 ጊደፔ አቲን ዬሱሲ ኢዚ ኩሺያ ኦይቂዳ፡ «ሃ ናቲ፡ ቤጎታ!» ያጌዳ። 55 ኢዚ ሺምፑካ ሲሚና ኤሌካ ዳንዳ ኤቂና ማናባ አማና ማላ፡ ዬሱሲ አዛዜዳ። 56 ኢዚ አቡኔ ኢዚ ዳያ ማላሌቲዲና፤ ሺን ዬሱሲ ኡንቲንታ፡ ሃኖ ዬዉዎ ኦሲኔ ኦዳና ማላ አዛዜዳ።

9

ዬሱሲ ባሬና ካሊያ ታማኔ ላዓቱዎ ኪቲዳ (ማት 10:5-15፤ ማር 6:7-13)

1 ዬሱሲ ታማኔ ላዑ አ ካሊያዎንታ ኢቲፔ ባሬኮ ዪሲዳ፡ ፃላሂያ ኡባ አሳፔ ከሳናውኔ ሃርጊያዎንታ ገላና ማላ ዎልቃኔ ማታ አሚዳ። 2 ያሳ ካውቲላባ ኦዳናውኔ ሃርጋንቻቱዎ ገላና ማላ ኡንቲንታ ኪቲዳ። 3 ኢ ኡንቲንታ ኪቲዳ፡ «ኦጊያ ቢዳ፡ ፃምዓ ጊዲናካ፡ ዎይ ቃርጨቲያ፡ ዎይ ቁማ፡ ዎይ ሚሻ ጊዲናካ አያኔ ኦይቆፒ፤ ላዔሊያ ማዩዎካ ኦይቆፒ፤ 4 ሂንቲና አሳይ ሃቃን ሞኮፔኔ፡ ሄዎፔ ከሳና ጋካናው፡ ሂንቲንቲ ጌሌዳ ጎሊያን ጋሚሳቲ። 5 ሄ ካታማ አሳይ ሂንቲና ሞከናን ኢዮፔ፡ ሄዎፔ

9:3 ሉቅ 10:4-11

ከሲዳ፡ ኡንቱንቱ ሂንቴና ሞኬናን ኢያዎ ማርካ ጊዳና ማላ፡ ሂንቴንቱ ጌዲያፕ ባና ሾጩ ዲጊዳ ቤቱ» ያጌዳ።

6 እ ካሊያዋንቱ ቢዳ፡ ቄሪ ካታማ ኡባን ሚሺራቸዋ ቃላ ኦዲዳኔ ሃርጋንቻ ፓሌዳ ዩዩዲኖ።

ሄሮዲሴ ኦሌዳባ

(ማጥ 14:1-12፤ ማር 6:14-29)

7 ሃሲ ጋሊላ ቢታ ካቲያ ሄሮዲሴካ ሃኔዳ ዩወዋ ሲሲዳ ያቲ ጌዳ። ጋሶቴላይኔካ ኢቲ ኢቲ አሳይ፡ «ዮሃንሲ ሃይቁዋፔ ዳንዳዳ» ያጌ። 8 ሃራ አሳይ፡ «ኤላሲ ከሲዳ ቤቱዳ» ያጌያ ዎዳ፡ ሃራንቱ ቃሲ፡ «ቤኒ ናባቱዋፔ ኢቱ ሃይቁዋፔ ዳንዳዳ» ያጌኖ። 9 ሄሮዲሴካ፡ «ታኒ ዮሃንሳ ቆዲያ ቃንዲሳ ዲጋዲሺን፡ ሃዋዳን አሳይ ሃሳዪያ ቢታኒ ኦኔ?» ያጌዳ፡ ዩሱሳ ቤዓናው ኮዩዳ።

ዩሱሲ ኢቸሹ ሻዓ አሳ ሚዚዳ ካሊሴዳ

(ማጥ 14:13-21፤ ማር 6:30-44፤ ዮሀ 6:1-14)

10 ዩሱሲ ከቶዋንቱ ሲሚዳ፡ ኡንቱንቱ ኦሌዳዎ ኡባባ ዩሱሳው ኦዳዲኖ። ኢካ ኡንቱንታ አኪዳ፡ ቤቴሳይዳ ያጌቲያ ካታማ ማታን ዳዒያ ታካሳ ቤዳ። 11 አሳይ ኢ ዳዒያሳ ኤሪዳ ካለና፡ ኡንቱንታ ሞኪ አኪዳ ዖሳ ካወቱላባ ኦዳዳ፤ ሃርጊያፔ ፓዓናው ቤሲያዋንታካ ፓሌዳ።

12 ሳዓይ ኦማርሲያ ዎዳ፡ ዩሱሳ ካሊያ ታማኔ ላዓቱ አኮ ዩዳ፡ «ሃ አሳይ ኡባይ ኑ ዩሹዋን ዳዒያ ሄራ ጊዳኔ ቄሪ ካታማቱዋ ጊዳ ቤዳ፡ አቂያሳኔ ቁማ ዳማና ማላ ሞዪዛ፤ አያው ጎፔ ኑኒ ሃዋን አሳይ ባይናሳን ዳዒቶ» ያጌዲኖ።

13 ሺን ዩሱሲ ኡንቱንታ፡ «አሳው ሜቴቲያባ ሂንቴንቱ አሚቴ» ያጌዳ።

ኡንቱንቱ ዛሪዳ፡ «አኔ ቢዳ፡ ሃ ኡባ አሳው ቁማ ሻሚናን ጳዮፔ ኑሲ ኢቸሹ ሶሉዋፔኔ ላዑ ሞሊያፔ ሃራይ ባዋ፤ ሄዋሲ ኑኒ ሃ ጮራ አሳው ቁማ ሻማና ማላ ኮያይ?» ያጌዲኖ። 14 [ጋሱካ፡ ሄዋን ዳዒያ አሳይ ኢቸሹ ሻዓ ኬና] *

ዩሱሲ ባሬና ካሊያዋንታ፡ «ኢሻታሙ ኢሻታሙ አሳ ጨታን ጨታን ሻኪ ሻኪ ኡቲሲቱ» ያጌዳ።

* 9:14 ኢቸሹ ሻዓ፡ ኢሰራዒሊያ ዎጋን ማጫዌኔ ቄሪ ናናይ ፓይዴቴና ዲራው፡ ኢቸሹ ሻዓ ጉሳይ ማጫዌኔ ቄሪ ናና ፓይዴናን ኩሜዳዋ። ሃ ፓይዲ ዳዒያ ኮይር ማራይ ቤኒ ማፃፋ ኢቱዋ ኢቱዋን ባዋ።

15 ኡንቱንቱካ ኢ ጎዋዳን ኡባ አሳካ ኡቲቤዲኖ። 16 ዩሱሲካ ኢቼሹ ሶሉዋኔ ላዑ ሞሊያ ኦይቂዳ፣ ፑዴ ሳሉዋ ቦንጎቲ ያሊዴ ያሳ ጋላቴዳ፤ ዲሴዳ፣ አሳው ጊሻና ማላ ኦ ካሊያዋንቶ ኢሜዳ። 17 አሳይ ኡባይካ ሚዴ ካሌዲኖ። ኡንቱንቱፔ አቴዳ ዶካ፣ ታማኔ ላዑ ሳምፓ ኩሜዳዋ ዴንሴዲኖ።

ጴጃሮሲ ዩሱሳባ አዋዬዳ
(ማት 16:13-19፤ ማር 8:27-29)

18 ኢቲ ጋላሲ ዩሱሲ ባሬካ ዋሲያ ዋዴ፣ ኦ ካሊያዋንቱካ አናና ኢቲፔ ዴዲሺን፣ «አሳይ ታና ኦና ጊኖ?» ጊዴ ኡንቱንታ ኦቼዳ።

19 ኡንቱንቱ ዛሬዳ፣ «አሳይ ኔና ፃማቂያ ዮሃኒሳ ያጌ፤ ሃራ አሳይ ቃሲ ኤላሳ † ያጌ፤ ሃራይ ቃሲ ቤኒ ናባቱዋፔ ኢቱ ዴንዴዳ ያጌ» ያጌዲኖ።

20 ዩሱሲ ኡንቱንታ፣ «ሂንቱሺ፣ ታና ኦና ጊቴ?» ያጌዳ።
ጴጃሮሲካ ዛሬዳ፣ «ኔኒ ያሳይ ኦኬዳ ኪሪሰቶሳ» ያጌዳ።

ዩሱሳ ካሊያዋንቱ ሃናናው ቤሲያባ
(ማት 10:38-39፤ 16:24-26፤ ማር 8:34-38፤ ሉቅ

14:26-27)

21 ዩሱሲካ ኡንቱንታ፣ «ሃዋ ኦሲኔ ኦዶፕቴ» ያጌ ሚኒሲ አዛዚዳ፣ 22 «ታኒ፣ አሳ ናዓይ፣ ዳሮ ሜቱዋ አካናው ቤሴ፤ ጨማቱዋን፣ ቁሳቱዋ ካፓቱዋኒኔ ሙሴ ሂጊያ ታማሪሲያዋንቱን ኢዳታናው ኮሺ፤ ኡንቱንቱ ታና ዋዳናዋንታ፤ ታኒካ ሄዜንሉ ጋላሲ ሃይቁዋፔ ዴንዳናው ቤሴ» ያጌዳ።

23 ዩሱሲካ አሳ ኡባ፣ «ታና ካላናው ደሲያዌ ደያፔ፣ ባሬ ሁጺያ ካዶ፤ ባሬ ማሰቃሊያ ‡ ጋላሳን ጋላሳን ቶኪዳ ታና ካሎ። 24 ባሬ ሽምቸዋ አሻናው ደሲያዌ ኡባይ ባዪዜ፤ ሺን ታ ዲራው ባሬ ሽምቸዋ ባዪዚያዌ ኡባይ አሺ። 25 ኢቲ ኡራይ ሃ አላሚያባ ኡባ አሺዴ ባሬ ሽምቸዋ ባዪዞፔ ዋይ ባሬው ፓጩሶፔ፣ አያ ማዲ? 26 አሳይ ታናኒኔ ታቃላን ዩላቶፔ፣ ታኒ አሳ ናዓይ፣ ታ

† 9:19 ኤላሳ፣ ሃ ናቤ ኢ ሃይቆዴፔ ዳሮ ዋዴፔ ጉዬ፣ ዩሱሲ ኪሪሰቶሲ ቢታ ቦላን ታማሪሲዴ ዴሪያ ቦላ ዋሳው ኬሲዴ ላሜቲ ቦዲዳዋፔ ጉዬ ባጋን አናናኔ ሙሴና ሃሳዬዳ። ሄዋ ጉሳይ ሃይቂ ሲሚዴ ዳሮ ጮራ ዋዲያፔ ጉዬ ፓፃ ቆንጨዳ ጉሳ።

9:19 ማት 14:1፣ 2፤ ማር 6:14፣ 15፤ ሉቅ 9:7፣ 8 9:20 ዮሀ 6:68፣ 69

9:23 ማት 10:38፤ ሉቅ 14:27 ‡ 9:23 ማሰቃሊያ፣ ሃዋ ጉሳይ፣ ኢቲ አሳይ ባሬ ላይላ ኡባን ያሳ ካሊዴ ሻኬቱናን ቶካናው ቤሲያ ሜቱዋኔ ዋዪያ።

ቦንቹዋናኔ ጌሻ ኪታንቻቱዋ ቦንቹዋና ዪያ ዋዴ ኣኒ ዩላታናዎ።
27 ታኒ ሂንቲንቶ ቱሙዋ ያጋይ፤ ሃዋን ዴዒያ ኣሳፎ፣ ያሳ ካዉቲላ ቤዓና ጋካናው ሃይቁዋ ሃይቁናዋንቱ ኢቱ ኢቱ ዴዒኖ» ያጌዳ።

ዩሱሳ ማላይ ላሚቲዳ
(ማት 17:1-8፤ ማር 9:2-8)

28 ዩሱሲ ሃዋ ጎዋፔ ጉዪያን፣ ኢቲ ሳሚንታ ከና ጋሚዒዴ፣ ጳዒርሳኔ ዮሃንሳ፣ ያዩቆባካ ኣኪዴ፣ ዋሳናው ዴሪያ ሁጲያ ኬሴዳ። 29 ኢ ዋሲሺን፣ ኣ ዴሙዋ ማላይ ላሚቲዳ፤ ኣ ማዩካ ቦዒዴ ጳልቁዳ። 30 ቆፔናን ላዑ ኣሳቱ፣ ሙሴኔ ኤላስ ኬሲ ቤቲዴ፣ ዩሱሳና ሃሳይ ዴዒኖ። 31 ኡንቲንቱ ቦንቹዋን ቆንጨ ቤቲዴ፣ ዩሱሲ ያሳ ቆፋ ፖላናው ዩሩሳላሚን ሃይቃናዋ § ኣናና ሃሳዩዲኖ። 32 ጳዒርሳኔ ኣናና ኢቲፔ ዴዒያዋንታ ጌሚዒሹ ጌርዬዳሺን፣ ኤሌካ ቤጎቲዴ ኣ ቦንቹዋኔ ኣናና ጋላ ኤቁዳ ላዑ ኣሳቱዋ ቤዒዲኖ። 33 ሄ ላዑ ኣሳቱ፣ ዩሱሳ ሚዪያፔ ሻኬቲያ ዋዴ፣ ጳዒርሲ ዩሱሳ፣ «ጎዳው፣ ሃዋን ዴዒያዊ ኑሲ ሎዓ ጊዲያ ዲራው፣ ሄዙ ዳሲያ ኢቱዋ ኔው፣ ኢቱዋ ሙሴው፣ ኢቱዋ ኤላሳው ኬፃና» ያጌዳ።

34 ጳዒርሲ ሄዋ ሃሳይ ዴዒሺን፣ ሻሪ ዪዴ ኡንቲንታ ካሚ ኣገና ዩሱሳ ካሊያዋንቱ ያዩዲኖ። 35 ሻሪያፔካ፣ «ታኒ ዶሬዳ ታ ናዓይ ሃዋ፤ ኢ ጊያዋ ሲሲቲ» ያጊያ ቃላይ ዩዳ።

36 ቃላይ ሲሴቶዋፔ ጉዪያን፣ ዩሱሲ ባሬ ፃላላ ጊዲዴ ቤቲዳ፤ ኡንቲንቲካ ዩዉዋ ባሬንቱ ዋዛናን ኦይቁዴ ሄ ዋዲያን ኦኒኔካ ኣያኔ ኦዲቤና።

ዩሱሲ ኢታ ኣያናን ኦይቁቲዳ ላዑ ኣሳቱዋ ፓሌዳ
(ማት 17:14-18፤ ማር 9:14-27)

37 ዋንቲላ ጋላሲ፣ ዩሱሲኔ ሄዙ ኣ ካሊያዋንቱ ዴሪያፔ ዲጌ ዋዲያ ዋዴ፣ ጮራ ኣሳይ ዩሱሳና ጋኬቲዳ። 38 ሄ ዋዴ ኣሳፎ ኢቲ ቢታኒ ባሬ ኮሻ ጶቁ ኦሊዴ፣ «ታማሪሲያዎ፣ ታው ዴዒያዊ ኢቲ ናዓ ጊዶ ዲራው፣ ኔኒ ኣ ቤዓና ማላ ኔና ዋሳይ፤ 39 ቃሲ ኢታ ኣያናይ ዋዛና ኣሌናን ዴንዲዴ ኣ ዋሲሴ፤ ዶናና ፓርያና ጋካናው ኣ ኮኮርሲዴ፣ ኡባ ጋላሲ ሜቶሊያዋፔ ኢቲን፣ ኣ ኤሌ ዩዴና። 40 ኔና ካሊያዋንቱ ሄ ኢታ ኣያና ኬሳና ማላ፣ ታኒ ኡንቲንታ ዋሳዲ፤ ሺን ዳንዳይቤይኪኖ» ያጌዳ።

9:28 2ጵፁ 1:17፣ 18 § 9:31 ሃይቃናዎ፣ ግሪኬ ማፃፋ ቆፋን ሃዋ ጉሳይ፣ «ዩሱሲ ሳሉዋ ቢያዎ»፤ ሃዋ ቃይ ኢ ሃይቁዋፔ ዴንዲያዎኔ ያቲዴ ሳሉዋ ቢያዎ ኡባ ሺሺ ኦይቁዳ ቆፋ።

41 ዩሱሲ ዛሬዎ ለንቱንታ፡ «አማኔና ሃ ዎዲያ ዳሻ አሳው፡ ታኒ ሂንቱናና አዉዳ ጋካናው ዳዓኔ? ቃሲ ሂንቱንቱባ አዉዳ ጋካናው ዳንዳያኔ? ኔ ናዓ ሃ አካያ» ያጌዳ።

42 ናዓይ ዩዳ ዳዒሸን፡ ኢታ አያናይ አ ሳዓን ኦሊዳ ኮኮርሴዳ፤ ዩሱሲ ኢታ አያና አጋ ጊ ናዓ ፓሊዳ አ አቦ ዛሬዳ ኢሜዳ። 43 አሳይ ኡባይካ ፆሳ ዎልቃማ ዎልቃፔ ዳንደዎን ማላሌቲዲኖ።

ዩሱሲ ባሬ ሃይቁዋባ ላዒንሉዋ ኦዳዳ
(ማጥ 17:22-23፤ ማር 9:30-32)

44 «ታና አሳ ናዓ፡ አሳይ አሳ ኩሺያን አሊዳ አማናዎ፤ ሂንቱንቱ ሃ ዩዉዎ ደሳጊቲ» ያጌዳ። 45 ሸን ኢ ጊያዎ ለንቱንቱ አኬኪቤይኪኖ። ለንቱንቱ ጌሌና ማላ ለንቱንቱፔ ጌሜዳ ዲራው፡ ሃ ዩዉዎ ዩሱሳ አቻናው ያዎዲኖ።

ኡባፔ አዲያዌ ኦኔሻ? ያጊያ አሻ
(ማጥ 18:1-5፤ ማር 9:33-37)

46 አ ካሊያዎንቱ፡ «ኮ ጊደፔ ዳሪያዌ ኦኔ?» ያጊዳ ፓሊሜቲዲኖ። 47 ዩሱሲ ለንቱንቱ ዎዛና ቆፋ ኤሪዳ፡ ጉላ ናዓ አሂዳ፡ ባሬ ማታን ኤሲዳ፡ 48 «ሃ ጉላ ናዓ ታ ሱንላን ሞኪያዎ ኦኔ ታና ሞኬዳ፤ ቃሲ ታና ሞኪያ ኡባይ፡ ታና ኪቲዳ ታ አባ ሞኬ። ሂንቱንቱ ኡባፔ ጉዲያዌ ኡባፔ ዳራ» ያጌዳ።

ሂንቱንቱ ጊያዎ ጳልቁና ኡራይ ሂንቱንቱ ባጋ
(ማር 9:38-40)

49 ዮሃንሲካ ዛሬዳ፡ «ሳዳው፡ ኢቲ አሳይ ኔ ሱንላን ኢታ አያናቱዎ ኬሲያዎ ኦኔ ቤዒዳ፡ ኮ ባጋ ጊዳና ዲራው፡ አ ዲጌደ» ያጌዳ።

50 ሸን ዩሱሲ አ፡ «ሂንቱንቱ ጊያዎ ጳልቁናዌ ሂንቱንቱ ባጋ ጊዲያ ዲራው፡ አ ደሳጊቲ» ያጌዳ።

ሳማሪያ ካታማ አሳቱ ዩሱሳ ሞካናው ኮዩቤይኪኖ

51 ዩሱሲ ሳሉዎ ቢያ ዎዲ ማቲና፡ ባሬ ዎዛና ቆፋ ዩሩሳሌሜኮ ዛሬዳ። 52 ባሬፔ ሲንላው ኡባ ዩዉዎ ጊጊሳና ማላ፡ ኪቲቲያ አሳ ሳማሪያ ካታማ ኪቲዳ። 53 ሸን ኢ ዩሩሳሌሜ ባናው ዳንዳዳ ዲራው፡ አሳይ አ ሞኪቤይኪኖ። 54 አ ካሊያዎንቱ ያዩቆበኔ

የሃኒሲ ሄዋ ቤዲዳ፡ «ጎዳው፡ ኑኒ ኤላሲ ኡደዋዳን፡ * ታማይ ሳሉዋፔ ዪዳ ኡንቱንታ ማናዳን ፃሳና ማላ ኮያይ?» ያጌዲኖ።
 55 ሺን ዬሱሲ ጉዬ ሲሚዳ፡ ኡንቱንታ ሴሬዳ። † 56 «ታኒ፡ አሳ ናዓይ፡ አሳ ሽምፑዋ አሻናው ዮዋፔ አቲን፡ ባዪዛናው ያቤይኬ» ያጌዳ። ኡንቱንቱ ሃራሳን ዳዒያ ቄሪ ካታማ ቤዲኖ።

ዬሱሳ ካሊያዋንታ ጋኪያ ፓጩያ
 (ማት 8:19-22)

57 ኡንቱንቱ ኦጊያና ቢሺን፡ አቲ ቢታኒ ዬሱሳ፡ «ጎዳው፡ ኔኒ ቢያሳ ኡባ ታኒ ኔና ካላና» ያጌዳ።
 58 ዬሱሲ አ፡ «ዋራካናቶ ኦላይ፡ ሳሉዋ ካፋቶካ ጎሊ ዳዒ፤ ሺን ታኒ፡ አሳ ናዓይ፡ ጌላ ሽምፓ ኦኪያሳይ ታው ባዋ» ያጌዳ።
 59 ዬሱሲ ሃራ ኡራ፡ «ታና ካላ» ያጌዳ።
 ሺን፡ ቢታኒ፡ «ጎዳው፡ ታኒ ካሲያን ባዴ ታ አባ ሞጋና» ያጌዳ።
 60 ዬሱሲ፡ «ሃይቆዋንታ ባሬንቱ ሃይቆዋንቱ ሞጊኖ፤ ኔኒ ባዴ፡ ያሳ ካዉቲላባ ኦዲ» ያጌዳ።
 61 ቃሲ ሃራ ቢታኒ፡ «ጎዳው፡ ታኒ ኔና ካላና፤ ሺን ኮይሩዋን ታ ሰይ አሳ ባዴ ሳርታና» ያጌዳ።
 62 ሺን ዬሱሲ አ፡ «ቦራ ጎሻናው ደሞዌ ኦኒኔ ጉዬ ፃሎፔ ያሳ ካዉቲላው ቤሴና» ያጌዳ።

10

ሚሺራቹዋ ቃላው ኪቲቲዳ አሳቱዋ

1 ሃዋፔ ካላ ጎዳይ ሃራ ላፑን ታሙ * አሳ ሱንሊዴ ላዐቀ ላዐቀ ኡዲዴ ኢ ባናው ዳዒያ ካታማ ኡባ ኪቲዳ። 2 ዬሱሲ ኡንቱንታ፡

* **9:54** ኤላሲ ኡደዋዳን፡ አቲ አቲ ጌሻ ማፃፋ ቢሊላን፡ «ሃ አሳ ወርሳናው» ያጌ።
 † **9:55** ኡንቱንታ ሴሬዳ፡ አቲ አቲ ጌሻ ማፃፋን ዳዒያ ቢሊላይ፡ «ኔኒ አዪ ማላ ኦኒኔንቶ፡ ኔና ኤሪኪ? አሳ ናዓይ አሳ ሽምፑዋ አሻናው ዬዳፔ አቲን፡ ባዪዛናው ዪቤና» ያጌ። **9:61** 1ካት 19:20 * **10:1** ላፑን ታሙ፡ አቲ አቲ ጌሻ ማፃፋ ቢሊላን፡ «ላፑን ታማኔ ላዓ»። አዪሁዳ ዋጋን ቢታ ቦላን ዳዒያ አሳ ዜሬላይ ላፑን ታማ፡ ሺን ካሴ ኤጫ ግሪኬ ማፃፋ ቢሊላን ዳዒያዌ፡ «ላፑን ታማኔ ላዓ»። ኦኒ ኤሪ ዬሱሲ ባሬ ቃላ አላሚያ የሹዋን ጋላናው ሃ ፓይደዋና ቃራ አሳ ሱንሊዴ ኪቲናን አጌና ያጊያ ቆፋይ ዳዒ። **10:2** ማት 9:37፣ 38

«ቆይቻው ጋኬዳ ካላይ ዳራ፤ ኪቴቲያ አሳይ ጉላ። ሲሚ ቆይጩቲያ ካላ ጎዳይ። ቆይቻው ኪቴቲያዋንታ ዬዳና ማላ ዋሲቴ።³ ታኒ ደርሳቱዋዳን ዋላቱዋ ገደ ሂንቴና ኪታይ። ቢቴ።⁴ ሂንቴንቱ ኦጌው አያኔ ኦይቆፒቴ። ቦርሳ፣ ቃርጩቲያ፣ ጫማ፣ ገዲናካ ኦይቆፒቴ፤ አሳና ሳርቴቲዳ ኦጊያን ዋዲያ ወርሶፒቴ።
†

⁵ «ሂንቴንቱ ጌሊያ ጎሌ ኡባ ካሲያን፣ ሳርቴታይ ሃ ጎሌው ገደ» ያገቡ።⁶ ሃ ጎሊያን ሳርቴታ ደሲያ አሳይ ዴዎፒ፣ ሂንቴንቱ ሳርታይ ሄ ጎሊያን አቃናዋ፤ ኮዬናዋ ገደፒ፣ ሂንቴንቱ ሳርታይ ሂንቴንቶ ሲማናዋ።⁷ ሄ ጎሊያን ኡንቴንቶ ዴዲያዋፒ ሚዲኔ ኡሺዴ ዴዲሺቴ፤ አሳንቻው አ ዲርጉዋ ጩጋይ ኮሺ፤ እቲ ጎሊያፒ ሃራ ጎሊያ ዩዮፒቴ።

⁸ «አይ ካታማኔ ሂንቴንቱ ጌሊያ ዋዴ፣ አሳይ ሂንቴና ሞኪ አኪዴ ሚዛናው ሺሾዋ አያኔ ሚቴ።⁹ ሄ ካታማቲን ዴዲያ ሃርጋንቻቱዋ ፓሌዴ አሳው፣ ሦሳ ካወቲላይ ሂንቴኮ ማቴዳ፣ ያገደ ኦዲቴ።¹⁰ ዬወዋን ቃሲ አይ ካታማኔ ጌሎዴ፣ አሳይ ሂንቴንታ ሞኪ አኬናዋንታ ገደፒ ሄ ካታማ ቃቆኮ ኬሲኔ።¹¹ ሱኒ ሂንቴና ዬላያናው፣ ሃራይ አቶ ኑ ጌዲያ ቦላን ዴዲያ ሂንቴንቱ ካታማ ባናካ ሂንቴንቶ ቆቆፌቶ ል፤ ዬወዋን ቃሲ፣ ሦሳ ካወቲላይ ሂንቴንቱኮ ማቴዳዋ ኤሪቴ» ያገቡ።¹² ፒርዳ ጋላሲ ሃ ካታማቲፒ ሶዶማ ካታማ ጋኬዳ ሙራይ ካወሻናዋ ያጋዴ ታኒ ሂንቴው ኦዲይ።

አማኔናን ኢዪዳ ካታማቱዋ
(ማት 11:20-24)

¹³ «አዬ ኔው ኮራዚኔ፤ አዬ ኔው ቤቴሳይዴ፤ ሂንቴንቱን ሃኔዳ ማላታቱ ዲርሳ ካታማኒኔ ሲደና ካታማን ሃኔዴንቶ፣ ሃዋን ዴዲያ አሳቱ ካዩዋ ማዩዋ ማዩዴ፣ ቢዲንሳ ቦላን ኡቲዴ፣ ቤኒፒ ባሬንቱ ናጋራፒ ሲማናዋንታሺን።¹⁴ ሃዋ ዲራው፣ ሙሬቲያ ጋላሲ ሂንቴንቱፒ አሊዴ ዲርሳ ካታማዉኔ ሲደና ካታማው ሙራይ

10:3 ማት 10:16 † **10:4** አሳና ሳርቴቲዳ ኦጊያን ዋዲያ ወርሶፒቴ። ሄ ጋላሳን ጋራቲላን ኡዲያ ሳርታይ ዋዲያ ሎይሊ ሚያ ዲራው፣ ሃዋ ሃሳዬቴዳ። **10:4** ማት 10:7-14፤ ማር 6:8-11፤ ሉቅ 9:3-5 **10:7** 1ቆር 9:14፤ 1ዪሞ 5:18 ‡ **10:9** ሦሳ ካወቲላይ ሂንቴኮ ማቴዳ፣ ሃዋ ጉሳይ፣ «ሦሳ ካወቲላይ ሃዋን ዋይ ሂንቴንቱ ገደን ዴዴ» ጉሳ። § **10:11** ባናካ ሂንቴንቶ ቆቆፌቶ፣ ሃዋ ጉሳይ፣ ኢጱዋ ቤሲያዋ። **10:11** ኪት 13:51 **10:12** ዶሞ 19:24-28፤ ማት 10:15፤ 11:24

ካወሻናቸው። 15 ሃኔ ቁፊሪናሆሜ፣ ኔኒ ሳሉዋ ፑዴ ዶቁ ጋናው ከያዲ? ዲጌ ሲያሊያ ዋዳናሳ።

16 «ሂንቴንቱ ጊያዋ ሲሲያ ኣሳይ፣ ታኒ ጊያዋ ሲሲ፤ ሂንቴንታ ኢዲያ ኡራይ ታና ኢዳ፤ ታና ኢዲያ ኡራይ ታና ኪቴዳዋካ ኢዳ» ያጌዳ።

እ ካሊያዋንቱ ኪቴዳሳፔ ሲሜዲኖ

17 ላፑን ታሙ ኣሳቱካ፣ «ጎዳው፣ ኢታ ኣያናቱካ ኔ ሱንላን ኑሲ ኣዛዜቴዲኖ» ያጌዴ ናሼቻን ሲሜዲኖ።

18 ዩሱሲካ ኡንቱንቶ፣ «ሴፃናይ ዋልቃንላዳን ሳሉዋፔ ዋዲሺን ቤዓዲ። 19 ሲሚ ሾሻኔ ሶጉዋ ዩዳናዳን ሂንቴንቱ ሞርኪያ ፃላሂያ ዋልቃ ፆናና ማላ ማታ ኢማዲ። ሂንቴንታ ቆሃናዌ ኣይኔካ ዴዔና።

20 ጊደፔ ኣቲን ሂንቴንቱ ሱንላይ ሳሉዋ ማዚጎቢያን ፃፊቶ ዲራው፣ ናሼቴቴፔ ኣቲን ኢታ ኣያናቱ ኣዛዜቶ ዲራው ናሼቶፒቴ» ያጌዳ።

ዩሱሲ ባሬ ናሼቻ ቆንጨሴዳ

(ማት 11:25-27፤ 16:13-17)

21 ሃ ዋዲያን ዩሱሲ ኣያና ጌሻን ዳሮ ናሹቲዴ፣ «ሳሉዋኔ ሳዓ ጎዳው፣ ኔኒ ሃ ዩጫዋ ታማሮዋንቱፔኔ ኣቶ ኤራንቻቱዋፔ ጌንላዴ፣ ቁሪ ናናው ቆንጨሴ ዲራው፣ ኔና ጋላታይ፤ ኤ፣ ታ ኣቦ፣ ኣዪሲ ጎፔ፣ ሃዋ ኦላናው ኔ ሎፆ ሼኔ ጊዴዳ።

22 «ኡባ ዩጫ ታው ታ ኣቡፔ ኢሜቴዳ። ናዓይ ኦኔንቶ ኣወዋፔ ኣቲሺን ኦኔኔ ኤሪያዌ ባዋ፤ ሃዋዳንካ ኣዉ ኦኔንቶ ናዓፔኔ ኢ ቆንጨሳናው ኮኖ ኡራፔ ኣቲን፣ ሃራይ ኦኔኔ ኤሪያዌ ባዋ» ያጌዳ።

23 ካሊዴካ ዩሱሲ ባሬና ካሊያዋንቱኮ ሲሚ ዋዲዴ፣ ኡንቴንቱ ፃላላ፣ «ሂንቴንቱ ቤዒያዋ ያሊያ ኣይፋቱ ኣንጃቴዳዋንታ። 24 ታ ሂንቴው ኦዲያዌ ኣዬ ጎፔ፣ ጮራ ናባቱኔ ካታቱ ሂንቴንቱ ቤዒያዋ ቤዓናው ኣሞቴዲኖሺን ቤዒቤይኪኖ፤ ሂንቴንቱ ሲሲያዋካ ሲሳናው ኣሞቴዲኖ፤ ሺን ሲሲቤይኪኖ» ያጌዳ።

ኣሳው ቃሬቲያ ሳማሪያ ቢታኒያ

25 ኢቲ ጋላሲ ሂጊያ ኤሪያዌ ኢቱ ዩሱሳ ፓጫናው ኣኮ ዪዴ፣ «ታማሪሲያዎ፣ ሜዲና ዴዑዋ ላታናው፣ ታኒ ኣያ ኡዶ?» ያጌ ኦቹዳ።

26 ዩሱሲ ዛሪዴ፣ «ሙሴ ሂጊያ ማፃፋን ፃፊቶዌ ኣዬ? ኔኒ ኣያ ጋዴ ቢላይ?» ያጌዳ።

10:15 ኢሳ 14:13-15 10:16 ማት 10:40፤ ማር 9:37፤ ሉቅ 9:48፤ ዮሀ 13:20

27 ቢታኒካ፡ «ሙሴ ሂጊያ ማፃፋይ፡ ሳሳ ኔ ጎዳ ፖሎ ኔ ዋዛና፤ ፖሎ ኔ ሸምፑዋ፤ ፖሎ ኔ ዋልቃቴኔ ፖሎ ኔ ቆፋቴ ሲቃ፤ ሄዋዳንካ ኔ ለጌላካ ኔ ሁጲያዳን ደሳ፤ ጌ» ያጌዳ።

28 ዩሱሲ ኣ፡ «ሊኬ፡ ቱሙዋ ጋዳ፤ ሲሚ ኔኒካ ሃዋ ኦላ፤ ደዑዋን ዳዓናሳ» ያጌዳ።

29 ሙሴ ሂጊያ ታማሪሲያ ቢታኒ ቃይ ባሪና ዓሎ ኦላናው ኮዪዳ ዩሱሳ፡ «ሃኖሺን፡ ታ ለጌላይ ኦኔ?» ያጌዳ ኦቹዳ።

30 ዩሱሲ ዛሪዳ፡ «ኢቲ ቢታኒ ዩሩሳላሜ፤ ኢያርኮ ቢዳ ዳዒሺን፡ ኦጊያ ቦላን ፓናቱ ኦ ዳሚዳ፡ ኦ ማዩዋ ቃሮዋ፤ ጉዬ ሸጪዳ፡ ሃይቃናው ፖሎ ጎዳ ኦሊዳ ቤዲና። 31 ቆፔናን ኢቲ ቁሳይ ሄ ኦጊያና ቢዳዒያዊ፡ ሸጪ፡ኩዳ ኩንዳዳ ቢታኒያ ቤዒዳ ዋዳ፡ ኦያኔ ኡዳናን ሚዪያና ኦቲዳ ቤዳ። 32 ሄዋዳንካ ኢቲ ሊዋ ሄ ኦጊያና ቢዳዒ። ኢካ ቢታኒያ ቤዒዳ፡ ሚዬቲ ኦቲዳ። 33 ሺን ሳማሪያ ኦሳ ጊዳዳ ኢቲ ቢታኒ፡ ሄ ባጋና ኦቲዳ፡ ሃ ቢታኒያኮ ዩዳ። ኦ ቤዒዳ ዋዳ ኦው ቃሪቱዳ። 34 ኦኮካ ሸቂዳ፡ ዛይቲያኔ ዋዪያ ኤሳ * ኦ ማይላን ቲጊዳ፡ ቃቹዳ። ሄዋ፤ ጉዬ ባሪ ሃሪያ ቶጊሲዳ፡ ኢማላይ ኦቂያ ጎሊያ ኦኪ ቤዳ፤ ሄዋን ቢዳዪዳ ናጌዳ። 35 ዋንቴላ ጋላሲ ጉላ ቢራ ባሪ ኪሲያ፤ ኪሲዳ፡ ኢማላይ ኦቂያ ጎሊያ ጎዳው ኢሚዳ፡ ሃ ቢታኒያ ታው ሎይላ ቢዳያ፤ ሃዋ፤ ዳሩዋ ኔኒ ኪሶ፤ ታኒ ሲሚያ ዋዳ ኔው ጪጋና» ያጌዳ።

36 «ሲሚ ሃ ሄዙ ኦሳቱዋ፤ ፓናቱዋ ኩሺያን ሸጪ፡ኩዳ ኩንዳዳ ቢታኒዳ፡ ለጌ ጊዳዳዊ ሃቃዋ ማላቲ?» ያጌዳ።

37 ሂጊያ ታማሪሲያዊካ፡ «ሄ ኦው ቃሪቶዋ» ያጌዳ። ዩሱሲካ ኣ፡ «ሲሚ ባዳ ኔኒካ ሃዋዳን ኦላ» ያጌዳ።

ዩሱሲ ማርቲኔ ማይራሚ ሶይ ቤዳ

38 ዩሱሲ ባሪና ካሊያዋንቴና ኦጊያ ቢዳ፡ ኢቲ ሄራ ጋርሳ ጋኬዳ። ሄዋን ማርቶ ጌቲቲያ ኢቲ ሚሺራታ ባሪ ጎሊን ሞካዳ።

39 ኢዚዉካ ማይራዋ ጌቲቲያ ሚቻታ ዳዓው፤ ሄናካ ዩሱሳ ጌዲያ ማታን ኡታዳ፡ ኢ ኦዲያዋ ሃይዛዳ ዳዓው። 40 ማርታ ቃይ ሶይባ ጊጊሳዳ ዳቡራ ዳዓው፤ ሄዋ ዲራው ዩሱሳኮ ሸቃዳ፡ «ሃና ታ ሚቻታ፡ ኪታ ኡባ ታ ቦላ ኦሊና፡ ታኒ ታሪካ ለባኖዳ ያላዳ ጮው ጋይ? ሃያና ታና ማዳናዳን ኢዚው ኦዳ» ያጋዱ።

10:27 ዋግ 19:18፤ ዛር 6:5 10:33 2ኦድ 28:15 * 10:34 ዛይቲያኔ ዋዪያ ኤሳ፡ ኦራሳ ጫቁዋ ዋዲያን ሃዋንቴ ዳሊያዋንጋ ጌቲቲዳ ኦኪቲና። ኡባ ሃዋን ፃሬቲዳ ዛይቲ፡ ኦራሳ ዳሊያ ማላታ ጌቲቲ። ያይ 5:14 ያሊቲ። 10:38 ዮሀ 11:1

41 ዩሱሲካ ዛሪዴ ኢዞ፡ «ማርቴ፣ ማርቴ፣ ኔኒ ጮራ ዩወዋ ቆጋዴ ሂርጋ፤ ቃሲካ ማቶታ። 42 ሺን ኮሺያዌ ኢቲባ፤ ማይራማ ባሪፔ ኦኒኔ ኣከና ሎዖባ ዶራዱ» ያጌዳ።

11

ዩሱሲ ዋሳባ ታማሪሴዳ

(ማት 6:9-13፤ 7:7-11)

1 ኢቲ ጋላሲ ዩሱሲ ኢቲሳን ዋሳ ዋሲ ዴዔ። ዋሳ ወርሶዋፔ ጉዩ ኣ ካሊያዋንቱፔ ኢቱ፡ «ጎደው! ዮሃንሲ ባሪና ካሊያዋንታ ዋሳ ታማሪሶዋዳን፣ ኦናካ ኔኒ ዋጊ ዋሳኔንቶ ታማሪሳ» ያጌዳ።

2 ኢካ ኡንቱንታ፡ «ዎሳ ዋሲዴ ያጊ ዋሲቱ፡ ሳሉዋን ዴዒያ ኦ ኣቦ፡ ኔ ሱንሳይ ኣንጃቶ፤ ኔ ካወቱሳይ ዮ፤ ኔ ሺኒ ሳሉዋን ሃኖዋዳን ሳዓንካ ሃኖ፤

3 « ጋላሳን ጋላሳን ኮሺያ ቁማ ኡሲ ሃቼ ኢማ፤

4 « ሱኒ ኦና ናቄዳዋንቱዋ ኡባ ኣቶ ጎዋዳን፡ ኔኒካ ኦናቁዋ ኣቶ ያጋ፤

ኦና ኢታፔ ናጋፔ ኣቲን፡ ፓጪያን ጌልሶፓ) ያጊቴ» ያጌዳ።

5 ቃይካ ዩሱሲ ባሪና ካሊያዋንታ፡ «ሂንቱንቱፔ ኢቶ ሲቆ ላጊ ዴዒንቶ ጊዶ ቢላሂያን ኣኮ ዩዴ፡ ታ ሲቆ ላጌው፡ ታው ሄዙ ሶሉዋ ታልዓ፤ 6 ኣዩሲ ጎፔ፡ ኢቲ ታ ላጌሳይ ዩና ኣ ሚዚያዋ ቆያዲ) ያጊ ዋሲዳ ጎይቱ። 7 ባሪ ጎሌን ዴዒያ ኣ ሲቆ ላጊ ሶዩፔ ሃሳዩዴ፡ ታና ማቶሳፓ፤ ፔንጊ ቃሺቱዳ፤ ታናናይካ ታናና ጊሴዲኖ፤ ሄዋ ዲራው ታኒ ዴንዳዴ ኔው ኣይኔ ኢማናው ዴንዳይኬ) ጋናዌ? 8 ታኒ ሂንቱንቶ ኦዲያዌ ኣዩ ጎፔ፡ ኢ ኣው ሲቆ ላጊያ ጊዶ ዲራው፡ ኢሜኔንቶኔካ ኡንዔሶ ዲራው ኢ ኮዩያዋ ኡባ ኢማ። 9 ሃዋ ዲራው፡ ሰሲቱ፡ ሂንቱንቶካ ኢሜታናዋ፤ ኮዩቱ፡ ዴማኒታ፤ ካሪያ ዩዴ ያሲቱ፡ ሂንቱንቶ ዶዩታናዋ) ያጋይ። 10 ጋሱካ፡ ዋሲያ ኡባይ ኣካናዋ፤ ኮዩያ ኡራይካ ዴማናዋ፤ ካሪያ ዩዴ ያሲያ ኡራው፡ ካሪ ዶዩታናዋ።

11 «ሂንቱንቱ ጊዶፔ ባሪ ናዓው፡ ዋሊያ ዋሲና ሾሻ፡ ቁማ ኢማ ጊና ሹታ ኢሚያ ኣዉ ዴዒ? 12 ዋይ ቁቁሊያ ዋሲና ሶጉዋ ኢሚዬ? 13 ሂንቱንቱ ኢታ ጊዲ ዴዒዴ ሂንቱንቱ ናናው

ሎዎባ አሚያዎ ኤሮፔ፣ ያቲና ሳሉዋን ዳዒያ ሂንቲንቱ አዉ ባሬና ዋሲያዋንቶ ኣያና ጌሻ ዋቲ ዳሪሲዳ አሚንዳሻ?» ያጌዳ።

ዩሱሳኔ ቢዔል-ዘቡላ
(ማጥ 12:22-30፤ ማር 3:20-27)

14 ኣቲ ጋላሲ ዩሱሲ ኣቲ ቢታኒያፕ ዲዲሲያ ኣያና ኬሶዋፕ ጉዬ ዲዳ ቢታኒ ሃሳያ ደሚና፣ ኣሳይ ማላሌቲዳ። 15 ሺን ኢንቲንቲፔ ኢቱ ኢቱ፣ «ጋሌናቲዋ ካፑዋ ቢዔል-ዘቡላ ኣው ዋልቃ አሚና ጋሌናቲዋ ኬሴ» ያጌዲና።

16 ኢቱ ኢቱ ቃሲ ዩሱሳ ፓጫናው ሳሉዋፕ ማላታ ቤሳናዳን ኣፔ ኮዬዲና። 17 ሺን ዩሱሲካ ኢንቲንቲ ቆፋ ኤሪዳ ኢንቲንታ ሃዋ ያጌዳ፣ «ባሬ ጊዶን ሻኬቲያ ካዉቲላይ ኡባይ ጳያናዋ፤ ሻኬቲያ ጎሊካ ኩንዳ። 18 ያቲና ሴፃና ካዉቲላይ ባሬ ጊዶን ሻኬቶፔ ኣ ካዉቲላይ ዋቲ ኤቃናዊ? ሂንቲንቲ ታና፣ ሳላሂያ ካፑዋ ቢዔል-ዘቡላ ኔው ዋልቃ አሚና ኬሳ» ያጌ ሃሳዪታ። 19 ሲሚ ታኒ ቢዔል-ዘቡላ ዋልቃን ጋሌናቲዋ ኬሲያዋ ጊዶፔ ሂንቲንቲ ናናይ ኦ ዋልቃን ኬሳናዋንቲ? ሃዋ ጊዲያ ዲራው፣ ኢንቲንቲ ሂንቲንቲ ቦላን ፐርዲያዎንታ ጊዳናዋንታ። 20 ሺን ታኒ ጋሌናቲዋ ኬሲያዊ ያሳ ዋልቃና ጊዶፔ፣ ሲሚ ያሳ ካዉቲላይ ሂንቲንቲኮ ዩዳዋ ኤሪቲ።

21 «ዋልቃማ ኣሳይ ቤሲያዋዳን ሚኒዳ ባሬ ጎሊያ ናጎፔ፣ ኣ ሻሉ ሎይሊ ናጎታናዋ። 22 ዩዉዋን ቃሲ ኣፔ ሚኑዋ ዳሪያዊ ዪዳ ኣ ቆሆፔኔ ያናፔ ኢ ኣማኔቲዳ ቶራኔ ጎንዳሊያ ኣፔ ዋሊ ኣኪዳ፣ ኣው ዳዒያ ሚሻ ጊሼቲ ኣኬ።

23 «ታ ባጋ ጊዳናዊ ታናና ኤቁቲ፤ ታናና ሺሺ ቤናዊካ ላሌ።

ቱና ኣያናይ ካሴ ዩጊ ቤዳ ኣሳኮ ሲሚዳ ዪያ ጋሱዋ
(ማጥ 12:43-45)

24 «ቱና ኣያናይ ኣሳፔ ኬሴዳ ዋዳ፣ ባሬው ሸምፒያሳ ኮዪዳ፣ ሃላይ ባንታሳና ኣቋ ቤ። ሸምፒያሳ ዳሚናን ኣቶፔ፣ ሳታኒ ካሴ ዩጋ ኬሴዳ ታ ጎሊያ ሲማና» ያጌ፤ 25 ሲሚያ ዋዳካ ጎሊ ፒቲቲዳ ጊጎዋ ደሚ። 26 ሄዋፔ ካላ፣ ቢዳ ሃራ ኣፔ ኢታ ላፑ ቱና ኣያናቲዋ ኣኪ ያ ጌሊዳ፣ ሄዋን ዳዒና፤ ሄ ቢታኒያ ዳዑ ኮይሮዋፔ ካላዊ ኢቶዋ ጊዳ» ያጌዳ።

27 ዩሱሲ ሃዋ ሃሳይ ዳዒሺን፣ ኣቲ ሚሺራታ ጮራ ኣሳ ጊዶፔ ባሬ ኮሻ ጶቁ ኦላዳ፣ «ኔና ዩሌዳዉናኔ ጳንጱዳ ኔ ዲያ

አንጃቴዳዉና» ያጋዲ። 28 ዬሱሲ ቃሲ፥ «አንጃቴዳዋንቱ ያሳ ቃላ ሲሲዴ አዛዜቲያዋንታ» ያገ ማሪዳ።

ያሳፔ ኦሴቶ ማላታ

(ማጥ 12:38-42፤ ማር 8:12)

29 ጮራ አሳይ ሸቆ ዋዴ ዬሱሲ፥ «ሃ ዬሌታይ ኢታ፤ ኦራላ ማላታ ኮዬ፤ ሸን ናቢያ ዮናሳ ማላታፔ ሃራይ አሜቲና። 30 ጋሱካ ዮናሲ ኔኔዌ ካታማ አሳው ማላታ ገደዋደን፥ ታኒ፥ አሳ ናዳይካ፥ ሃ ዬሌታው ማላታ ገደና። 31 አዋይ ሞኪያሳ ያሊያ ዋዴ፥ ኡሽቻ ዲገባጋና ዴዒያ ጋዲያ ካታታ ሰሎሞኔው ዴዒያ አቶ ኤራቲላ ሲሳናው ቢታ ጋፃፔ ዬዳ ዲራው፥ ፐርዳ ዋዴ ሃ ዬሌታን ዴንዳዴ ፐርዳናዉኑ፤ ቤዒቲ፥ ሰሎሞኔፔካ አቋያዌ ሃዋን ዴዒ። 32 ኔኔዌ አሳይ ፐርዳ ዋዴ ሂንቲንቲ ቦላ ዴንዲዴ ፐርዳናዋንታ፤ አያው ጎፔ፥ አንቲንቲ ዮናሲ ኦዶዋ ሲሲዴ ባሪንቲ ናጋራ ፓዲ ሲሜዳ ዲራሳ፤ ቤዒቲ፥ ዮናሳፔ አቋያዌ ሃዋን ዴዒ።

ቦላ ፖሲሲያ ያምፒያ

(ማጥ 5:15፤ 6:22-23)

33 «ሶይ ጌሊያ አሳው ፖዳናደን፥ ያምፒያ ያምፒዴ ቋቃሳን ዋላናፔ አቲን፥ ጌማሳን ዋይ ፖውዋ ካሚያ ዬወዋፔ ጋርሳና ዋሊያዌ አኒኔ ባዋ። 34 ኔ አሳቲላው ኔ አይፊ ያምፒያ ማላ፤ ኔ አይፊ ፓፃ ገደፔ ኔ ኩሜንላ አሳቲላይካ ፖውዋ ዴሜ፤ ሸን ኔ አይፊ ሃርጎፔ ኔ ኩሜንላ አሳቲላይካ ቋማ። 35 አኬካ፤ ሄዋ ገዲያ ዲራው፥ ኔ ጋርሳን ዴዒያ ፖው ቋሜናደን ናጌታ። 36 ሲሚ ኔ አሳቲላይ ኡባይ ፖውዋን ኩሜዳዋ ገደፔ፥ ቋሜዳ አሳቲላይ ኔናን ባይናዋ ገደፔ፥ ኔ አሳቲላይ ኡባይ፥ ያምፒ ባሬ ፖውዋ ኔ ቦላን ፖሲሲያዋደን፥ ኔ ቦላን ዋጋጋ ፖውዋ ገደናዋ» ያጌዳ።

ዬሱሲ ፓሪሳዋቲዋኔ ሙሴ ሂጊያ ታማሪሲያዋንታ ኩናኔዳ

(ማጥ 23:1-36፤ ማር 12:38-40፤ ሉቅ 20:45-47)

37 ዬሱሲ ሃሳያ ወርሶዋፔ ካላ፥ አቲ ፓሪሳዌ ቢታኒ ባሬ ጎሌን ቁማ ማናደን አታሌዳ፤ ዬሱሲካ አቲፔ ጌሊዴ ጋዪታን ኡቲዳ።

* 38 ፓሪሳዊካ ዬሱሳ ቁማ ማናፔ ካሲያን ኩሺያ ሜጨቲ ቤናዋ ቤዒዴ ማላሌቲና፥ 39 ጎዳይካ፥ «ሂንቲንቲ ፓሪሳዋቲ፥ ፀዓኔ ሻታ ቦላ ባጋ ጌሺታ፤ ሸን ሂንቲንቲ ጋርሳይ ኡዚያኒኔ

11:29 ማጥ 16:4፤ ማር 8:12 11:30 ዮን 3:4 11:31 1ካጥ 10:1-10፤ 2ኦድ 9:1-12 11:32 ዮን 3:5 11:33 ማጥ 5:15፤ ማር 4:21፤ ሉቅ 8:16

* 11:37 ጋይታን ኡቲዳ፥ ቁማ ማናው ኡቲዳ ጉሳ።

ኢታቱላን ኩሚዳ። 40 ሂንቴንቶ ኤያቶ! ቦላ ባጋ ሜዴዳዋ ጋርሳ ሜዲቤኔ? 41 ሺን ሂንቴንቱ ፀዓኒኔ ሻታ ጋርሳን ዴዲያዋ ሂዩሳቶ ኢሚቴ፤ ሄዎዴ ኡባባይካ ሂንቴው ጌሻ ጊዳናዋ።

42 «ሺን ሂንቴንቶ ጋርሳዋቶ፣ ሂንቴው አዬ! አያው ጎፔ፣ አኑጋፔኔ ፃሎቴያፔ፣ አጉፒያ ደዑዋፔ፣ ታሙ ኩሺያፔ ኢቲ ኩሺያ ጾሳው ኢሚታ፤ ሺን ቱሙ ፐርዳኔ ጾሳ ሲቋያዋ ሂንቴንቱ አጊታ። ዬወዋን ቃሲ ሄዋ አጌናን ሃዋ ኦላናው ቤሴ።

43 «ሂንቴንቶ ጋርሳዋቶ፣ ሂንቴው አዬ! አያው ጎፔ፣ አዪሁዳ አሳ ዋሳ ጎሌን ቦንቾ ኡቱዋ፣ ጌያ ጊዶኒካ ቦንቾ ሳርታ ኮዪታ።

44 «አሳይ ኤሬናን ቦላና ሃሚቲያ ቤቴና ዲፉዋ ማላቲያ ዲራው ሂንቴው አዬ!» ያጌዳ።

45 ሙሴ ሂጊያ ታማሪሲያዋንቱፔ ኢቱ፣ «ታማሪሲያዋ፣ ኔኒ ሃዋ ያጋ ሃሳዮ ዲራው ኑና ቦራዳ» ያጊ ዛሬዳ።

46 ዬሱሲ፣ «ሂንቴና ሂጊያ ኤሬያዋንቶ፣ ሂንቴው አዬ! አያው ጎፔ፣ አሳይ ቶኪዳ ዳንዳዬና ዴያ ቶኩዋ ሃራ ቶሲታ፤ ሺን ሂንቴንቱ ሂንቴ ሁጴው ቢራዲያንካ ቦቹኪታ።

47 «ሂንቴንቱ አዎቱ ዋዴዳ ናባቱዋ ዲፉዋ ሎይሲያ ዲራው ሂንቴው አዬ! 48 ሲሚ ሂንቴንቱ አዎቱ ናባቱዋ ዋዴና፣ ሂንቴንቱ ኡንቱንቱ ዲፉዋ ቦላን ጎሊያ ኬዲያ ዲራው፣ «ናባቱዋ ኦሱ ሎዓ» ያጊዴ፣ ኡንቱንቱዋ ማርካቲታ። 49 ሃዋ ዲራው፣ ጾሳ አዶ ኤራቴላይ፣ «ታኒ ናባቱዋኔ ዬሱሲ ከቶዋንታ ኡንቱንቱኮ ከታና፤ ኡንቱንቱካ ሄዋንቱፔ ኢቱዋ ኢቱዋ ዋዳናዋንታ፤ ኢቱዋ ኢቱዋ ሚቶላናዋንታ» ያጌዳ። 50 ሃዋ ጊዲያ ዲራው፣ ሃ አላሚ ሚዴቶዳፔ ደሚዳ ጉኬዳ ናባቱዋ ሱላው ሃ ዬሌታይ ኦሼቴ። 51 አቤላፔ ደሚዳ ያርሹዋሳፔኔ ጌሻ ጎሊያፔ ጊዲዋን ጉኬዳ ዛካራሳ † ሱላ ጋካናው ኮዬቴ። ኤ! ታኒ ጋይ፤ ሃ ዬሌታይ ሃዋ ኦሼቴያዋ።

52 «ሂንቴንቶ ሙሴ ሂጊያ ኤሬያዋንቶ፣ ሂንቴው አዬ! አያው ጎፔ ኤራ ፔንጊያ ደዪያ ቁልፒያ አኬዲታ። ሂንቴንቱ ሂንቴ ሁጴዉካ ጌሊቤይኪታ፤ ቃሲ ጌላናው ኮዪያዋንታካ ዲጌዲታ» ያጌዳ።

11:42 ዋግ 27:30 † 11:51 አቤላፔ ደሚዳ ... ዛካራሳ፡ አዪሁዳቱዋ ማፃፋቱዋ ጋርሳን ደሚላ ማፃፋይ ኮይሮ ማፃፋ። ኢካ፣ አቤሊ አሳ ኡባፔ ኮይራዋን ኢሻይ አ ዋዴዳዋ ኦዴ። አዪሁዳቱዋ ጌሻ ማፃፋቱዋን ወርሴላ ማፃፋይ ላዒሊያ ኦዲዋ ማፃፋ። ሄ ማፃፋን ዛካራሲ ወርሴላን ሃይቄዳዋ ኦዲያ ዲራሳ ሉቃሲ አቤላፔ ዛካራሳ ጋካናው ጌዳዌ።

53 ዩሱሲ ሄዋጥ ከሶዋጥ ጉዩያን፣ ሂጊያ ታማሪሲያዋንቱኔ ፓሪሳዋቱ ኣ ኣሻን ኡርጉንሉሳኔ ኤቁቱሳ ደሜዲኖ። 54 ኣ ደናፕ ሎዔናባይ ከሶፕ ኣይቃናው ጌዲኖ፤ ሺን ዳሚቤይኪኖ።

12

ሎዓ ማላቲያ ኢታቴላፔ ናጌታና ማላ ሴራ
(ማት 10:26፣ 27)

1 ሄ ዋዲያን ጮራ ሻዓን ፓይዴቲያ ኣሳይ ኢቱ ኢቱዋ ዩቆና ጋካናው ሸቁ ዳዒሺን፣ ዩሱሲ ባሬና ካሊያዋንቶ ኮይሮ ኦዳናው ደሚዳ። «ፓሪሳዋቱዋ ኢርሹዋፔ ናጌቲቲ፤ ሃዌካ ሎዓ ማላቲያ ኡንቲንቲ ኢሚያ ኢታ ቲሚርቲያ። 2 ሺን ኣያኒኔ ካሜቲዳ ዩዉ ቆንጩያ ከሴናን ኣቲና፤ ቃሲካ ገሚዳ ዩዉ ኤሬቴናን ኣቲና። 3 ሄዋ ዲራው ሂንቲ ቋማኒ ሃሳዮዌ ኡባይ፣ ጋላሲ ፖዑዋን ሲሴታናዋ፤ ሂንቲንቲ ኣሳይ ባይናሳን ሂኒ ጊሶ ጎሊያን ሃይላን ሳሱኮዌ ኡባይ ቶቁ ጌዳ ሲሴቲያ ቆንጩሳን ኣዋጃታናዋ።

ኢቲ ያሳ ፃላላው ያያና ቤሴ
(ማት 10:28-31)

4 «ታናዳን ኣማኒያዋንቶ፣ ታኒ ሂንቲው ያጋይ፤ ሃዒ ኣሹዋ ዋዲያዋንታ፣ ሄዋፔ ካላ ቃይ ኣያኔ ኦላናው ዳንዳይናዋንታ ያዮፕቲ። 5 ዩዉዋን ቃሲ ሂንቲንቲ ኦሲ ያያናው ቤሴንቶ ታኒ ሂንቲንታ ኤሪሳና፤ ሄዌካ ዋዲዋፔ ጉዩያን ጋናሚያን ኦላናው ማታይ ዳዒያ ያሳ ፃላላው ያዩቲ፤ ኤ፣ ኣው ያዩቲ ያጋይ።

6 «ኢቲሹ ሱኒያ ካፋቲ ሳንቲሚያን ሻሚቲኪኖ? ሄዋንቲፔ ኢቲኖኔ ኡሳ ያሳይ ደጌና። 7 ሺን ሃራይ ኣቶ ሂንቲንቲ ሁጲያን ዳዒያ ቢናናይ ኡባይካ ፓይዴቲዳዋ፤ ሃዋ ዲራው ያዮፕቲ፤ ሂንቲንቲ ጮራ ሱኒያ ካፋቲዋፔ ዳሪታ።

ዩሱሳን ኣማኒያዋንታኔ ኣ ኢዲያዋንታ
(ማት 10:32፣ 33፤ 12:32፤ 10:19፣ 20)

8 «ታኒ ሂንቲው ኦዳይ፤ ታባ ኣሳ ሲንላን ማርካቲያዋ ኦሲኔ ታኒካ ኣሳ ናዓይ፣ ቃሲ ያሳ ኪታንቻቱዋ ሲንላን ማርካታና፤ 9 ሺን ኣሳ ሲንላን ታና ካዲያዋንታ ታኒካ ኣሳ ናዓይ፣ ቃሲ ያሳ ኪታንቻቱዋ ሲንላን ካዳና።

10 «ታ ጦላ፣ አሳ ናዓ ጦላ፣ ቦሪያ ቃላ ሃሳዬያዌ ዴዖፔ ኣ ናቁ ኣቶ ጌቴታና፤ ሺን ጌሻ ኣያና ጦላ ቦሪያ ቃላ ሃሳዬያዌ ዴዖፔ ቃይ ኣ ናቁ ኣቶ ጌቴቴና።

11 «አሳይ ሂንቴንታ ኣዪሁዳ ዋሲያ ጎሊያኮ፣ ጋዲያ ኣዪሲያዋንቴኮኔ ማታይ ዴዲያዋንቴ ሲንሳ ፐርዳሲ ሺሺያ ዎዴ፣ «ዋጊ ዛራኔሻ? ዎይ ኣያ ጊዴ ሃሳያኔሻ?» ያጊዴ ሂርጎፐቴ፤ 12 ኣያው ጎፔ፣ ሂንቴና ኣያና ጌሻይ ሂንቴንቴ ሄ ሳቴያን ሃሳያናው ቤሲያባ ታማሪሳናዋ» ያጌዳ።

ዱሬ ቢታኒያ ቦዛቴላ ኦዲያ ሌሚሱዋ

13 አሳ ጋርሳፔ ኢቲ ቢታኒ ዩሱሳ፣ «ታማሪሲያዎ፣ ኑ ኣቡ ሃይቁና ኑኒ ላታና ማላ ኣቴዳባ፣ ታው ጊሻና ማላ ሃያጎዶ ታ ኢሻው ኦዳ» ያጌዳ።

14 ዩሱሲ ቃይ፣ «ሃ ቢታኔው፣ ሂንቴንቴ ቦላን ፐርዲያዎ ጊዳናዳኔ ሄዎ ሂንቴው ጊሻናዳን ታና ኦኔ ሱንፊዳዊ?» ያጌዳ።

15 ጉጂዳካ ኡባቱዋ፣ «አሳ ሽምፑዋሲ ሻሉዋ ዱሬቴላይ ዴዑዋ ኢማና ዲራው፣ ያሬቴያዎፔኔ ዮራቴያዎፔ ናጌቴቴ፤ ዱሬቴላ ኣሙዋ ኡባፔካ ሂንቴና ናጌቴ» ያጌዳ።

16 ካሊዳካ ሃዎዳን ያጊ ሌሚሱዋ ኡንቴንቶ ኦዳዳ፣ «አው ዴዲያ ቢታይ ዳሪሲዴ ካላ ሞኬዳ ኢቲ ዱሬ ቢታኒ ዴዴ። 17 ሃ ቢታኒ፣ ታው ታ ካላ ዎላናው ጊዲያ ሳዓይ ባንታዎ ዲራው ኣያ ኡዶሻ?» ያጊዴ፣ ባሬ ዎዛናን ቆፔዳ፤ 18 ሃዎዳን ያጊ ማሌዳ፤ ታኒ ዎታኔ ጎፔ፣ ታው ዴዲያ ዩሲያ ኮላዳ፣ ሃራ ኣኪያ ዩሲያ ማዳና ያጊዴ ማሌዳ፤ ሄዋን ታ ካላኔ ታው ዴዲያ ሚሻ ኡባ ዎላና። 19 ያታዴ ታና፣ «ኔ ካጫይ ዳር ሎዓ፤ ኔው ዳር ዎዲያሲ ጊዲያ ማፀዎ ሺሻዳ፤ ሲሚ ሽምፓዴ ማ፣ ኡሻ፣ ናሽታ» ጋና ያጌዳ።

20 «ሺን ያሳይ ኣ፣ «ሃ ቦዛው፣ ሃቼ ቃማ ኔኒ ሃይቃ። ያቲና ሃ ኔኒ ሺሽዳ ማፀ ኡባይ ኦሲ ጊዳናዊ?» ያጌዳ።

21 «ባሬው ቢታ ጦላን ሻሉዋ ሺሺያዌ፣ ያሳ ሲንላን ቃይ ማንቆ ጊዴዳ ኣሳይ ሃሲታኒያ ማላ» ያጌዳ።

ኡባ ዎዴ ያሳን ኣማኔቴሳ ኮሺ (ማት 6:25-34)

12:10 ማት 12:32፤ ማር 3:29 12:12 ማት 10:19-20፤ ማር 13:11፤ ሉቅ 21:14-15

22 ሃዋጥ ካላ ዩሱሲ ባሬና ካሊያዋንታ፡ «ሃዋ ዲራው፡ ታ ሂንቲው ኦዲይ፡ ሂንቲንቱ ፓፃ ዳዓናው ኣያ ማኔ? ሂንቲንቱ ቦላሲ ኣያ ማያኔ? ያጊዴ ሂርሳፒቲ።

23 «ጋሱካ፡ ሺምፑ ቁማፔ፡ ቃሲ ኣሳቲላይ ማዩዋፔ ኣጼኔ?

24 ኣኔ ቁራቱዋ ፃሊቲ፤ ኡንቲንቱ ዜሪኪኖ፤ ጫኪኪኖ፤ ኡንቲንቶ ካላ ሺሺያ ሳዓይ ዎይ ዩሲ ባዋ፤ ሃኖፔ ኣቲን፤ ኡንቲንታ ያሳይ ሚዜ፤ ሂንቲንቱ ካፋቱዋፔ ዳሮፔ ዳሪኪቲ? 25 ሂንቲንቲፔ ዳሪ ቆፒዴ ዳሮ ዎዲያ ዳዓናው ዳንዳዪያዎ ኦኔ?

26 «ሲሚ ሂንቲንቱ ሃ ላፋባ ኦላናው ዳንዳዪያዋንታ ጊዶፔ ኣያው ሃራባው ሂርጌቲቲ? 27 ጨሻቱ ዎቲ ዲጨኖንቶ ኣኔ ፃሊቲ፤ ኡንቲንቱ ኪታን ዳቡሪኪኖ፤ ፑቱዋ ሱቂኪኖ፤ ጊዶሺን ታኒ ሂንቲው ኦዲያዎ፡ ሶሎሞኔ ሃዋ ከና ቦንቼቲዳዋ * ጊዲዴ፡ ሄ ጨሻቱዋፔ ኢቱዋ ማላኔ ማዪቤና። 28 ሂንቲንቶ ላፋ ኣማኑ ዳዒያዋንቶ፡ ያቶፔ ያሳይ ሃቼ ቤቲዴ፡ ዎንቲ ታማን ኤፃናው ኦሌቲያ፡ ዳንባን ደሊያ ማታ ሃዋዳን ማዪዚያዋ ጊዶፔ፡ ሂንቲንታ ዎቲዴ ኡንቲንቲፔ ኣሊዴ ማዪዜኔ?

29 «ሃዋ ዲራው፡ (ኣያ ማኔ? ኣያ ኡሻኔ?) ያጊዴ ኡባ ዎዴ ኮዮፒቲኔ ሂርሳፒቲ። 30 ኣያው ሳፔ፡ ሃዋ ዳማናው ሃ ኣላሚያን ዳዒያ ያሳን ኣማኔቲና ኣሳይ ሂርጌቲኖ። ሂንቲንቶ ሃዌ ኡባይ ኮሺያዋ ሳሎዋን ዳዒያ ሂንቲንቱ ኣዉ ኤሬ። 31 ሃዋ ሃኒያዋ ኣጊዴ፡ ያሳ ካዉቲላ ኮዪቲ፤ ኢ ሂንቲንታ ኮሺያዋ ኡባ ኢማናዋ።

ሳዓን ባሬ ዲሬቲላን ኣማኔቶዌ ሳሎዋን ዎኒ?
(ማት 6:19-21)

32 «ሂንቲንቱ ጉላ ጊዲንቶኔ፡ ሳሎዋ ሂንቲንቱ ኣዉ ባሬ ካዉቲላ ሂንቲንቶ ኢማናው ናሹቲዳ ዲራው ያዮፒቲ።

33 «ሂንቲው ዳዒያዋ ዛለዒዴ ማንቆ ኢሚቲ፤ ካዪሱ ሺቄናሳን፡ ቢልዓይካ ሜናሳን፡ ሳሎዋን ዉሬና ሚሻ ዳጋዪዴ፡ ኤጨና ቃርጨታቱዋ ሂንቲንቱ ሁጹው ዎሊቲ። 34 ኣያው ሳፔ፡ ሂንቲንቱ ዎዛናይ ሂንቲ ሚሻይ ዳዒያሳን ዳዓናዋ።

ሚኖ ኦሳንቻ

35 «ሂንቲ ፃሳይ ዳንጨቶዋ፡ ሂንቲ ያምፒካ ፖዔዳዋ ጊዶ።

36 ሂንቲንቲቱካ፡ ባሬንቲ ጎዳይ ዪዴ ፔንጊያ ቆፃያ ዎዴ፡ ኤሌካ ደያናው ቡላቻፔ ሲማና ጋካናው ናጊያ ኦሳንቻቱዋ ማላቲቲ።

* 12:27 ሶሎሞኔ ሃዋ ከና ቦንቼቲዳዋ፡ ኣዪሁዳ ኣሳይ ሶሎሞኔ ባሬ ዳዒዳ ላይላ ኡባን ዳሮ ዲሬቲላን ዳዒዳ ጊዴ ቆፒኖ። 12:27 1ካት 10:4-7፤ 2ኦድ 9:3-6 12:35 ማት 25:1-13 12:36 ማር 13:34-36

37 ባሬንቱ ጎዳይ ሶይ ዩዳ ዎዴ ቤጎቲ ዴቢሽን ዴሚያ ሄ ኦሳንቻቱ ኣንጃቴዳዎንታ። ታኒ ቱሙዎ ጋይ፤ ኢ ኡንቱንታ፡ (ኡቲቲ) ጊዳ፡ ባሬ ዳንጩዎ ሚኒሲዳ ኡንቱንቶ ቁማ ኣሊዳ ሸባናዎ። 38 ጎዳይ ሄካ ቢላሂያን ዎይ ሄካ ቢላሂያፕ ካላ ዩዳ ዎዴ፡ ቤጎቲዳ ገንጪ ናጊዳ ቤቲያ ቆማቱ ኣንጃቴዳዎንታ። 39 ሃዎ ቃይ ኤሪቲ፤ ካዩሱ ኣይ ሳቲያን ዩንቶ ጎሊያዉ ኤሪንቶ፡ ጎሊ ቦኩቲያ ዎዴ ጮቡ ጊዳ ያሌናሺን። 40 ኣሳ ናዓይ ቆፔና ሳቲያን ያናዎ፤ ሂንቲንቱ ጊጌቲ ናጊቱ» ያጌዳ።

41 ጳጳርሲካ «ጎዳው፡ ሃ ለሚሱዎ ኔኒ ኦዲያዎ ኦፃላላሴ ሃራ ኡባሲካ ኢቲፔ ኦዳይ?» ያጌዳ።

42 ጎዳይካ፡ «ሲሚ ኡንቱንቱ ባሬ ሶይ ኣሳው ቁማ ኢማናው ቤሲያ ሳቲያን ኢማና ማላ፡ ኣ ጎዳይ ሱንሊያ ኣማኔቲዳኔ ኤሪንቻ ሚዚያ ቆማይ ኦኔ?» ያጌዳ። 43 ጎዳይ ሲሚያ ዎዴ ሃዎዳን ከቲቲና ዴሚያ ቆማይ ኢ ኣንጃቴዳዎ። 44 ታኒ ሂንቲው ቱሙዎ ኦዳይ፤ ዴሚያ ማፀዎ ኡባ ቦላን ኣ ሱንላናዎ። 45 ዩዉዎን ቃሲ ሄ ቆማይ፡ «ታ ጎዳይ ኤሌ ዩና፤ ጋሚዳናዎ» ያጊ ባሬ ዎዛናን ቆፖፔኔ ኣቱማኔ ማጫ ቆማቱዎ ሸቻ ደሞፔ፡ ቃይካ ኮዮዎዳን ሙሳኔ ኡሻ፡ ማሶቱሳካ ደሞፔ፡ 46 ሄ ቆማ ጎዳይ፡ ኢ ቆፔና ጋላሲኔ ሲጲቤና ሳቲያን ያናዎ፤ ሄ ዎዲያን ኣ ቃንጻሬሊዳ፡ ኣ ጊሹዎ ማዳራካ ኣማኔናዎንቱና ኢቲሳ ኡዳናዎ።

47 ባሬ ጎዳ ሼኒያ ኤሪዳ ጊጌናዌኔ ኣሼኒያዳን ከቲቲና ቆማይ፡ ኢ ኢታ ጶባ ጶቤታናዎ። 48 ኤሪቤናዌ ቃይ ጶቤታናው ቤሲያዎ ኡዴዳዌ፡ ጉላ ጶቤቲ። ዳሮባይ ኢሜቲዳ ኣሳ ኡባፔ፡ ኣፔ ዳሮባይ ኮዬቲ፤ ዎልቃማ ሃዳራይ ኢሜቶዎፔ፡ ኣፔ ዳሪሲዳ ኮዬቲ።

49 ዩሱሲ፡ «ታኒ ዩዳዌ፡ ሃ ሳዓ ቦላ ታማ ሳላናሳ፤ ሃዒካ ኤዴዳንቶ፡ ታና ኣይ ከና ናሹቻናዌሻ። 50 ታኒ ፃማቄታና ማቲዎ ዩንቃታይ ፖሌታና ጋካናው ዎናዴ ኡንዔታይታ! 51 ሃ ሳዓ ታኒ ዩዳዌ፡ ሳርቲዳ ኣሃናሳ ማላቲዬ? ሂንቲው ማላቶፖ። ታኒ ዮዌ፡ ሳርታሲ ጊዴናን ሻካናሳፔ ኣቲን። 52 ኣያው ጎፔ፡ ሃዒፔ ደሚና ኢቲ ጎሊያን ዴሚያ ኢቺሹ ኣሳቱ ሻኩታናዎንታ፤ ሄዛቱ ላዓቲዎ ቦላ፡ ላዓቲካ ሄዛቲዎ ቦላ ዴንዲዳ ዎላቄታናዎንታ። 53 ኣዉ ናዓ ቦላ፡ ናዓይካ ኣዉዎ ቦላ፡ ኣታ ናቲ ቦላ፡ ናታካ ኣቲ ቦላ፡ ቦሎታታ ናዓ ማቺ ቦላ፡ ናዓ ማቻካ ቦሎታቲ ቦላ፡ ዎላሳን ዴንዲዳ ሻኩታናዎንታ» ያጌዳ።

ዎዲያ ሃናታ ኤሩዋ

(ማጥ 16:2-3)

54 ቃይካ ዩሱሲ አሳሲ፣ «አዋይ ወሊያ ባጋና ሂንቲ ሻሪያ ቤዖ፣ ሃሲ ሃ ሳቲያን ሄኮ ዎልቃማ ኢራይ ቡካና ሃኔ» ያገታ፤ ቱሙካ ቃይ ቡኩ። 55 ዲጌ ባጋና ጫርኩ ጫርኩዳ፣ ሃቸ ሻማናዎ) ያገታ፤ ጌቱቶዎዳንካ ቃይ ሃኔ። 56 ሂንቲና ሎዓ ማላቲያ ኢታቶ፣ ሳዓኔ ሳሉዋ ያሊዳ፣ ሃናናዎ ኤሪታ፤ ሺን ሃ ዎዲያባ ዎቲ ኤራናው ዳንዳይኪቲ?

ሲጋቱላባኔ ሞቱዋባ

(ማጥ 5:25-26)

57 «ዎዲ ሂንቲንቱ ያሎ ጊዳዳ ዩወዎ ሂንቲንቶ አያው ፐርዲኪቲ? 58 ኔ ሞርኪያና ኢቲፔ ፐርዲያ ዳና ሲንላን ሺቃናው ቦዳ፣ ቢር ኮጊያ ቦላ ዳዲሺን ሲጌታ ዲጋ። ሄዎ ጳዮፔ ኔና ሳቸዴ ፐርዲያ ዳናኩ አፋና፤ ዳናይካ ፖሊሴው አሊ ኢማናዎ፤ ፖሊሲ ቃሾ ጎሊን ዩጋናዎ። 59 ታኒ ኔው ኦዲያዌ፣ ወርሴላ አጩዋ ጨጋና ጋካናው ሄዎፔ ኩሳካ» ያጌዳ።

13

ናጋራፔ ሲሜና ኡባይ ጳያና

1 ሄ ዎዲያን ኢቲ ኢቲ አሳቱ ዩሱሳኮ ዩዳ ጲላዖሲ ጋሊላ አሳ ዎዲዳ ኢንቲንቱ ሱላ ያርሹዋና ኢቲፔ ዋላኬዳዎ አው ኦዳዲና። 2 ዩሱሲካ ዛሪዳ፣ «ሃዎንቱ ጋሊላ አሳቱ ሃይቄዳ ዲራው፣ ያቲና ኢንቲንቶ ሃራ ጋሊላ አሳ ኡባፔካ አዲዳ ናጋራንቻቱዋ ጊደዋንታ ማላቲና? 3 ታኒ ያጋይ፣ ሃዎዳን ጊዳና፤ ዩወዎን ቃሲ ሂንቲ ናጋራ ፓዲዳ ናጋራፔ ሲሜናን ኢዖፔ፣ ሂንቲንቱ ኡባፔካ ሃዎዳን ሃይቄታ። 4 ዎይ ሳሊሆማ ጊምቢ ኢንቲንቱ ቦላ ኩንዲዳ፣ ዎዲዳ ታማኔ ሆሰቸን አሳቱዋ ዩሩሳላሜን ዳዲያዎንቱ ኡባፔ አዲዳ ናቆዋንታ ማላቲና? 5 ሃዎዳን ጊዳና ያጋይ፤ ዩወዎን ቃሲ ናጋራ ፓፃና ጳዮፔ ኡባፔካ ሃዎዳን ባያኒታ» ያጌዳ። 6 ዩሱሲካ ሃዎዳን ያገ ለሚሱዋ ኦዳዳ፣ «ኢቲ ቢታኔው ዎዲኒያ ቱራ ጎሻ ጋዳን ቶኬቴዳ ባላሲያ ጌቲቲያ አይፊ ሜቲቲያ ሚላታ ዳዓው፤ ሄ ቢታኒካ ሚላታ አይፋዴንቶኔ ጊዳ ዩዳዌ፣ አይኔካ አይፊያ ሚሜና። 7 ዎዲኒያ ቱራ ናገያዎ ኢ፣ ታኒ ሃ ባላሲያ ጌቲቲያ ሚላቲፔ አይፊያ ዳማናው ሄዙ ላይላ ሲሜሬታዳ አያኔ ዳማቤይኬ። ሃዎ ዲራው ዳካ ዳንላ ዲጋ፤ አያው ቢታ ጮ ሜሊሳይ?» ያጌዳ። 8 ናገያዌካ ዛሪዳ፣ ሳዳው፣ ታኒ ኢ ዩሹዋ

ሃሩማናሲኔ ፒቱዋ ኦላናሲ፡ ሃ ላይላ ፃላላው ባሻ። 9 ሲንላው ኣይፎፔ ሎዓ፤ ሺን ኣይፊናን ኢያፔ ዳኩቱ» ጌዳ» ያጌዳ።

ዩሱሲ ቁና ሚሺራቶ ሳምባታ ጋላሳ ፓሌዳ

10 ዩሱሲካ ኢቲ ሳምባታ ጋላሲ ኣዩሁዳ ዋሳ ጎላቱዋፔ ኢቱዋን ታማሪሲ ዳዔ። 11 ሄዋኒካ ታማኔ ሆሰፑን ላይላ ኩሜንላ ቱና ኣያናይ ቁኒሴዳ ሚሺራታ ዳዓው። ኢዛካ ሱራዳ ኤቃናው ኣይኔ ዳንዳያቤይኩ። 12 ዩሱሲካ ኢዞ ቤዔዳ ዋዴ ጄሲዳ፡ «ሃ ሚሺራቱ፡ ኔ ሃርጊያፔ ፓፃዳ» ያጌዳ። 13 ዩሱሲ ባሬ ኩሺያ ኢዚ ቦላ ዋሊና፡ ሄዋዴ ሱራ ሲቲ ጋ ኤቃዴ ባሬ ያሳ ጋላታዳ።

14 ሺን ኣዩሁዳ ዋሳ ጎሌ ካፑ ቃሲ ዩሱሲ ሳምባታን ፓሌዳዋ ዲራው ሃንቄቲ ዛርዋሺን ኣሳቱዋ፡ «ኪቲታናው ቤሲያ ኡሱፑን ጋላሳቱ ዳዒኖ፤ ሄ ጋላሳቱን ዩዴ ፓፂቴፔ ኣቲን ሳምባታን ጊዴና» ያጌዳ።

15 ጎዳይካ ዛሪዳ፡ «ሃ ሎዓ ማላቲያ ኢታ ኣሳቶ፡ ሂንቴንቱፔ ኢቱኔካ ሳምባታ ጋላሲ ቦራ ማጋዲዋፔ ዋይ ሃሪያ ጋፃታፔ ቢሊዴ ሃላ ኡሻናው ኣፊኔ? 16 ሃና ኣብራሃዋ ያራ ጊዴዳወና፡ ታማኔ ሆሰፑን ላይላ ኩሜንላ ፃላሂ ቃቹዳወና ሳምባታ ጋላሲ ሄ ቃሹዋፔ ቢሌታናው ቤሴኬ?» ያጌዳ። 17 ሃዋ ኦዴዳ ዋዴ ኤቄቲያዋንቱ ኡባይ ዩላቴዲኖ፤ ኣሳይ ኡባይ ቃይ ኢ ኦሌዳ ማላሊሲያ ኦሱዋን ኡባን ናሹቴዲኖ።

ሳናፊጨያ ኣይፊያ ዜሬላ ሌሚሱዋ (ማር 4:30-32)

18 ዩሱሲካ፡ «ያሳ ካወቱላይ ኣያ ማላቲ? ኢ ኣያ ማላቲንቶ፡ ታኒ ሂንቴንታ ዋታ ቤሶ? 19 ያሳ ካወቱላይ ሳናፊጨያ ጌቲቲያ ቁሪ ሚላቲ ኣይፊያ ማላቲ። ሄ ሚላቲ ኣይፊያ ኣሳይ ኣኪዳ ጎሻ ጋርሳን ዜሬዳ፤ ዜሬቶና ዲጨዴ ዋጋ ሚላ ጊዳዲ፤ ያቲና ሳሉዋ ካፋቱካ ኢዚ ኣጨ ቦላ ባሬንቶ ጎሊያ ከፄዲኖ» ያጌዳ።

ኢርሹዋ ሌሚሱዋ (ማት 13:33)

20 ዩሱሲካ ዛሪዳ፡ «ያሳ ካወቱላይ ኣያ ማላቲንቶ፡ ታኒ ሂንቴንታ ዋታ ቤሶ? 21 ኢቲ ሚሺራታ ሄዙ ከሬያ ጲሊያ ኣካዳ፡ ሙናቄዳ ሙናቃይ ኡባይ ዳንዳና ጋካናው፡ ኣኒ ቲጌዳ ኢርሹዋ ማላቲ» ያጌዳ።

13:14 ኬሰ 20:9፣ 10፣ ዛር 5:13፣ 14

ኡንዓ ፔንጊያባ
(ማጥ 7:13፣ 14፣ 21፣ 22)

22 ሄዋፔ ካላ ዩሱሲ ዩሩሳሌም ቢዳ፣ ዋጋ ካታማኒኔ ቄሪ ካታማን ዳዒያ አሳ ታማሪሲዳ አጼዳ። 23 ሄ ዋዳ ኢቲ ቢታኒ ሸቂዳ አ፣ «ጎዳው፣ ያሳ ፒርዳፔ አቲያዋንቱ ጉላ አሳ ፃላሌ?» ያጌዳ።

ሄዋፔ ጉዩ ዩሱሲ አንቱንታ፡

24 «ታኒ ሂንቴንቶ ኦዳይ፤ ኡንዓ ፔንጊያና ጌላናው ባጭቲ። ጮራ አሳይ ጌላናው ኮዩኖ፤ ሺን ዳንዳይቤይኪኖ። 25 ጎሊያዉ ዳንዲዳ፣ ኢፒላ ቃቸዋፔ ጉዩ ሂንቴንቱ ካሪን ኤቂዳ፣ ጎዳው፣ ጎዳው፣ ኩሲ ደያሪኪ) ያጌዳ ፃሳ ደሚያ ዋዳ፣ ኢካ ዛሪዳ፣ ሃቃፔ ዩዲቴንቶ፣ ታኒ ሂንቴንታ ኤሪኬ) ያጋናዋ።

26 «ሄ ዋዳ ሂንቴንቱ፣ ሳኒ ኔናና ኢቲፔ ሜዶ፤ ኡሼዶ፤ ኔኒ ኑ ሄሪንካ ታማሪሳዳ) ያጋናዋንታ።

27 «ዩሱሲ ቃሲ፣ ሳኒ ሂንቴንቶ ኦዳይ፤ ሂንቴንቱ ሃቃፔ ዩዲቴንቶ፣ ታኒ ሂንቴንታ ኤሪኬ፤ ኡባቱካ ማካላንቻቱ ታማታፔ ሃኪቲ) ያጋናዋ።

28 «አብራሃዋ፣ ዩሳቂ፣ ያዩቆቤኔ ናባቱ ኡባይ ሂንቴንቱ ካሪን ኤቂሺን፣ ያሳ ካዉቲላን ዳዒያዋንታ ሂንቴንቱ ቤዒያ ዋዳ፣ ሂንቴንቶ ዩኮኔ አቻ ጳቂዋ ጊዳናዋ።

29 «አሳይ አዋይ ደሊያሳፔኔ ዉሊያሳፔ፣ ቃሲ ኪለባጋፔኔ ሂርኪባጋፔ ዩዳ፣ ያሳ ካዉቲላ ጋዩታን ኡቲኖ። 30 ቤዒቲ፤ ጉዩቲዳዋንቱ፣ ሲንላታናዋንታ፤ ሲንላቲዳዋንቱ ቃይ ጉዩታናዋንታ» ያጌዳ።

ዩሱሲ ዩሩሳሌምን ኦፊዳባ
(ማጥ 23:37-39)

31 ሄ ዋዳ ፓሪሳዋቱዋፔ አቲ አቲ ዩሱሳኮ ዩዳ፣ «ሄርዲሴ ኔና ዋጳናው ኮዩያ ዲራው፣ ሃዋፔ ባዲጋ» ያጌዲኖ።

32 ዩሱሲ ዛሪዳ፣ «ቢዳ ሄ ዋራካናሲ፣ ሃቸኔ ዋንቲ ኢታ አያናቱዋ ኬሳና፤ ሃርጋንቻቱዋካ ፓላና፤ ሄዜንላ ጋላሲ ታ ኡሱዋ ዉርሳና) ያጌቲ። 33 ሃኖፔ አቲን ናቢ ዩሩሳሌምፔ ሃራሳን ሃይቃናው ቤሴና ዲራው፣ ታኒ ሃቸ፣ ዋንቲኔ ዋንቲፔሺ ኦጊያ ቦላ ዳዳናው ቤሴ።

13:27 ማዘ 6:8 13:28 ማጥ 22:13፤ 25:30፤ 13:28፣ 29፤ ማጥ 8:11፣ 12 13:30 ማጥ 19:30፤ 20:16፤ ማር 10:31

34 «ዩሩሳሌም ካታማ አሳው፡ ዩሩሳሌም ካታማ አሳው፡ ናባቱዋ ዎጂያዋንቶ፡ ሂንቴንቴኮ ኪቴቶዋንታ ሹቻን ጫዲያዋንቶ፡ ኩታታ ባሬ ማራቱዋ ባሬ ቂፊያፕፕ ጋርሳና ሺሻ ሃጺያዋዳን፡ ታኒ ሂንቴንቴ ናና ኢቲ ጋዲያ ሺሻናው አፑ ጌዴ ኮያዲታ! ሺን ታና ዲጌዲታ። 35 ቤዒቲ፤ ሶሳይ ሂንቴንቴ ጎሊያ አይኔ ኦሊቤና፤ ታኒ ሂንቴንቶ ያጋይ፤ ሂንቴንቴ፡ ሳሳዳ ሱንላን ዪያዌ አንጄቴዳዋ) ጋና ጋካናው፡ ታና ቤዒኪታ» ያጌዳ።

14

ዩሱሲ ሃርጋንቻ ሳምባታን ፓሌዳ

1 ሳምባታ ጋለሲ ፓሪሳዋቱዋ ሱንላቱዋፕፕ ኢቱዋ ጎሌ ዩሱሲ ቁማ ማናው ጌሌዳ ዎዴ፡ እያ ኪቴቲንቶ ቤዓናው አሳቱ ናጊዴዒና። 2 ቦላይ ጋፊና ሜቶቲያ ኢቲ ቢታኒ ዩሱሳፕ ሲንላና ዴዔ። 3 ዩሱሲ ሂጊያ ታማሪሲያዋንታኔ ፓሪሳዋቱዋ፡ «ሳምባታን ፓላናው ዳንዳዬቲ ዳንዳዬቲኔ?» ጌዴ ኦቹዳ።

4 ኡንቴንቴካ ጮዑ ጌዲና። ኢ ሄ ቢታኒያ ቦላ ቦቹ ፓሌዴ አ ሞዪዜዳ። 5 ዩሱሲ ኡንቴንታ፡ «ሂንቴንቴፕ ሃሪ ዎይ ቦሪይ ኦላን ኩንዲንቶ፡ ሳምባታ ጌዴ ኤሌሊ ኬሴናዌ ኦኔ?» ጌዳ።

6 ኡንቴንቴካ ሃ ዩወዋሲ ኢቲ ዛሩዋኔ ኢማናው ዳንዳዪቤይኪና።

አሺኬቴላባ

7 ዩሱሲ ሹቤቶዋንቴ ቦንቸሳ ዶሪያ ዎዴ ያሊዴ፡ 8 «ኦኒኔ ቡላቻ ያሶፕ፡ ቦንቸቴዳሳን ኡቶፓ፤ ኦኒ ኤሪ ኔፕ አሊዴ ቦንቸቶዌ ያሴቴዳዋ ጊዳናዋ። 9 ኔናኔ አኔ ያሳዌ ዪዴ፡ ሃዎ፡ ኡቱዋ አው ዬዳ) ያጊና፤ ሄዎዲያን ዩላታዴ ፃዴና ዴዒያሳን ኡቱዋ ዶማሳ፤ 10 ዩወዋን ቃሲ ኔኒ ያሴቶ ዎዴ ኔና ያሶዌ ዪዴ፡ ታ ላጌው፡ ኪሊ ዶቃሳን ኡታ) ጋና ማላ፡ ባዴ ኡባፕ ሆካሳን ኡታ፤ ሄ ዎዴ ኔና ኢቲፕ ኡቴዳዋንቴ ኡባቱዋ ሲንላን ኔው ቦንቸ አሜታናዋ፤ 11 ባሬ ሁጺያ ዶቁ ኡዲያ ኡባይ ቶሼታናዋ፤ ባሬ ሁጺያ ቶቹያዋንቴ ዶቁ ጊና» ያጊ ለሚሱዋ ኡንቴንቶ ኦዴዳ።

12 ዩሱሲ ባሬና ያሴዳዋ ዛሪዴ፡ «ኔኒ ላፃ ዎይ ካወዋ ጊሊሴዳ ዎዴ፡ ኔ ላጌላቱዋ ዎይ ኔ ኢሻቱዋ ዎይ ዲሬ ኔ ሹራቱዋ ያሶፓ፤ አያው ጎፕ፡ ኡንቴንቴ ኔና ባሬንቴ ታራን ያሲዴ ኩሺያ ጨጋና ዳንዳዪና። 13 ሺን አታሊያባ ጊሊሴዳ ዎዴ፡ ሂዩሳቱዋ፡

14:5 ማት 12:11 14:8 ለም 25:6፣ 7 14:11 ማት 23:12፤ ሉቃ 18:14

ጉንዳቱዋ፡ ደማቱዋን ቆቃቱዋ ያሳ። 14 እንቱንቱ ነው ኩሺያ ዛራናው ዳንዳዩናዋንታ ጊዲያ ዲራው፡ ነኒ እንጃታናሳ። ያላቱ ሃይቁዋ፤ ዳንዲያ ዋዴ ያሳይ ነው ኩሺያ ዛራናዋ» ያጌዳ።

ዋልቃማ ባላ ለሚሱዋ
(ማት 22:1-10)

15 ዩሱሲ ሃሳያ ዉርሲያ ዋዴ፡ ቁማ ማናው ኡቶ አሳ፤ እቱ ሃዋ ሲሲዴ፡ «ያሳ ካዉቱሳ ጋዩታን ኡቲያዌ እንጃቱዳዋ» ጌዳ።

16 ዩሱሲካ ሃዋዳን ጌዳ፤ «እቲ ቢታኒ ዳሮ ሎዖ ካዉዋ ጊሊሲዴ፡ ጮራ አሳቱዋ ያሴዳ። 17 ካዉዋ ዋዲ ጋኪና፡ ካሴ ያሴቶዋንታ፡ ሃዒ ካዉ ጊጌዳ፡ ሃዩቱ» ጊዴ ያሳና ማላ ባሬ ጎሌን ከቲቲያ ቆማ እንቱንቱኮ ከቲዳ። 18 ሺን ኡባቱካ እቲ፤ ቤናዳን አጋና ማላ ዋሴዲና፤ ኮይሮ ቢታኒ ቆማው ኡዲዴ፡ ስታኒ ቢታ ሻሚዳ ዲራው ባዴ ቤዓናው ኮሺ፤ ሄዋ ዲራው ሃያ ጎዶ ታው ሃንቁቶጋሪኪ» ጌዳ።

19 «ላዒሊያዋ ቃሲ፡ ስታኒ ኢቼሹ ዋላ ቦራቱዋ ሻሚዳዋንታ ዋፃ ቤዓናው ቢያ ዲራው፡ ሃያ ጎዶ ታው ሃንቁቶጋሪኪ» ጌዳ።

20 «ሃራይ ቃሲ፡ ስታኒ ማቻቶ እኬዳ ዲራው፡ ያናው ዳንዳያቤይኬ» ጌዳ።

21 «ቆማይካ ዩዴ ባሬ ጎዶው፡ ሃናዋ ኡባ ኡዴዳ። ሄ ዋዴ ጎዶይ ዳሮ ሃንቁቲዳ፡ ባሬ ጎሊያን ከቲቲያ ቆማ፡ ሃኒ ካታማ ኦጊያኔ ሎሶ ኦጊያ ኤሌላዴ ኬሳ፤ ማንቃቱዋን ጉንዳቱዋ፡ ደማቱዋን ቆቃቱዋ ሃ አካዴ ያ» ጌዳ።

22 «አ ቆማይካ፡ ሳዳው፡ ነኒ ታና አዛዘዋዳን አላዲ፤ ሺን ሃዒካ ሃራ አሳ እኪያሳይ ዴዔ» ጌዳ። 23 ጎዶይካ ባሬ ቆማ፡ ስታ ጎሊ ኩማናዳን ሃኒ ኦጊያ፤ ካሬ ባጋኔ ዲርሳ ጋፃ ኡባ ኬሳዴ፡ አሳ ታ ጎሊ አካዴ ያ። 24 አያው ጎ፤ ኮይሮ ታ ጎሊ ሾቤቱዳዋንቱ፤ እቲ አሳይኔ ታ ቁማ ሜና» ጌዳ።

ዩሱሳ ካላናው ባሬና ያርሹሳ ኮሺ
(ማት 10:37-38)

25 ጮራ አሳይ ዩሱሳና እቲ፤ ቢዴዒያ ዋዴ፡ ኢካ አሳኮ ጉዬ ሲሚዴ፡ 26 «ኦኒኔ ታኮ ዩያዌ ዴዖ፤ ባሬ አባኔ አቶ፡ ባሬ ማቻቶኔ ባሬ ናና፡ ባሬ ኢሻቱዋን ሚቻቱዋ፡ ባሬ ዴዐዋ አሺናን ታ፤ አላ ደሶ፤ ታና ካሊያዋ ጌቲታናው ዳንዳዩና። 27 ኦኒኔ

ባሬ ማስቃሊያ ቶኪዳ፡ ታ ጌዲዋ ካሌናን ቆዮፔ፡ ታና ካሊያዎ ጊዳናው ዳንዳዬና።

28 «ሂንቴንቴፔ ኢቱ ሹቻ ጎሊያ ከፃናው ኮዮፔ፡ ከታ ዉርሳናው ጊዲያ ሻሉዋ ካሴቲዳ ኡቲ ሄቴናዌ ኦኔ? 29 ሄዌ ቆዮፔ፡ ጎሊያ ደሚዳ፡ ከታ ዉርሳናው ዋልቃይ ኢዖፔ፡ 30 ቤዔዳዋንቱ ኡባይ፡ «ሃ ቢታኒ ከፃናው ደሚዳ፤ ሺን ከታ ዉርሳናው ኢፃቴዳ) ጊዳ ቂሊጪኖ።

31 «ዎይ ታሙ ሻዓ ኦላንቻቱዋ ኦይቄዳ ኢቲ ካቲ፡ ሃራ ላታሙ ሻዓ ኦላንቻቱዋ ኦይቄዳዋንቱና ኦሌታናው ዳንዳዮፔኔ ኮይርና፡ ታኒ ያናኔ ያኒኪታሻ ጊዳ ኡቲ ቆፔኔ? 32 ባሬው ዳንዳዮቴናን ቆዮፔ፡ ኦላው ዪያ ዮኮ ካቲ ሃኩዋን ዳዒሺን ከቲዳ ሲጌታናው ዋሴ። 33 ሲሚ ሃዋዳንካ ሂንቴንቴፔ ኦኒኔ ባሬው ዳዒያዎ ኡባ ኣኔናዌ፡ ታና ካሊያዎ ጊዳናው ዳንዳዬና።

ጎዔና ማዒኒያባ
(ማት 5:13፤ ማር 9:50)

34 «ማዒኒ ሎዒ፤ ሺን ሎቂሎቄናን ቆዮፔ፡ ለዔል ኦ ዋቲ ሎቂሎቄሳናው ዳንዳዬቲ? 35 ቢታዉካ ሎዒና፤ ቱዔያናዉካ ማዳናዎ ጊዳ ዲራው፡ ኣሳይ ኦ ኦሊ ኣኔ። ሲሲያ ሃይሳይ ዳዒያዌ ሃዋ ሲሶ» ያጌዳ።

15

ባዬዳ ደርሳ
(ማት 18:12-14)

1 ኢቲ ጋላሲ፡ ቃራፃ ሺሺያዋንቱኔ ናጋራንቻቱ ኡባይ ዬሱሳ ሲሳናው ኣኮ ሺቄዲኖ። 2 ፓሪሳዋቱኔ ሙሴ ሂጊያ ታማሪሲያዋንቱ፡ «ሃ ቢታኒ፡ ናጋራንቻቱዋ ሺሺያዋኔ ኣንቴንቱና ቄማ ሚያዎ» ያጊዳ ዙዙሚዲኖ። 3 ዬሱሲካ ለሚሱዋን ዛሩዋ ሃዋዳን ያጊ ኦዳዳ፡

4 «ፃቱ ደርሳይ ዳዒያ ኡራይ ሂንቴንቴ ጊዶፔ ዳዒንቶ ሄዋፔ ኢቱ ባዪንቶ ኡዲፔ ታማኔ ኡዲፔኑዋ ዳንባን ኣጊዳ ባዬዳዎ ቤታና ጋካናው ኮዬናዌ ኦኔ? 5 ዳሚዳ ዎዳ ናሼቻን ባሬ ሃሺያ ቦላን ደርሳ ቶኪ፡ 6 ባሬ ጎሌ ሲሚዳ፡ ባሬ ደሲያዋንታኔ ሸራቱዋ ኢቲፔ ፃሲዳ፡ «ባዬዳ ታ ደርሳ ዳዎ ዲራው፡ ታና ኢቲፔ ናሸቲቱ» ያጊዳ ኦዳ። 7 ሄዋዳንካ ናጋራ ፓፃል ኮሼና ኡዲፔ ታማኔ

14:27 ማት 10:38፤ 16:24፤ ማር 8:34፤ ሉቅ 9:23 15:2 ሉቅ 5:29-30

ኡዲቸ ዲላቱዋፔ አሊዳ ናጋራ ፓዲያ ኢቲ ናጋራንቻን ሳሉዋን ዳር ናሼቻይ ገደናዋ።

ባዪዳ ቤቴዳ ሳንቲሚያ

8 «ቃይካ ታሙ ናሃሲያ ሳንቲሚ * ዳዲያ ሚሺራታ ታሙዋፔ ኢቲ ባዪንቶ ዳማና ጋካናው ያምፒያ ያምፓዳ። ሳሊያ ፒታዳ ሎይላ ኮዬናዉና ኢዛ ኦኔ? 9 ኢዛካ ዳሜዳ ዋዲያን ባሬ ደሲያዋንታኔ ባሬ ሾራቱዋ ኢቲፔ ያሳዳ። ታፔ ባዬዳ ሳንቲሚያ ዳሜዳ ዲራው። ታናና ኢቲፔ ናሼቲቴ) ያጋዳ ኦዳው። 10 ሄዋዳንካ ናጋራ ፓዲያ ኢቲ ናጋራንቻ ጋሶቴላን ያሳ ኪታንቻቱዋ ሲንላን ናሼቻይ ሃናናዋ» ያገደ።

ባያ ናዓ

11 ጉጂዳ ዬሱሲ፡ «ላዑ ናናይ ዳዲያ ኢቲ ቢታኒ ዳዒ፤ 12 ኡንቱንቱፔፔካ ቴፋ ናዓይ፡ ሳ ማፀዋፔ ታና ጋኪያዋ አማ) ገደ። አዉካ ባሬ ማፀዋፔ ናናቶ ገሼዳ። 13 ጉላ ዋዲያፔ ጉዪያን ቴፋ ናዓይ ባሬና ጋኬዳዋ ኡባ ሺሺ አኪዳ ሂኒ ሃኮ ጋዴ ቤዳ፤ ሄዋን ባሬ አኬዳ ሚሻ ኡባ ሳሊ ዉርሲ አገደ። 14 ኢካ ዳዲያዋ ኡባ ዉርሴዳዋፔ ጉዪያን ሄ ጋዴን ዋልቃማ ኮሻይ ጌሌዳ፤ ኢካ ሜቱዋን ኡንዔቴሳ ደሜዳ። 15 ሃዋ ዲራው ሄ ጋዴን ዳዲያዋንቱፔ ኢቱዋኮ ሸቂዳ። ታና ኔው ቆማ አላሪኪ?) ያገና፡ ቢታኒካ ባሬ ጉዲንላ ዉዲያ ሄማና ማላ ኢ ዳምባ ዬዳዳ። 16 ጉዲንላ ዉዲ ሚያ ሃልዑዋ ማናው አሞቴዳ፤ ሺን ሄዌንቶካ አው አሚያዌ ቤቲቤና።

17 ባሬ ባዪዙዋ ኤር ዋዳ፡ «ቁማይ ያኒዳ ሳዓን አቲያ ታ አቦ አሊያዋንቱ አፑኔ፤ ሺን ታኒ ሃዋን ኮሻን ሃይቃና ማታይታ?

18 ዳንዳዳ ታ አቡኮ ባኔ) ሃዋዳን ያጋና፤ ታ አቦ፡ ያሳካ ኔናካ ናቃዲ፤ 19 ሃኒፔ ጉዬ ኔ ናዓ ያጌታዳ ያሴታናው ቤሲኬ፤ ኔው ኪቲቲያዋንቱፔ ኢቱዋዳን ታና ዋሳሪኪ ጋና) ገደ። 20 ሄ ማንዒያንካ ዳንዲዳ ባሬ አቡኮ ዬዳ።

«ኢ ቢር ሃኩዋን ዳዲሺን፡ አዉ ቤዒዳ፡ አው ቃሬቴዳ፤ አኮ ዋዲ ቢዳ፡ አ ኢዲሚ ዬሬዳ።

21 «ናዓይካ፡ ታ አቦ፡ ታኒ ያሳካ ኔናካ ናቃዲ፤ ሃኒፔ ጉዬ ኔ ናዓ ጌቲታዳ ያሴታናው ቤሲኬ) ያገደ።

22 ሺን አዉ ባሬ ኦሳንቻቱዋ፡ «ኤሌሊ ቢዳ፡ ኡባፔ ደሬቴዳ ሎዖ ማዩዋ አሂዳ፡ አ ማዪዚቴ፤ አ ቢራዲያን ሚገዲዋ፡ አ

* 15:8 ናሃሲያ ሳንቲሚ፡ ግርኬ ቃላ ቢሌላኒ ኢቲና፡ ኢቲ ጋላሳ ሙሚያ አሊ ፔሼዳ ዋልቃ አሳንቻው ጨጌቲያ ሚሻ ከና ገዲያዋ ኦዳ።

ጌዲያንካ ጫማ ተ ዋሏቱ። 23 ሞዴዳ ኮሩማ አሂዳ ሹኪቲ፤ ሞይቲ፣ ናሼቶይቲ። 24 አያው ጎፔ፣ ሃዌ ታ ናዓይ ሃይቄዳ፤ ሺን ሃዒ ፓዳዳ፤ ባዬዳ፤ ሺን ሃዒ ቤቲዳ) ያገና፣ ናሼቻ ደሜዲኖ።

25 «ሄ ዋዲያን፣ ባይራ ናዓይ ጋዴን ዳዒያዌ ዪዳ ጎሌኮ ማቲያ ዎዳ፣ ዩላኔ ዲሩዋ ኮሹንቻ ሲሴዳ። 26 ኢካ ዩዉ አዬንቶ ኤራናው ኮዪዳ፣ ቆማቱዋፔ ኢቱዋ ፃሲዳ፣ ሃዌ አዬ? ጌዴ ኦቹዳ። 27 ቆማቱካ፣ ሳኔ ኢሻይ ሳር ዩዳ ዲራው፣ ኔ አቡ ሞጶ ኮሩማ አው ሹኬዳ) ያገ ኦዳዲኖ።

28 «ባይራ ናዓይ ሃንቄቲዳ ጎሌ ጌሊኬ ያገ ኢዲና፣ አዉ ካሬው ኬሲዳ፣ ጌላናዳ ዎሴዳ። 29 ሺን ኢ ዛሪዳ ባሬ አባ፣ ሃኮ ሃዋ ኬና ዎዲያ ቆማዳን ኔው ከቲታዲ፤ ኔ አዛዞዋፔ ኢቱዋኔካ ፓጪሳ ቤይኬ፤ ታ ላጌላቱዋና ኢቲፔ ናሼታና ማላ ሃራይ አቶ ኢቲ ዳሻ ቡልዑዋኔ ታው ኢማ ቤይካ፤ 30 ሺን ሃዌ ኔ ናዓይ ኔ ሚሻ ጫራቱዋና ኢቲፔ ዲፊሲዳ ዪና፣ ጳኮ ቦራ ሹካዳ) ያጌዳ።

31 «አዉካ አ፣ ታ ናዓው፣ ኔኒ ኡባ ጋላሳ ታናና ኢቲፔ ዳዓ፤ ታሳ ጌዳዳባይ ኡባይካ ኔዋ። 32 ሺን ሃዌ ኔ አሻይ፣ ሃይቄዳዌ ፓዶ ዲራውኔ ባዬዳዌ ቤቶ ዲራው፣ ኔኒ ሚዲኔ ኡሺዳ ናሼታናው ቤሴ) ያጌዳ» ጌዴ ኦዳዲኖ።

16

ጋርሳና ሱንላቲላ አኬዳ ጨንጫ ቢታኒያ

1 ዩሱሲ ባሬና ካሊያዋንቶ ኦዲዳ፣ «ኢቲ ዲሬ ቢታኒ፣ ባሬ ጎሊያ ኡባ ቦላ ሱንላዲ ኢቲ ቢታኒ ዳዔ፤ ሺን ሃ ቢታኒ አ ሚሻ ባዪዜ ያገያ ዘገርሳይ አ ጋኬዳ፤ 2 ሄዋ ዲራው ባሬ ሱንላዲ ቢታኒያ ፃሲዳ፣ ሃዌ ታኒ ሲሲያ ዩዉ አዬ? ሃኒፔ ጉዬ ኔኒ ታ ጎሊያኒኔ ታ ሚሻ ቦላ ታፔ ጋርሳና ሱንላቲላ ከቲታናው ዳንዳያቤና ዲራው፣ ሃቹ ጋካናው ከቲቲዳዋ ሄታዳ ሹፋ) ያጌዳ።

3 «ሱንላቲዳዌ ባሬ ዎዛና፣ ታ ጎዳይ ታና ሱንላቲላፔ ኮላና ሃኔ፤ ሺን ታ ዋኖሻ? ጎሻናው ዎልቃይ ታው ባዋ፤ ዎሳናው ቃሲ ታው ፖኬ። 4 ታ ኦላናባ ታ ኤራይ፤ ኢ ታና ሱንላቲላፔ ኬሶፔ፣ ባሬንቱ ጎሌ ቢና፣ ታና ሞኪያ ላጌላቱዋ ታኒ ዳማና) ያጌዳ።

† 15:22 ሚጊዴዋ ... ጫማ፡ ሃ ቃላቱ ናዓ አቡ፣ አ ፖሎ ዎዛናፔ አኮዋ ቤሲያዋንታ። ሚጊዴ፡ ሄ ናዓይ ጎሊን ደዒያ አሳቱዋ ኡባፔ ሎዎ ፃሊቲዳዋ ቤሴ። ጫማይ ቃይ፣ ኢ ባሬ አቡሲ አይሌ ጌዳናዳን ናዓ ጌዲያዋ ቤሴ። አይላቱ ሄዎዳ ጫማ ዎሊኪኖ።

5 «ባሬ ጎዳፔ ሻሉዋ ታልዔዳ ኣሳቱዋ ሁጲያን ሁጲያን ዪሲዳ፥ ኮይሮ ቢታኒያ፥ ህኒ ታ ጎዳፔ ዋይሳ ኩና ሻሉዋ ታልዒዲ?» ያጌዳ።

6 «እካ፥ ሓኒ ዪቱ ባሬታ ኩሚዳ ዛይቲያ ታልዒዲ» ያጌዳ። «ሱንሱቲዳ ቢታኒካ፥ ነኒ ፓራማና ዋራቃታ ሄይ፤ ኡታዳ ኤሌካ (ኢሻታማ) ጋዴ ፃፋ ያጌዳ።

7 «ሄዋፔ ሃራ ቢታኒያ፥ ህኒ ኣፑኩዋ ታልዒዲ?» ያጌዳ። « (ዪቱ ቁንዓ ዛርጋ) ያጌዳ። «ሱንሳይካ፥ ሓራቃታ ሄይ፤ ሆሰፑን ታማ ጋዴ ፃፋ» ያጌዳ።

8 «ሄ ሱንሳይ ጨንጫቲላን ኦሌዳ ዲራው፥ ኣ ጎዳይ ኣ ጋላቲዳ፤ ኣያው ጎፔ፥ ሃ ኣላሚያ ኣሳይ ባሬንቱዋ ፖዑዋ ኣሳፔ ኣጴዳ ጨንጫቲዋ።

9 «ታኒ ሂንቴንቶ ያጋይ፥ ሓሃ ኣላሚያ ሻሉ ወሪያ ዋዴ፥ ሚጲናው ወሪና ጎሊያን ሂንቴንታ ሞካና ማላ፥ ሃ ሚሻን ሂንቴንቶ ለጊያ ዴሚቲ። 10 ለፋ ዬወዋን ኣማኔቲዳዌ፥ ዋጋባኒካ ኣማኔቲ። ሸን ለፋ ዬወዋን ኣማኔቲቤናዌ፥ ዋጋባኒካ ኣማኔቲና። 11 ሲሚ ሂንቴንቱ ሃ ኣላሚያ ሻሉዋን ኣማኔቲናዋ ጊደፔ፥ ቱማቲላ ሻሉዋ ሂንቴንቶ ኦኔ ሃዳራ ጊዴ ኣማናዌ? 12 ሂንቴንቱ ሃራ ኣሳ ሻሉዋን ኣማኔቲናዋ ጊደፔ፥ ሂንቴንቱ ሚሻ ኦኔ ሂንቴንቶ ኣማናዌ?» ጌዳ።

13 «ኢቲ ካላ ላዑ ጎዳቶ ቆማታናው ዳንዳዪያዌ ኣይ ቆማይካ ባዋ፤ ኣያው ጎፔ፥ ኢቱዋ ኢዲዳ፥ ሃራ ደሴ፤ ዋይ ኢቱዋ ቦንቲዳ፥ ሃራ ካጴ፤ ያሳወኔ ሻሎ ሞዴታናው ዳንዳይኪታ» ያጌዳ።

14 ሻሉዋ ደሲያ ፓሪሳዋቱ ሃዋ ኡባ ሲሲዳ፥ ዬሱሳ ቦላ ቁሊጨዳድና። 15 ሸን ዬሱሲ ኡንቲንታ፥ «ሂንቴንቱ ኣሳ ሲንላን ሂንቴንታ ዪሎ ኣሳ ኦሊያዋንታ፤ ሸን ያሳይ ሂንቴንቱ ዋዛና ኤሬ፤ ኣያው ጎፔ፥ ኣሳ ሲንላን ቦንቲቲዳዌ ያሳ ሲንላን ቱና ጊዴ።

ሙሴ ሂጊያባኔ ጌሉዋ ኣካባ (ማት 5:31-32፤ 11:12-13፤ ማር 10:11-12)

16 «ሙሴ ሂጊያኔ ናባቱ ፃፌዳ ማፃፋ * ዮሃንሳ ዋዲያ ጋካናው ኣሳይ ኣዛዜቲዳ ዴዔዲና፤ ሄዋፔ ካላ ቃይ ያሳ ካወቲላይ ኦዴቲዳ፤ ኣሳይ ኡባይ ያ ጌላናው ኩሴቲ። 17 ሸን ሂጊያፔ ኢቲባይ ኣቲያዋፔ ሳሉኔ ሳዒይ ኣጲያዌ ማታቲ።

* 16:16 ሙሴ ሂጊያኔ ናባቱ ማፃፋ፥ ኣዪሁዳቲዋ ጌሻ ማፃፋቲዋ፤ ሄዋንታ ጉሳይ ኤጫ ጫቁዋ ማፃፋ። 16:16 ማት 11:12፥ 13 16:17 ማት 5:18

18 «ባሬ ማቻቶ ቢሊዴ ሃራሮ አኪያዌ ኡባይ ዋሹሜ፤ ቃሲ አሲናፔ ቢሌቴዳ ማጫወኖ አኪያዌ ኦኒኔካ ዋሹሜ።

ዱሬ ቢታኒያባኔ ማንቆ ገዴዳ አለባዛራባ

19 «ጋቲ ሎይሲዴ አልፎ ገዴዳ ማደዋ ማደዲኔ ጋላሳን ጋላሳን ኦቶሩዋን ናሹቴዴ ዴዒያ ኢቲ ዱሬ ቢታኒ ዴዒ። 20 ቃሲካ ኩሚንላ አሳቴላን ማይላይ ዴዒያ ኢቲ አለባዛራ ጌቴቴያ ሂዩሳይ፣ ሃ ዱሬ ቢታኒያ ካሪያን ገሴዳ። 21 ሃ ዱሬ ቢታኒያ ሳሞፓፔ ላሌቴዳ ሱፓ ማናው አሞቴ፤ ሃራይ አቶ ካናቴካ ዪዴ አ ማይላ ላጪኖ።

22 «ሃ ሂዩሳ ቢታኒ ሃይቂና፣ ኪታንቻቱ አ አብራሃሞ ባጋ ቦንቾሳ አፌዲና፤ ዱሬ ቢታኒካ ቃሲ ሃይቂዴ ሞጌቴዳ።

23 ሲፖሊያን ዳሮ ሴሌቴዴ ዴዒሺን፣ ቶቁ ገዴ ሃኩዋን አለባዛራ፣ አብራሃሞ ባጋን ዴዒያዋ ቤዔዳ።

24 «ኢካ ባሬ ኮሻ ቶቁ ኡዲዴ፣ ሩክብራሃሞ፣ ታ አቦ፣ ታው ቃሬታ። ሃ ታማ ሴላን ሜቶታ ዴዒያ ዲራው፣ አለባዛር ባሬ ቢራዲያ ፆራ ሃሳን ቦቹዴ፣ ታ ኢንፃርሳ ኢርዲሳናዳን ሃያና ታኮ ኪታሪኪ) ያጌዳ።

25 «አብራሃሞ ቃሲ፣ ታ ናናው፣ ኔኒ ፓፃ ዴዒዴ፣ ሎፖ ዴዐ-ዋ ዴዒና፣ አለባዛር ሎዔና ሜቶ ዴዐ-ዋ ዴዒዳዋ ቆፓ። ሃዒ ቃይ ኢ ሃዋኒ ናሹቴያ ዋዴ፣ ኔኒ ሜቱዋ ቦላ ዴዒ።

26 « ሃዋፔ ሃራይ ቃይ፣ ሃዋፔ ያ ሂንቴንቴኮ አቆናው ኮዪያዋንቴ አዲናዳን፣ ያኒ ዴዒያዋንቴካ ቃሲ ሃ ኮኮ ፒኔናዳን፣ ኮ ገድኒኔ ሂንቴንቴ ገድን ዋጋ አፋ ሜዴቴዳ) ያጌዳ።

27 «ዱሬ ቢታኒካ፣ ሩክብራሃሞ፣ ሲሚ ሄዋ ገድፔ፣ ኔኒ አለባዛራ ታ አቡ ጎሌ ዬዳና ማላ፣ ኔና ዋሳይ። 28 አያው ጎፔ፣ ታው ኢቹሹ ኢሻቱ ዴዒያ ዲራው፣ ኡንቴንቴ ቃይ ሃ ሜቱዋሳ ዬና ማላ፣ ኡንቴንቴ አለባዛር ቢዴ ማርካቶ) ያጌዳ።

29 «አብራሃሞ ቃሲ፣ ሙሴኔ ናባቱ ፃፌዳ ማፃፋይ ኡንቴንቴ ዴዒ፤ ሄ ማፃፋይ ገያዋ ኡንቴንቴ ሲሲኖ) ያጌዳ።

30 «ዱሬ ቢታኒ፣ ሂዒ፤ አብራሃሞ፣ ታ አቦ፣ ሄዋ ገዴና፤ ሸን ኢቲ ቢታኒ ሃይቂዋፔ ዴንዲዴ፣ ኡንቴንቴኮ ቢንቶ፣ ኡንቴንቴ ባሬንቴ ናጋራ ፓዲዴ፣ ሲማናዋንታ) ያጌዳ።

31 «አብራሃሞካ፣ ሩክብራሃሞ ሙሴኔ ናባቱ ፃፌዳ ማፃፋ ሲሴናዋ ገድፔ፣ ሃራይ አቶ ኢቲ ኡራይ ሃይቂዋፔ ዴንዲ ዪንቶካ አማኒኪኖ) ጌዳ» ያጌዳ።

17

ናጋራባ ዩሱሲ ኦዳዳ

(ማጥ 18:6፣ 7፣ 21፣ 22፤ ማር 9:42)

1 ዩሱሲ ባሬና ካሊያዋንታ፡ «አሳ ባሌሌያዌ ዩናን አቴና፤ ሺን ባሌሌያዋ አሂያ ኡራው አው አይ፤ 2 ሄ ቢታኒ ሃ ጉላቱዋፔ ኢቱዋ ባሌሌያዋፔ፡ ጋጪያ ዋፃ ባሬ ቆጲያን ቃሹቲዳ አባን ሚቴቲያዌ አው ሎዓ፡ 3 ሂንቴ ሁጹው ናጌቲቴ።

«ኔ አሻይ ኔና ናቆፔ፡ አ ዘራ። ቃሲ ናጋራፔ ኢ ሰሞፔ፡ አው አቶ ያጋ። 4 ኢቲ ጋላሲ ኢ ኔና ላፑ ጌዴ ናቂዳ፡ ላፑ ጌዳካ፡ «ኔና ታ ናቃዲ፡ ታና ማራ» ጌዴ ኔኮ ዮፔ፡ አው አቶ ጋ» ያጌዳ።

5 ኪቴቴዳዋንቱካ ጎዳ፡ «ኑሲ አማኑዋ ጉጃ» ያጌዴ ኦቼዲኖ።

6 ጎዳይካ፡ «ሂንቴው ሳናፊጪያ አይፊያ ከና አማኑ ዳዒንቶ፡ ሂንቴንቱ ሃ ቦዒያ፡ «ሃዋፔ ሾዴታዳ፡ አባን ቶኬታ» ጊንቶ ሂንቴው ኤኖ ጋና» ያጌዳ።

ቆማይ አላናው ቤሲያ ኦሱዋ

7 ቃሲካ ዩሱሲ፡ «ሂንቴፔ ጎሺያዌ ዋይ ሚያ ሄሚያ ቆማይ ዳዒያ አሳይ ሃቄት ዳዖፔ፡ ጎሻ ጋይፔ ዋይ ሚያ ጋይፔ ሰሞ ዋይ ኤሌካ፡ «ሃያ ሸምጋ አካ፡ ቆማ ማናው ኡታ» ያጌያዌ ኦኔ?

8 ዩዉዋን ቃሲ፡ «ታ ማና ካዉዋ ጊጊሳ፤ ታ ማናኔ ኡሻና ጋካናው ሚናዳ ታና ኤቃዳ ሚዛ። ሄዋፔ ጉዬ ኔው ማ፡ ኡሻ» ያጌያዋ ጌዴኔ? 9 ሄ ቆማይ ኪቴቴዳባ ኦሌዳ ዲራው፡ ሄ ቢታኒ ጋላታናው ቤሲኔ? 10 ሄዋዳንካ ሂንቴ ቃሲ አሳይ ሂንቴና ኪቶ ኦሱዋ ኦሌዳ ዋዳ፡ «ኑኒ ማዳና ቆማቱዋ፤ ኑ ኦሶ ፃላላ ኦሌዳ» ያጌቴ» ያጌዳ።

ዩሱሲ ኦሉ ኦይቄዳ ታሙ አሳቱዋ ጋሌዳ

11 ዩሱሲ ዩሩሳላሚ ቢዳ፡ ጋሊላፔኔ ሳማሪያ ጌያ ጋዳቱዋፔ ጊዲዋና አጴዳ። 12 ኢ ኢቲ ጉላ ካታማቶ ጌሊያ ዋዲያን፡ ሃኩዋን ኤቄዳ ታሙ ኦሉዋን ኦይቄቴዳዋንቱ አ ቤዔዲኖ፡ ኡንቱንቱካ ሃኩዋን ኤቄዳ፡ 13 ባሬንቱ ኮሻ ጶቄ ኡዲዳ፡ «ዩሱሳ፡ ጎዳው፡ ሃያ ጎዶ ኑና ጋላሪኪ!» ያጌዲኖ።

14 ዩሱሲ ኡንቱንታ ቤዒዳ፡ «ቢዳ፡ ሂንቴንቱ ቦላ ቄሳቱዋ ቤሲቴ» ያጌዳ።

ኡንቱንቱካ ቄሳቱዋኮ ቢዳዒዳ ኦሉዋፔ ጋፃዲኖ።

15 ኡንቱንቱ፤ ኢቱ ባሬ ሃርጊያ፤ ፓፀዳዎ ቤዲዳ፤ ባሬ ኮሻ ጾቁ ኡዲዳ፤ ያሳ ቦንቸዳ ሲሜዳ። 16 ጋላቲዳካ ዩሱሳ ጌዲያ ማታን ጉልባቴዳ። ሄ ቢታኒ ሳማሪያ ኣሳ።

17 ዩሱሲ ዛሬዳ፤ «ታሙ ፓፂቤይኪኖ? ያቲና ኡዲፑናቱ ሃቃን ዴዲኖ? 18 ኣዪሁዳ ኣሳ ጊዴና ሳማሪያ ቢታኒያ፤ ኣቲን፤ ያሳ ቦንቸናው ሲሜዳዎንቱ ባዎ ጉሴ?» ያጌዳ። 19 ዩሱሲ ኣ፤ «ዴንዳ ባ፤ ኔ ኣማኑ ኔና ፓሌዳ» ያጌዳ።

ያሳ ካዉቲላ ዩሳባ
(ማጥ 24:23-28፤ 37-41)

20 ፓሪሳዎቱ ኢቲ ጋላሲ፤ «ያሳ ካዉቲላይ ኣዉዳ ያኔ?» ጊዴ ኦቸና ዩሱሲ፤ «ያሳ ካዉቲላይ ሂንቱንቱ ናጊያ ኦጊያን ዩና» ያጊ ዛሬዳ። 21 ቃሲካ፤ «ኦኒኔ፤ (ያሳ ካዉቲላይ ሃዎን ዴዴ)፤ ዎይ (ሂዎን ዴዴ) ጋናው ዳንዳዩና፤ ያሳ ካዉቲላይ ሂንቱንቱ ዎዛና ጊዲን ዴዴ» ያጌዳ።

22 ዩሱሲ ባሬና ካሊያዎንቶ ኦዲዳ፤ «ኣሳ ናዓይ ቆንጨያ ጋላሳቱዎ፤ ኢቱዎ ቤዓናው ሂንቱንቱ ኣዎቲያ ዎዲ ያና፤ ሺን ቤዒኪታ። 23 ቃሲ ኡንቱንቱ ሂንቱና፤ (ሃዎኩ ሃዎና) ዎይ (ሂዎና) ያጋናዎንታ። ሺን ኡንቱንታ ካሊዳ፤ ኡንቱንቱና ቦፒቲ። 24 ዎልቃንላይ ሳሉዎን ዎልቃሚያ ዎዴ፤ ሃ ጋፃ፤ ሂኒ ጋፃ ፖራ ፖራያዎዳን፤ ኣሳ ናዓ ዩሳይካ ሂዎዳን ሃናናዎ። 25 ሺን ኮይሮቲዳ ኣሳ ናዓይ ዳሮ ማቱዎ ማቶታናዉኔ ሄ ዎዲያን ዴዲያ ዩሌታን ኢጻታናው ቤሴ።

26 «ናሂ ዎዲያን ሃናዎዳንካ፤ ኣሳ ናዓይ ቆንጨያ ጋላሳንካ ሂዎዳን ሃናናዎ። 27 ኖሂ ማርካቢያ ጌሎ ጋላሳይ ጋካናው ኡንቱንቱ፤ ሚዲኔ ኡሺዳ፤ ኣኪዲኔ ኣኬቲዳ ዴዲሺን፤ ባሻ ሃላይ ዩዳ ኡባ ኣሳካ ባዪዜዳ።

28 «ሂዎዳንካ፤ ሎፀ * ዎዲያን፤ ኣሳይ ሚዲኔ ኡሺዳ፤ ዛሊዲዳ፤ ቶኪዲኔ ጎሊያ ኬፂዳ ዴዴዲኖ። 29 ሺን ሎፀ፤ ሲደማ፤ ኬሶ ጋላሳን ቃሲ ሳሉዎ፤ ታማይኔ ኤፂያ ቦንቆ ሹቻይ ቡኬዳ፤ ኡባባካ ሚዳ ወርሴዳ።

30 «ኣሳ ናዓይ ቆንጨያ ጋላሳንካ ሃዎዳን ሃናናዎ። 31 ሄ ጋላሳን፤ ጎሊያ ሁጲያን ዴዲያዎ፤ ጎሌ ጋርሳን ዴዲያ ሚሻ

17:26 ዶም 6:5-8 17:27 ዶም 7:6-24 * 17:28 ኖሂ ... ሎፀ፤ ያሳይ ቢታ ባሻ ሃላን ባዪዜዳ ዎዴ፤ ኢ ኖሃኔ ኣ ጎሌ ኣሳ ኣሺዳ። ያሳይ ሲደማኔ ጋዎራ ካታማቱዎ፤ ኢዚን ዴዲያ ኢታ ኣሳቱዎ ኡባ ታማን ባዪዜዳ ዎዴ፤ ሎፀኔ ኣ ጎሌ ኣሳ ኣሺዳ (ዶም 19:1-29 ጻሊቲ)። 17:29 ዶም 18:20-19:25

አካናው ወደገጽ ሃዋዳንካ ጎሻ ጋዴን ደዲያዌ፣ ጉዬ ሲሞገ።
 32 እኔ ሎጼ ማቻቲባ ቆጥቼ! 33 ባሬ ሼሞጥዋ አሻናው
 ኮዪያ ኡባይ፣ ባዪዜ፤ ባሬ ሼሞጥዋ ባዪዚያ ኡባይ፣ ደዑዋን
 ናጌ። 34 ታ ሂንቴው ኦዲያዌ አይ ጎፔ፣ ሄ ቃማን ላዑ አሳቱ
 ኢቲ ጊሱዋን ጊሳናዋንታ፤ ኡንቴንቴፔ ኢቱ አኬቲና ላዒሊያዌ
 አታናዋ። 35 ላዑ ማጫ አሳቱ ኢቲ ዋፃን ጋጫናዋንታ፤ ኢቲና
 አኬቲና፣ ኢቲና አታናዉኡ። 36 ላዑ አሳቱ ጎሻ ጋርሳን ደዲኖ፤ ኢቱ
 አኬታናዋ፣ ላዒሊያዌ አታናዋ» ያጌዳ።
 37 አ ካሊያዋንቴ ዬሱሳ፣ «ጎዳው፣ ሄዌ ሃቃን ሃናናዌ?»
 ያጌዲኖ።
 ኢካ ዛሬዳ፣ «ባኩታይ ደዲያሳ ሾርቲ ሺቃናዋ» ያጌዳ።

18

ማንቆ ጊዳዳ አምዓቲባኔ ማካላንቻ ዳናባ

1 ዬሱሲ ባሬና ካሊያውንቶ፣ ሳሌቲናን ኡባ ጋላሲ ዋሳናዳን
 ለሚሱዋን ኦዳዳ። 2 ኢካ፣ «ኢቲ ካታማን ያሳው ያዬናዌ፣ አሳካ
 ቦንቼና ኢቲ ዳናይ ደዒ። 3 ሄ ካታማን አምዒ ሚሺራታ ደዒው።
 ኢዛካ ሄ ዳናኮ ያዳ፣ ታ ሞርከዉኔ ታው ደዲያ ዬወዋ ፐርዳ)
 ያጋዲ።
 4 «ዳር ዋዲያን ኢዚው ፐርዳናን ኢጻዳ። ሺን ባሬ ዋዛናን
 ቆጥዳ፣ ታኒ፣ ኡባ ያሳው ያያና ቆዮፔካ፣ አሳካ ቃይ ቦንቻና
 ቆዮፔ፣ 5 ሃ አምዒ ሚሺራታ ታና ላባንሊያ ዲራዉኔ ኡባ ዋዳ
 ታኮ ያዳ ታና ዳቡርሴና ማላ፣ ታኒ ኢዚው ፐርዳና) ጌዳ።
 6 «ሄ ማካላንቻ ዳናይ ጎዋ አኬከቱ። 7 ያሳይ ጋላሲኔ
 ቃማ ባሬንታ ማዳና ማላ፣ ዳንዲያን አኮ ዋሲያ ደሬታዋንቴሲ
 ፐርዳኔዬ? ኢ ኡንቴንቶ ኤሌካ ዛሬኔ? 8 ታኒ ሂንቴንቶ ያጋይ፤
 ኡንቴንቶ ኤሌሊ ፐርዳና፤ ሺን አሳ ናዓይ ዪያ ዋዳ ሃ ቢታን
 አማኑዋ ደማኔሻ?» ያጌዳ።

ኦቶሬቲያ ፓሪሳዊያኔ ባሬና ካዉሺሴዳ ቃራፃ ቃንጻያ ቢታኒያ

9 ባሬንታ ጌሻ ጊዳ አማኔቲያዋንቶኔ ሃራ ኡባ ዳሪ ካዲያዋንቶ፣
 ዬሱሲ ሃ ለሚሱዋ ኦዳዳ። 10 «ላዑ አሳቱ ዋሳናው ጌሻ
 ጎሊያ * ጌሌዲኖ። ሄዋንቴፔ ኢቱ ፓሪሳዊያ፤ ኢቱ ቃይ ቃራፃ

17:31 ማጥ 24:17፣ 18፤ ማር 13:15፣ 16 17:32 ደም 19:26 17:33
 ማጥ 10:39፤ 16:25፤ ማር 8:35፤ ሉቃ 9:24፤ ዮሀ 12:25 17:36 ማጥ 24:40
 * 18:10 ዋሳናው ጌሻ ጎሊያ፣ አዪሁዳ አሳይ ኡባ ዋዳ ጌሻ ጎሊያን ዋንታ ጉራኒኔ
 ጋላሳ ዋሲኖ።

ቃንዲያው። 11 ፓሪሳዊ ዳንዲ ኤቁዳ ባሬ ዋዛናን ዋሲዳ፣ ረዳው፣ ታኒ ሃራ አሳዳን፣ ቦንቁያዋንቱዳን፣ ማካሊያዋንቱዳን፣ ዋሹሚያዋንቱዳን፣ ዋይ ሃዋዳን ቃራፃ ሺሼና ዲራው ኔና ጋላታይ። 12 ሳሚንታን ላዑ ካላ ፆማይ፤ ታኒ ዳሚያ ኡባፔ ታሙ ኩሺያፔ ኢቱዋ ኢማይ፤ ያጌዳ።

13 «ሺን ቃራዲያ ቢታኒ ሃኩዋን ኤቁዳ፣ ባሬ አይፊያን ፑዳ ሳሉዋ ቶቁ ጊዳ ፃላናዉካ ኮዪቤና። ሺን ባሬ ቲራ ባቂዳ፣ ረዳው፣ ታኒ ናጋራንቻ፤ ታና ማራ» ያጌዳ። 14 ታኒ ሂንቴንቶ ኦዲያዌ አይ ጎፔ፣ ካሴ ቢታኒያፔ አቋዳ ሃ ቢታኒ ዓሎ ጊዲዳ ባሬ ጎሌ ሲሜዳ፤ ባሬና ቶቁ ኦሊያ ኡባይ ካዉሻና፤ ባሬና ቃይ ካዉሺሲያ ኡራይ ቶቁ ጋና» ያጌዳ።

ዬሱሲ ጉላ ናና አንጆዳ
(ማጥ 19:13-15፤ ማር 10:13-16)

15 ዬሱሲ ባሬ ኩሺያ ዋሊዳ አንጆና ማላ አሳይ ጉላ ናና አኪዳ አኮ ዬዲኖ። አ ካሊያዋንቱካ ቤዒዳ፣ አሳ አሃና ማላ ጌዲኖ። 16 ዬሱሲ ቃሲ ጉላ ናና ባሬኮ ያሲዳ፣ «ጉላ ናናይ ታኮ ያና ማላ አገቱ፣ ዲጎፐቱ፤ ያሳ ካዉቲላይ ሃዋንቱ ማላሳ። 17 ታኒ ሂንቴንቶ ቱሙዋ ኦዳይ፤ ያሳ ካዉቲላ ጉላ ናናዳን አኮናዋንቱ ኡባይ ሄ ካዉቲላ ሙሌካ ጌሌና» ያጌዳ።

18 ዪሁዳ ቢታ ሞዲያዋንቱፔ ኢቱ፣ «ሎፆ ታማሪሲያዋ፣ ታኒ ሜቋና ዳዑዋ ላታናው አያ ኦላናው ቤሲ?» ያጌዳ ዬሱሳ ኦቹዳ። 19 ዬሱሲካ አው፣ «አያው ታና ሎፆ፣ ያጋይ? ኢቲ ያሳፔ አቲን፣ ሎዑ ኦኒኔ ባዋ፤ 20 ያሳ አዛዛቱዋ፣ ረዋሹዋ፣ ዋቋ፣ ዉፆ፣ ዋርዲዋ ማርካቶ፣ ኔ አባኔ ኔ ዳኮ ቦንቻ ያጊያዋ ኤራ» ያጌዳ ዛሬዳ። 21 ቢታኒ ዛሬዳ፣ «ሃዋ ኡባ፣ ናናቲላፔ ደማዳ ናጋዲ» ያጌዳ።

22 ዬሱሲካ ሃዋ ሲሲዳ፣ «ኢቲባይ ኔኒ ቢሮን ኦሌናኒ አቶዌ ዳዒ፤ ሄዋኔካ፣ ኔው ዳዒያዋ ኡባ ዛሊዳዳ ማንቃቶ አማ፤ ሃዋ አላፔ ሳሉዋንካ ኔኒ ዲሬታና፤ ሄዋፔ ጉዬ ታ ጌዲዋ ካላ» ያጌዳ። 23 ሄ ቢታኒ ቃሲ ሄዋ ሲሲዳ ዳር ዲሬ ጊደ ዲራው ዳር ካኮቲዳ።

24 ዬሱሲካ ሃ ቢታኒ ዳር ካኮቶዋ ቤዒዳ፣ «ዲሬ አሳይ ያሳ ካዉቲላ ጌላናው ዋቲ ማታንዳሻ! 25 ዲሬ አሳይ ያሳ ካዉቲላ ጌላናዋፔ ጋሉ ማርፒያ ያዒያና አቋናዌ ማታቱ» ያጌዳ። 26 ሄዋ ሲሲዳ አሳይ፣ «ሲሚ ኦኒ አታናው ዳንዳዪ?» ያጌዲኖ።

27 ኢካ ቃይ ዛሬዳ፣ «አሳው ዳንዳዬቲናዌ ያሳው ዳንዳዬቲ» ያጌዳ። 28 ጳዲርሲ ዛሬዳ፣ «ሲሚ ኦኒ ኦሲ ዳዒያ ኡባ አገዳ ኔና

ካሌድ» ያጌዳ። 29 እካ፡ «ቱሙቀ ጋይ፡ ያሳ ካዉቱላ ዲራው ባሬ ጎሊያ፡ ዋይ ባሬና ዩላዋንታ፡ ዋይ ባሬ ማቺያ፡ ዋይ ባሬ ናና፡ ዋይ አሻቱቀ አጌዳዌ፡ 30 ሃዋዲያን ዳር ዳኩቀ፡ ሲንላ ዪያ ካዉቱላኒካ ሜዲና ደዑቀ አኬናዌ ኦኒኔ ባዋ» ያጌዳ።

ዩሱሲ ባሬ ሃይቁዋባ ሄዜንሉቀ ኦዳዳ
(ማጥ 20:17-19፤ ማር 10:32-34)

31 ዩሱሲካ ታማኔ ላዑ ባሬና ካሊያዋንታ ባሬኮ ዪሲዳ፡ «ሲሚ ዩሩሳላሜ ባና፤ አሳ ናዓባይካ ናባቱ ማፃፋን ፃፊቱዳባይ ኡባይ ያኒ ፖሊታና። 32 አዪሁዳ ጌዳናዋንቶ አ አሊ ኢማና፡ ቁሊጫና፡ ዳር ሜቶላና፡ አ ቦላን ጨቻና፤ 33 ሾጮቀፔ ጉዩያን ዋዳና፡ ሄዜንሊያ ጋላሲ ኢ ዳንዳና» ያጌዳ።

34 ኡንቱንቱካ ሃ ዩዉዋፔ አያኔ አኬኪቤይኪና፤ ሃዩቁካ ኡንቱንቶ አኬኬቲቤና ዲራው ኢ ሃሳዮባካ ኤሪቤይኪና። 35 ዩሱሲ ኢያርኮኮ ማቲዳ ዋዲያን፡ ኢቲ ቆቃ ቢታኒ ዋሲዳ ኦጊያ ጋፃን ኡቲዳ። 36 ጮራ አሳይ አዲያዋ ሲሲዳ፡ «ሃዌ አዩሻ?» ያጌ ኦቺዳ። 37 አሳይካ አው፡ «ናዚሬቲያ ዩሱሲ ሃዋና አዲዳ ዳዔ» ያጌ ዛሬዲና።

38 እካ፡ «ዳዊቲ ናዓ ዩሱሳ፡ ታና ማራሪኪ» ጌዳ ዋሴዳ። 39 አፔ ሲንላና ቢዳ ዳዒያዋንቱካ፡ ጮዑ ጋናዲን ሃንቁቲዲና። ኢ ቃይ፡ «ዳዊቲ ናዓው፡ ታና ማራሪኪ» ጌዳ ዳሪ ዋሴዳ።

40 ዩሱሲካ ኤቁዳ፡ ባሬኮ አሃናዲን አሳው ኦዳዳ። 41 ዩሱሳኮ ኢ ማቶ ዋዲያን፡ ዩሱሲ፡ «ታኒ ኔው አያ ኦላናዲን ኮያይ?» ያጌዳ አ ኦቺዳ።

ኢካ ዛሬዳ፡ «ጎዳው፡ ፃላናው ኮያይ» ጌዳ።

42 ዩሱሲካ፡ «ፃላ፡ ኔ አማኑ ኔና ፓሴዳ» ያጌዳ። 43 ሃ ዋዲያንካ ፃሊ አጌዳ፤ ያሳካ ቦንቺዳ አ ጌዱዋ ካሌዳ። አሳይ ኡባይ ቢታኒያ ፃሊዳ፡ ያሳ ጋላቲዲና።

19

ዩሱሳኔ ዛኪዮሳ

1 ዩሱሲ ሂኒ ኢያርኮ ካታማ ጌሊዳ፡ ሄዋና አዲ ዳዔ። 2 ሱንላይ ዛኪዮሳ ጌቲቲያ ኢቲ ዲሬ ቢታኒ ሄዋን ዳዔ። ኢካ ቃራዲያዋንቱሲ ካቸዋ። 3 ዛኪዮሲ ዩሱሳ ጌቲቲያዋ ሃቃዌንቶ ቢዓናው ኮዩሺን ቃንላ ጌዳዳዋ ዲራው፡ አሳ ጮራቲላፔ ዳንዶዋን ቢዓናው ዳንዳዩቤና። 4 ዩሱሲ ሄ ኦጊያና አዲያ ዲራው፡ ሲንላው አዲዳ ኢቲ ቦዒያ ቦላ ኬሴዳ።

5 ዩሱሲ ህ ሳዓ ጋኪዳ፣ ጾቁ ገ ፑዳ ያሊዳ፣ «ዛኪዮሳ፣ ሃቼ ኔ ጎሌን ፔሻናው ቤሲያ ዲራው ኤሌ ዎቋ» ያገደ። 6 አካ ኤሌሊ ቦሊያፔ ዎቋዳ፣ ናሼቻን ዩሱሳ ሞከዳ። 7 ሃዎን ዳዒያ አሳ ኡባይ ሃዎ ቤዒዳ፣ «ሃዌ ናጋራንቻ ጎሌን ጌሊዳ ኢማሳ ገዲዳ ሾቤታና ሃኔ» ገዳ ኡባቱካ ዙዙንሳ ደሜዲኖ።

8 ዛኪዮሲካ ቃሲ ኤቂዳ ጎዳ፣ «ጎዳው፣ ሲሚ ታው ዳዒያዎ ኡባፔ ባጋ ሂዬሳቶ ኢማና፤ ኦፔኔካ ዎርዲዎን ኣከዳዎ ገደፔ፣ ኦይዲ ዳኩዎ ኡዳዳ ዛራና» ያገደ።

9 ዩሱሲካ ዛኪዮሳው ኦዲዳ፣ «ኔኒካ ኣብራሃሞ ሼሻ ገዲያ ዲራው፣ ሃቼ ኣቶቱሳይ ሃ ጎሌ አሳው ዩዳ። 10 ኣያው ጎፔ፣ አሳ ናዓይ ባዬዳዎ ኮያናዉኔ አሻናው ዩዳ» ያገደ።

ታሙ ቆማቱዎ ለሚሱዎ
(ማጥ 25:14-30)

11 አሳይ ሃዎ ሲሲዳ ዳዒሺን ዩሱሲ፣ ሂኒ ዩሩሳላሚ ማቶ ዲራዉኔ ኡንቱንቶ ያሳ ካዉቱሳይ ሃዒካ ቆንጨያዎ ማላቶ ዲራው ለሚሱዎ ኦዳዳ። 12 ሃዎዳን ያገ ደሜዳ፤ «ኢቲ ዎልቃማ ቢታኒ ባሬው ካዉቱሳ ቦንቹዎ ኣኪዳ ሲማናው፣ ሂኒ ሃኮ ጋዲያ ቤዳ። 13 ባሬ ቆማቱዎ ገደፔ ታሙዎ ያሲዳ፣ ኡንቱንቶ ታሙ ሚና * ጌቲቲያ ሚሻ ኢሞዎሺን፣ ሓታኒ ሲማዳ ያና ጋካናው፣ ሃሚሻን ዛለዒሺቱ» ያገደ።

14 «ሺን ኣ ጋዲያ አሳይ ኣ ኢያ ዲራው፣ ሓ ቢታኒ ኑ ቦላ ካዉታናዳን ኦኒ ኮዮኩ» ያገደ። ጉዩና ኢ ዳዒያሳ አሳ ከቲዲኖ። 15 ገደፔ ኣቲን፣ ሃ ቢታኒ ካቲ ገዲዳ ሂኒ ባሬ ጋዳ ሲማዳ። ሄ ቆማቱ ሁጲያን ሁጲያን ኢ ኢሞ ሚሻን ዛለዒዳ ኣይ ከና ዎቋሴዲናንቶ ኤራናው ያሲሴዳ።

16 «ኮይሮ ቆማይ ሸቂዳ፣ ሓዳው፣ ኔኒ ታው ኢሜዳ ታሙ ሚና ዎቋያ ታሙዎ ዳማዲ» ያገደ። 17 ኣ ጎዳይ ኣ፣ ሓያናሾ! ኔኒ ሎዎ ቆማ፤ ኔኒ ጉላ ዩዉዎን ኣማኔቲዳዎ ገዳዳ ቤቶ ዲራው፣ ታሙ ካታማቱዎ ቦላን ማታይ ኔው ኢሜቲዳ» ያገደ።

18 «ላዔሊያዌካ ሸቂዳ፣ ሓዳው፣ ኔኒ ታው ኢሜዳ ኢቹሹ ሚና ጌቲቲያ ሚሻይ ኢቹሹዎ ዎቋዳ» ያገደ። 19 ኣ ጎዳይካ ኣ፣ ሓው ኢቹሹ ካታማቱዎ ቦላን ማታይ ኢሜቲዳ» ያገደ። 20 ሃራ ሄከንሊያ ቆማይ ሸቂዳ፣ ሓዳው፣ ጨርቃን 99 ዎሌዳ ኔ ሚሻ

19:10 ማጥ 18:11 19:11 ማጥ 25:14-30 * 19:13 ሚና፣ ሚና ጌቲቲያዌ፣ ግሪኬ ቃላን ሓረፍሰን ገያዎ። ሃዎ ቢሌላይ፣ ሄዎዳ ዳዒያ ኣሳንቻ ኣሳው ኢሜቲያ ሄዙ ኣጌና ዲርጉዎ።

ሃዋ ቤዓ። 21 እያው ጎፔ፣ ኔኒ ዋላቤናሳፔ አኪያዋ፤ ዜራቤናዋ ቆይጪያ ማቁላ ባይና አሳ ገዲያ ዲራው፣ ኔው ያያዲ) ያጌዳ።

22 «ጎዳይካ፣ ሃ ኢታ ቆማይ፤ ኔኒ ሃሳዮ ቃላን ኔ ቦላ ታኒ ፐርዳና። ዋላቤናዋ አኪያዋ፣ ዜራቤናዋ ቆይጪያ ማቁላ ባይና አሳ ገዲያዋ ኤሮፔ። 23 ታኒ ያዴ ታ ሚሻ ዋዲያና አካና ማላ፣ አዪሲ ዋዲሲያዋንቶ አማቤይኪ?) ያጌዳ።

24 «ጎዳይካ፣ ሃዋን ኤቆዋንታ፣ ሃ ሚሻ አፔ ዋላ አኪዴ ታሙ ሚናይ ዴዲያዋ አሚቴ) ያጌዳ። 25 ኡንቱንቱካ፣ ጎዳው፣ አው ታሙ ሚናይ ዴዴ) ያጌዳና።

26 «አካ፣ (ታኒ ሂንቱንቶ ኦዲያዋ፣ ዴዲያዋ ኡባው ጉጃታናዋ፤ ባይናዋፔ ቃሲ ሂ ዴዲያዋካ አኬታናዋ። 27 ዬወዋን ቃሲ ታኒ ኡንቱንቱ ቦላን ካወቱናዳን ኮዬዳ ታ ሞርካቱዋ ታኮ አሂዴ ታ ሲንላን ሹኪቴ) ጌዳ» ያጌዳ።

ዬሱሲ ዳር ቦንቹዋን ዬራሳላሚ ጌሌዳ
(ማጥ 21:1-11፤ ማር 11:1-11፤ ዮሀ 12-19)

28 ዬሱሲ ሃዋ ጎዋፔ ካላ ሂኒ ዬራሳላሚ ኬሳናው ባሬና ካሊያዋንቱፔ ሲንላቲዴ ቤዳ። 29 ዴብሬ ዛይቲ ጌቲቲያ ዴሪያ ማታን ዴዲያ ሂኒ ቤቲፋጌን ቢታኒያ ጌቲቲያ ሄራ ካታማቱዋኮ ሹቄዳ ዋዴ ባሬና ካሊያዋንቱፔ ላዓቱዋ። 30 «ሂንቱንቱ ሲንላን ዴዲያ ቁሪ ካታማቱዋ ቤቲ፤ ያ ሂንቱንቱ ጌሊያ ዋዴ፣ ኦኒኔ ቢሮ ኡቲቤና ሃሬ ማራይ ቃሹቲ ኡቲዳዋ ዴማኒታ፤ አ ቢሊዴ ሃ አኪ ዪቲ። 31 ኦኒኔ ሂንቱንታ፣ ሃዋ አያው ቢሊቲ?) ጌዴ ኦቾፔ፣ (ኢ ባሬ ጎዳው † ኮሺያ ዲራሳ) ያጌቲ» ያጌዳ።

32 ኪቲቲዳዋንቱካ ቢዴ፣ ዬሱሲ ኡንቱንቶ ኦደዋዳን ሃኒና ዴሚዲና። 33 ኡንቱንቱ ሃሬ ማራ ቢሊያ ዋዴ ቤዲዴ ሃሪያ ጎዳይ፣ «ሃሬ ማራ አያው ቢሊቲ?» ያጌዳ። 34 ኡንቱንቱካ፣ «ጎዳው ሃዌ ኮሺ» ያጌዳ። 35 ሃሬ ማራ ዬሱሳኮ አሄዲና፤ ባሬንቱ ማዩዋ አ ቦላን ዋላዴ ዬሱሳ ሃሪያ ቶጊሴዲና። 36 አሳይካ ዬሱሲ ቢያ ኦጊያ ቦላ ባሬንቱ ማዩዋ ሂዳዲና። †

37 ኢ ዴብሬ ዛይቲ ጌቲቲያ ዴሪያ ዲጌላ አፊያ ኦጊያ ማቲዳ ዋዴ፣ ዳር ጮራ ጌዴዳ አ ካሊያዋንቱ ቤዴዳ ያሳይ ኦሴዳ ማላታው ኡባው ናሽቲዴ፣ ባሬንቱ ኮሻ ቶቁ ኦሴዴ።

38 «ጎዳ ሱንላን ዪያ ካቲ አንጃቲዳዋ፤

19:26 ማጥ 13:12፤ ማር 4:25፤ ሉቃ 8:18 † 19:31 ጎዳው፣ ሃዋን ጎዳው ጌቲቶዴ፣ ሃሬ ማራ ጎዳፔሺን፣ ያሳ ጌዴና። ‡ 19:36 ማዩዋ ሂዳዲና፣ ሃዋ ጉሳይ፣ አዪሁዳ አሳ ዋጋን፣ ኤሬቲዳኔ ቦንቹቲያ አሳው ኡዳቲያ አማላ ሞካ ዋጋ።

ሳሉዋን ሳርታይ ገደ።
 ቃሲ ኪሊ ቋቃ ሳሉዋን
 ዳዒያ ያሳይ ቦንቹቶ»
 ያጌዲኖ።

³⁹ እሳ ጋርሳን ዳዒያ ኢቲ ኢቲ ፓሪሳዋቱ ዩሱሳ፣ «ታማርሲያዎ፣ ነና ካሊያዋንታ ጮው ኦሳሪኪ» ያጌዲኖ። ⁴⁰ እካ ዛሪዳ፣ «ታኒ ሂንቲንቶ ኦዲይ፣ ኡንቲንቲ ጮው ጎፔ፣ ሹቻይካ ዋሳናዋ» ያጌዲኖ። ⁴¹ ዩሱሲ ዩሩሳላሜ ማቴዳ ዎዳ፣ ካታማቶ ቤዒዳ፣ ዩኪዳ፣ ⁴² «ኔ ሳርታው ገዲያዋ ኔኒ ሃቹ ኤራዲንቶ ሎዳ፤ ሺን ሃዒ ሄዌ ኔ ኣይፊያፔ ጌሜዳ። ⁴³ ኣያው ጎፔ፣ ኔ ቦላ ያና ዎዲ ዳዒ፤ ሄ ዎዳ ነና ኢዲያዋንቲ ኔ ዩሹዋን ዲርሳ ዲሪዳ፣ ያፔኔ ሃፔኔ ደዲዳ፣ ነና ኡንዔሊያ ዎዲ ያናዎ። ⁴⁴ ነናኔ ኔ ዲርሳ ጋርሳን ዳዒያ ኔ እሳ ሜንጮሪሳና። ያሳይ ነና ቤዳናው ዩዳ ዎዲያ ኔኒ ኤራቤና ዲራው፣ ነና ኢዲያዋንቲ ሹቻ ኡባ ኢቱዋ ኢቱዋ ቦላፔ ዳንጲዳ ላላናዎ» ያጌዲኖ።

ዩሱሲ ጌሻ ጎሊያን ዛሊዲያዋንታ ዩዳርሴዳ
 (ማት 21:12-17፤ ማር 11:15-19፤ ዮሀ 2:13-22)

⁴⁵ ሃዋፔ ካላ ዩሱሲ ጌሻ ጎሊያ ጌሊዳ፣ ዛሊዲያዋንታ ሃዋፔ ከሴዳ። ⁴⁶ ዩሱሲ ዛሪዳ፣ « ነታ ጎሊ ያሳ ዎሲያ ጎሊያ ገዳናዋ) ጌቲቲዳ ያሳ ቃላን ያፊቲዳ። ሺን ሂንቲንቲ ኦ ፓኑዋ ጎንጎሉዋ ኦሌዲታ» ያጌዲኖ። ⁴⁷ ዩሱሲ ኡባ ዎዳ ጌሻ ጎሊያን ታማሪሲ ዳዒሺን፣ ቁሳቲዋ ካፓቲ፣ ሙሴ ሂጊያ ታማሪሲያዋንቲኔ ኣሳ ኣዩሲያዋንቲ ኦ ዎቋናው ኮዩኖ። ⁴⁸ ሺን ኣሳይ ኡባይ ኦ ሃሳያፔ ኢቲኔ ኣቲናን ሲሲ ኡቶ ዲራው፣ ኦ ዎቋያ ኦጊያ ኡንቲንቲ ቋዩዲኖ።

20

ዩሱሳ ማታ ቦላ ዳንዳዳ ኦሻ
 (ማት 21:23-27፤ ማር 11:27-33)

¹ ኢቲ ጋላሲ ዩሱሲ ኣሳ ጌሻ ጎሊያን ታማሪሲዳኔ ሚሺራቹዋ ቃላ ኦዲዳ ዳዒያ ዎዳ፣ ቁሳቲዋ ካፓቲኔ ሙሴ ሂጊያ ታማሪሲያዋንቲ ጋዲያ ጨማቱዋና ኢቲፔ ዩሱሳኮ ዩዲኖ። ² ኡንቲንቲካ፣ «ሃ ዩዉዋ ኔኒ ኡዲያዌ ኣይ ማታኔንቶ ኦዳ፤ ሃ ማታካ ኔው ኢሜዳዌ ኢ ኦኔ?» ያጌዳ ኦቹዲኖ። ³ እካ፣ «ታ

ሂንቲና ኢቲ ኦሻ ኦቺያዌ ዳዒያዋ እኔ ዛሪቱ። 4 የሃሊሳ ሂንቃታይ ያሳፎ ዋይ አሳፎ?» ያገ ኦቺዳ።

5 ኦንቱንቱ ባሬ ጊደን ማቄቲዳ፡ «ያሳፎ ጎፎ፡ ሄዋ ጊደፎ (አያው አማኒቤይኪቲ) ኮና ያጋናዋ፤ 6 (አሳፎ) ጎፎ፡ አሳይ ኡባይ የሃሊሳ ናቢያ ጊደያዋ አማኒያ ዲራው ሹቻን ኮና ዳቻናዋንታ» ያገዲዳ። 7 ሃዋሲ፡ «ሃቃፎ ዬዳንቶ ኤርኮ» ጊዳ እው ዛሬዲዳ። 8 ዬሱሲካ፡ «ሃዋ ጊደፎ ታካ፡ ታኒ ኦ ማታን ሃ ዬወዋ ኦሳይታንቶ ሂንቱንቶ ኦዲኬ» ያገዲዳ።

9 ሃዋፎ ሲሚዳ ዬሱሲ አሳው ሃ ለሚሱዋ ያገ ኦዲዋ ደሚዳ፡ «ኢቲ ቢታኒ ዳር ዋዪኒያ ቱራቱዋ ቶኬዳ። ጎሻንቻቱዋሲ ኮላው አሚዳ፡ ኢ ሂኒ ሃራ ጋዲያ ቢዳ ጮራ ዋዲያ ጋሚዳ። 10 ዋዪኒ አይፊያ አይፎ ዋዳ፡ ዋዪኒያ ጎሻ ጎዳይ ባሬና ጋኪያዋ አሃናዳን ኢቲ ቆማ ኮላዋቱዋኮ ኪቲዳ። ኪቲቲ ቤዳዋካ ቶቢዳ፡ ሜላ ኩሺያ ዬዳዲዳ። 11 ሃዋፎ ሃራ ቆማ ኪቲዳ፡ ኦንቱንቱ ሄዋካ ቃሲ ቶቢዳ፡ ቶቺዳ፡ ሜላ ኩሺያ ዬዳዲዳ። 12 ሃዲካ ሃራ ሄዜንሲያ ቆማ ኪቲዳ፡ ኦንቱንቱካ ቃሲ አ ማሱንሲዳ፡ ሂኒ ካሬ ኦሌዲዳ።

13 «ሄ ዋዪኒያ ቱራ ጎዳይካ፡ ሰሚ አያ ኡዶ? እኔ ሃዲ ታ ደሲያ ናዓ ኪታና፤ ኦኒ ኤሪ አ ቦንቸፎኔ» ጌዳ። 14 ጎሻንቻቱ ቃሲ ናዓ ቤዔዳ ዋዳ፡ (ሃዋ አ ላቲያዋ ጊደ ዲራው፡ ሃዪቲ ዋቶይቲ፤ ሃዋፎ ጉዬ፡ ቢታይ ኦሳ ጊደናዋ) ጊዳ ዘሬቲዲዳ። 15 ዋዪኒያ ቱራ ሳዓፎ፡ ሂኒ ካሬው ኬሲዳ አ ዋቶዲዳ።

«ዋዪኒያ ቱራ ጎዳይካ ኦንቱንታ አያ ኦላንዳሻ? 16 የፎ ሄ ጎሻንቻቱዋ፡ ዋቶናዋ፤ ዋዪኒያ ቱራ ሳዓካ ሃራንቶ አማናዋ» ያገዲዳ።

አሳቱካ ሃዋ ሲሶ ዋዳ፡ «ሃዋ ማላባ አሆፖ» ያገዲዳ። 17 ዬሱሲካ ሂኒ ኦንቱንቱኮ ያሊዳ፡

« ሰሚ ሹቻ ጎሊያ ኬዲያዋንቲ ካጴዳ ሹቻይ፡ ኢ ዋና ጎሊያ ሚኒሲያ ሁጴ ሹቻ ጊዳዳ) ጌቲቲዳ ያፊቲዳዋ ቢሉላይ አዬ? 18 ሃ ሹቻ ቦላን ኩንዲያ ኡባይ ሚዔሬቲ፤ ሹቻይካ አ ቦላን ኩንዲያ ኡባይ ቡንቼታናዋ» ያገዲዳ።

ጊራ፡ ጊራኔ አጋኔ ጊያ ኦሻ (ማት 22:15-22፤ ማር 12:13-17)

19 ሙሴ ሂጊያ ያፊያዋንቲኔ ቄሳቱዋ ካፓቲ ዬሱሲ ሃሳዬዳ ለሚሱ፡ ኦንቱንቱ ቦላን ጌቲቶዋ ኤር ዲራው፡ ሄ ሳቲያንካ

አ ከይቃናው ኮዬዲኖ። ሺን አሳው ያዩዲኖ። 20 ዬሱሳ፡ ሄ ጋዲያ ሞዲያዋሲኔ አ ማታሲ አሊዴ አሆናው አ ደናፔ ኬሲያ ቃላን ከይቃናው አንጃቲያ ዋዲያ ናጊኖ። ሄዋ ዲራው ጌሻ ማላቲዳ ኦይላናው ዋቺያዋንታ ኪቲዲኖ። 21 ሄ ኪቲቶዋንቲካ ዬሱሳ፡ «ታማሪሲያዎ፡ ኔኒ ቱማ ዬወዋ ሃሳዪያዋኔ ታማሪሲያዎ፡ ሄዋዳንካ ቃይ ያሳ ኦጊያ ቱማቲላን ታማሪሲያዋኔ ኦሲኔ ዲማዬናዋ ኩኒ ኤሪቶ። 22 ቃሲካ ኡንቲንቲ፡ ሮማ ካቲያ ቁሳሬው ገራ ጨጋናው ኮሺ ዋይ ኮሺኔ?» ያገ ኦቼዲኖ።

23 ኢ ቃሲ ኡንቲንቲ ዳሻቲላ ኤሪዳ፡ 24 «እኔ ታና ኢቲ ዲናሪያ * ቤሲቲ፤ ሄዋ ቦላን ዳዲያ ሚሲሊኔ ፃፊቶዌ ኦና ቤሲ?» ጌዳ። 25 ኡንቲንቲካ፡ «ቁሳሬዋ» ጊዴ ዛሬዲኖ። ኢኔካ፡ «ሄዋ ጊዶ፡ ቁሳሬዎ፡ ቁሳሬው አሚቲ፤ ያሳዋ፡ ያሳው አሚቲ» ያገደ። 26 ኡንቲንቲካ፡ ኢ ሃሳዬዳ ቃላን አሳ ስንላን ኦይቃናው ዳንዳዪ ቤይኪኖ። አ ዛሩዋን ማላሌቲዳ ጮው ጌዲኖ።

ሃይቁዋፔ ዳንዲዋባ አሻ
(ማጥ 22:23-33፤ ማር 12:18-27)

27 ሳዲቃዋናቲቲ ኢቲ ኢቲ ዬሱሳኮ ዪዳ፡ አሻ አው ሺሼዲኖ። 28 ኡንቲንቲካ ዬሱሳ፡ «ታማሪሲያዎ፡ ኢቲ ቢታኒ ማቻቶ አኪዴ ናዓ ዬሌናን ሃዪያዋ ጊዶ፡ ሚሺራቶ ሄዋ አሻይ ላታ አኪ ናዓ ዬሊዴ ባሬ አሻው ዜሬላ ዋላና ማላ ሙሴ ኩሲ ፃፊዳ። 29 ኢቲ ዋዲያን ላፑ አሻቲ ዳዲያዋንቲ፤ ባይራይ ማቻቶ አኪዴ ዬሌናን ሃይቁ አገዳ። 30 ላዔሊያዋካ ኢዞ ላቲዳ። 31 ሄዜንሊያዋካ ቃሲ ኢዞ አኪዳ፤ ላፑናቲካ ኢዞ አኪዴ ናዓ ዬሌናን ሃይቁዲኖ። 32 ወርሴላን ሚሺራታካ ሃይቃ አጋዲ። 33 ሲሚ ላፑናቲካ ሄ ሚሺራቶ አኪዳ ዲራው፡ ሃይቁዋፔ ዳንዲዳ ዋዳ፡ ኢዞ ኦሲ ማቼ ጊዳኔ?» ያገ ኦቼዲኖ።

34 ዬሱሲካ፡ «ሃ አላሚያ ናናይ አኪኖኔ አኪቲኖ። 35 ሺን ሃይቁዋፔ ዳንዲዳ፡ ሲንላፔ ዪያ ዋዲያን ዳዓናው ቤሲያዋንቲ አኪኪኖኔ አኪቲኪኖ። 36 ኡንቲንቲ ያሳ ኪታንቻ ማላቲዳ ዳዲያ ዲራው፡ ሄዋፔ ሲሚዳ ሃይቁኪኖ። ሃይቁዋፔ ዳንዲያዋንታ ጊዲያ ዲራው ኡንቲንቲ ያሳ ናና። 37 ሙሴ፡ ያሳይ አው ቆንጩዳ ዋራባ ፃፊዳ ታሪኪያ ጋርሳን፡ ጎዳ ያሳ፡ «አብራሃም ያሳ፡ ዪሳቃ ያሳ፡ ያዪቆባ ያሳ» ያገደ ጳሱሳይ፡ ሃይቃዋንቲ ዳንዲያዋ

* 20:24 ዲናሪያ፡ ሄዋዴ ሮማ ቢታ አሳይ ጎዔቲያ ሚሻ። 20:27 ኪት 23:8 20:28 ዛር 25:5

ቤሱ። 38 ኡባይካ አው ሃይቂ ቤናዋንታ ጊዲያ ዲራው። ኢ ሃይቂቤናዋንቱ ያሳፎ አቲን፣ ሃይቆዋንቱዋ ጊዴና» ያጌዳ።

39 ኢቲ ኢቲ ሙሴ ሂጊያ ፃፊዳዋንቱካ፣ «ታማሪሲያዎ፣ ሎዑዋ ሃሳያዳ» ያጌዲና። 40 ሃዋፔ ሲሚዴ፣ ኢቱካ ኣ ኣቻናው ፃሎጭ ባዋ።

ዩሱሲ ኣኔ ጊያ ኦቫ
(ማጥ 22:41-46፤ ማር 12:35-37)

41 ሃዋፔ ካላ ዩሱሲ ኡንቱንታ፣ «አሳይ ኪሪሰቶሳ ዎቲ ሩዊቲ ናዓ) ያጊና? 42-43 ኃሉቲላይኔካ፣ ዳዊቲ ባሬ ሁጳው ማዚሙሬ ማፃፋ ኃርሳን፣

ሳዳይ ታ ጎዳ፣ «ታኒ ኔ ሞርኬቱዋ ኔ ጌዲያፔ ኃርሳና ዴዓናዲን ኦላና ኃካናው፣ ታ ኡሼቻን ኡታ» ጌዳ) ያጌዳ።

44 «ሲሚ ዳዊቲ ኪሪሰቶሳ፣ ሳዳ)፣ ጊዴ ፃሲያዋ ጊዶፔ፣ ዎቲ አው ናዓ ጊዳና ዳንዳዪ?» ያጌዳ።

ሙሴ ሂጊያ ታማሪሲያዋንቱፔ ናጌታና ማላ፣ ዩሱሲ ሴሬዳ ሴራ

(ማጥ 23:1-36፤ ማር 12:38-40)

45 አሳይ ኡባይ ሲሲሺን ባሬና ካሊያዋንቶ፣ 46 «ሙሴ ሂጊያ ታማሪሲያዋንቱፔ ናጌቲቲ፤ ኡንቱንቱካ፣ አዲሳ ቃሚሺያ ማዪዴ ዩያናው፣ ጌያይ ዴዒያሳን ቦንቾ ሳርታ አካናው፣ ዎሲያ ጎሌን ቦንቾ ኦይዲያን ኡታናው፣ ሸቤቲዳሳን ቦንቾሳ ኮዪያዋንታ። 47 ሂዋንቱካ አምዓቱዋ ጎሊያ ካሎዪያዋንታ፤ ባሬንታ ቤሳናው ዎሳ አዲሲያዋንታ፤ ኡንቱንታ ኢታ ፒርዳይ ናጌ» ያጌዳ።

21

አምዓቲ አሞታ
(ማር 12:41-44)

1 ዩሱሲ ቶቁ ጊዴ ፃሊያ ዎዴ፣ ዲሬ አሳይ ጌሻ ጎሊያን አሞታ ሺሺያ ሚሻ ጊዶን ባሬንቶ ዴዒያዋፔ ኡንቱንቱ ዩጊያ ዎዴ ቤዔዳ። 2 ቃሲካ ኢቲ ሂዩሳ አምዔ ሚሺራታ ላዑ ሴምቤሪያ ሄዋን ዩጊያ ዎዴ ቤዒዴ። 3 «ታ ሂንቲው ቱሙዋ ኃይ፣ ሃ ሂዩሳ አምዔ ሚሺራታ፣ ኦፔኔ ዳሩዋ ኢማዲ። 4 ሃ አሳይ ኡባይ ባሬንቶ

ፓላሆዋፔ አሜዲኖ፤ ሺን ኢዛ ባሬ ሂዬሳቴላ ዋልቃን ባሬው ዴዲያዋ ኡባ አማዲ» ያጌዳ።

ጌሻ ጎሊ ኮሌታናዋ ዩሱሲ ካሴቲዳ ኦዴዳ
(ማጥ 24:1-2፤ ማር 13:1-2)

5 እ ካሊያዋንቱፔ አቱ አቱ፡ «ጌሻ ጎሊ ሎዎ ሹቻኒኔ ባላ ሺቁዋ አሞታን ሎዴዳዋ» ያጌ ሃሳዪያ ዋዴ ዩሱሲ፡ 6 «ሃዌ ሂንቴንቱ ቤዲያዌ ኡባይ ኮሌቲናን፡ ሹቻይ ሹቻ ቦላን ኬሌቲዴ አቲና ዋዲ ያናዋ» ያጌዳ። 7 አንቱንቱካ፡ «ታማሪሲያዎ፡ ሲሚ ሃዌ ሃናናዌ አዉዴ? ቃሲካ ሃዌ ሃናናው ማለይ አዬ?» ያጌዲ አቸዲኖ።

ዩሱሲ ሜቱዋ ዋዲኔ ናሼቻ ዋዲ ያናዋ ኦዴዳ
(ማጥ 24:3-13፤ ማር 13:3-13)

8 አካ፡ «ኦኒኔ ባሌጮናዲን ናጌቲቲ፤ ጮራ አሳይ፡ (ታኒ ኪሪሰቶሳ) ያጌዴ ቃሲካ፡ (ዋዲ ማቲዳ) ያጌዴ ታ ሱንላን ያናዋንታ፤ ሂንቴንቱ ቃሲ አንቱንታ ካሎፒቲ። 9 አላ ዩዉዋኔ አሳ ማካላባ ሲሲያ ዋዴ ዳጋሞፒቲ፤ ሃዌ ኮይሮ ሃናናው ቤሲያዋ ጌዶ ዲራፔ አቲን ዉርሱላይ ቢራ» ያጌዳ።

10 ሃዋፔ ካሊዴ አሳው፡ «አሳይ አሳ ቦላ፡ ካዉቲላይካ ካዉቲላ ቦላ፡ ዴንዳናዋ፤ 11 ዋልቃማ ቢታ ቃላይ ሃናናዋ፤ ኮሻይኔ ሃርጌ፡ ዲማ ዲማሳን ሜዴታናዋ፤ ያሺያ ዩዉኔ ኡባካ ዋልቃማ ማላታይ ሳሉዋፔ ሃናናዋ።

12 «ሃዌ ኡባይ ሃናናፔ ካሲያን ቃሲ አሳይ ሂንቴንታ አይቃናዋንታ፡ ሜቶላናዋንታ፤ ሂኒ አዪሁዳቱዋ ዋሳ ጎሌ አሳው አሊ አማናዋንታ፤ ቃሾ ጎሊካ ጌሊሳናዋንታ፤ ካታቱዋ ሲንላኒኔ ዋዲያዋንቱ ሲንላን ሺሻናዋንታ፤ ሃዌ ኡባይ ታ ሱንላ ጋሱዋን ሂንቴንታ ጋካናዋ። 13 ሃዌካ ማርካታናው ሂንቴው ሎዎ ቃዳ ጌዳናዋ። 14 ሃዋ ጌዲያ ዲራው፡ አይ ዛሩዋ አማኔ ጌዴ ኮይሮቲዴ ሂንቴንቱ አንዴቲና ማላ ሃዋ ዋዛና አሊቲ። 15 ኤቄቲያዋንቱ ኡባይ፡ ኤቄታናዉኔ ላካናው ዳንዳዬና ቃላኔ አጼ ጨንጫቴላ ታኒ ሂንቴንቶ አማና። 16 ሂንቴንታ ዩሌዳዋንቱኔ ሂንቴንቱ አሻቱ፡ ሂንቴንቱ ዳባቲኔ ሂንቴንቱ ላጌላቲካ አቲናን ሂንቴንታ አሊ አማናዋንታ፤ ሂንቴንቱፔካ አቱዋ አቱዋ ዋቆናዋንታ። 17 ታ ሱንላ ዲራው አሳ ኡባ ማታን ኢጻቲዳዋንታ ጌዳኒታ። 18 ዩዉዋን ቃሲ ሂንቴንቱ ሁጲያ

21:15 ሉቃ 12:11-12

ቢናናፕካ ኢቴናኔ ባዩኩ። 19 ሚኒ ኤቂዴ ሂንቴንቴ ሺምፑዋ አሺታ።

ዩሱሲ ዩሩሳሌሜ ባዩላባ ኦዴዳ
(ማት 24:15-21፤ ማር 13:14-19)

20 «ዩሩሳሌሜ ኦላ ኣሳን ዶዴቴዳ ዎዴ፣ ኢዚ ባዩላይ ማቴዳዎ ኤሪቴ። 21 ሄ ዎዴ ዪሁዳን ዴዒያዎንቴ ዴሪያኮ ባቃቴኖ፤ ካታማን ዴዒያዎንቴ ቃይ ሄዋፔ ኬሲኖ፤ ባላጋሪያን ዴዒያዎንቴካ ያ ካታማኮ ጌሎፕኖ፤ 22 ያሳ ቃላን ፃፊቴዳዌ ኡባይ ፖሌታናዳን ሃዌ ሃሉዋ ኬሲያ ዎዲያ። 23 ቢታ ቦላን ዎልቃማ ሜቴ ሃናናዎ፤ ሃዒ ዴዒያ ኣሳ ቦላን ሃንቁ ያናዎ፤ ሄዋ ዲራው ሄዎዲያን ሻሃርዎንቶኔ ቋንቋያዎንቶ ኣዩ! 24 ኣሳይ ኡባይ ማሻን ሃይቃናዎንታ፤ ያሳ ኤሪና ጋዲያ ኡባቴካ ኦሞዲዎን ባናዎንታ፤ ዩሩሳሌሜካ ኣዪሁዳ ጊዴናዎንቴ ዎዲ ፖሌታና ጋካናው፣ ኡንቴንቴን ዩዴቴዳዉኖ ጊዳናዉኣ።

ኪሪሰቶሳ ሳዔሶ ዩሳ
(ማት 24:29-31፤ ማር 13:24-27)

25 «ኣዎ፣ ኣጌናኒኔ ያለንቴያ ቦላ ማላታይ ሃናናዎ፤ ኣባፔኔ ቤታ ኮሻፔ ዴንዶ ጋሱዎን ቢታ ቦላን ዴዒያ ኣሳይ ኡባይ ኡንዔታናዎንታ፤ ሂርጋናዎንታ። 26 ሳሉዋ ዎልቃይ ኡባይ ቃዲያ * ዲራው ኣሳይ ያሻኒኔ ኣላሚያ ቦላ ኣዩ ያናዌሻ ያጊዴ ናጉዎን ዳቡራናዎንታ። 27 ሄ ዎዴ ኣሳ ናዒይ ዎልቃኒኔ ዎልቃማ ቦንቹዎን ሻሪያን ዩያ ዎዴ ቤዓናዎንታ። 28 ሂንቴንቴካ፣ ሃ ዩዉ ፖሌታሳ ዶሚያ ዎዴ፣ ዎዙ ማቶ ዲራው ሰቲ ጊዴ ኤቂቴ፤ ፑዴ ቶቁ ጊዴ ያሊቴ» ጌዳ።

ባላሲያ ጌቴቴያ ሚላ ሌሚሱዋ
(ማት 24:32-35፤ ማር 13:28-31)

29 ካሊዴካ፣ ሃዎ ያጊ ሌሚሱዋ ኦዴዳ፣ «ዎዴንላፔኔ ሃራ ሚላ ኡባፔ ያሊቴ፤ 30 ሃይላይ ኣጩና ቤዒያ ዎዴ፣ ሄ ዎዴ ቦኒ ማቴዳዎ ሂንቴንቴ ኤሪታ። 31 ሄዎዳንካ ቃሲ ዩዎቴ ፖሌታያዎ ቤዒያ ዎዴ፣ ያሳ ካዉቴላታ ማቴዳዉኖ ኤሪቴ። 32 «ታኒ ሂንቴው ቴሙዋ ጋይ፤ ሃዌ ኡባይ ፖሌታና ጋካናው ሃ ዩሌታይ ኣዴና። 33 ሳሉኔ ሳዒይ ኣቋና፤ ሺን ታ ቃላይ ኣዴና።

21:22 ሆስ 9:7 21:25 ኢሳ 13:10፤ ሂዝ 32:7፤ ኢዩ 2:31፤ ሳፅ 6:12፤ 13
* 21:26 ሳሉዋ ዎልቃይ ኡባይ ቃዴ፣ ሃዎ ጉሳይ፣ ቤኒ ዎዴ ኣሳይ፣ ሳሉዎን ዴዒያ ያለንቴ ኡባይ ኣያና ዎልቃና ዴዒ ጊዴ ቆፔ። 21:27 ዳን 7:13፤ ሳፅ 1:7

34 ሲሚ ዛዋይ ባይና ደዑዋን፤ ኡሻ ዳሩዋን ደዑዋባን ኡንዴቲሺን ሂንቲንቱ ዋዛናይ ለፔናዳኒኔ ሄ ጋላሳይ ጲሪያዳን ቆፔናን ሂንቲና ጋኬናዳን ናጌቲቲ፤ 35 ሃዌ ቢታ ኡባን ዳዒያዋንቱ ኡባቱዋ ቦላን ጋካናዋ። 36 ሲሚ ዪያ ኢታባ ኡባፔ ሂንቲንቱ አታናዳኒኔ አሳ ናሳ ሲንገላንካ ኤቃናው ዳንዳያና ማለ፤ ኡባ ዋዴ ሚኒ ዋሲቱ» ያጌዳ።

37 ዬሱሲ ጋላሲ ጋላሲ ጌሻ ጎሊያን ታማሪሲዴ፤ ቃማ ቃማ ዴብሬ ዛይቲ ያጌቲያ ዳሪያኮ ኬሲዴ አቄ። 38 አሳይ ኡባይ አ ሲሳናው ጉራን ያ ጌሻ ጎሊያ አኮ ዪና።

22

ከሪስቶስ ዋዳናው ማቄቲዲኖ
(ማጥ 26:1-5፤ ማር 14:1-2፤ ዮሀ 11:45-53)

1 ፓሲጋ ጌቲቲያ ማጋጌ ኡኪላ ሚያ ባላይ ማቲዳ። 2 ቄሳቱዋ ካፓቱኔ ሙሴ ሂጊያ ፃፊያዋንቱ ዬሱሳ ዋቲ ዋዳኔንቶ፤ ዋዳያ ኦጊያ ጌማን ኮዪና፤ ሺን አሳው ያዪና። 3 ፃላሂካ ታማኔ ላዑ ካሊያዋንቱ፤ አቱዋ ጊዴዳ አስቆሮቱ ዪሁዳን ጌሌዳ። 4 ኢካ ቢዴ፤ ዬሱሳ ዋቲ አሊ ኢማኔንቶ ቄሳቱዋ ካፓቱዋና ጌሻ ጎሊያ ናጊያዋንቱ ካፓቱዋና አቲፔ ሃሳዬዳ። 5 ኡንቲንቲካ ናሼቲዴ፤ ሚሻካ ዪሁዳው ኢማናው ወሌቲዲኖ። 6 ኢካ ኤኖ ጌዳ፤ አሳይ ባይና ሳን ዬሱሳ አሊ ኢማናው ኢንጃቲያ ዋዲያ ኮዬ።

ዬሱሲ አዪሁዳቱዋ ፓሲጋ ማናው ጊጌቲዳ
(ማጥ 26:17-25፤ ማር 14:12-21፤ ዮሀ 13:21-30)

7 ማጋጌ ኡኪላ ሚያ ባላ ቦንቺያ ዋዲ ጋኬዳ፤ ሄ ዋዲካ ፓሲጋው ደርሳ ሹካናው ቤሲያ ዋዲያ። 8 ዬሱሲ ጳዒርሳኔ ዮሃኒሳ፤ «ፓሲጋ ቁማ ኦኒ ማናዳን ቢዴ ጊጊሲቲ» ጊዴ ከቲዳ። 9 ኡንቲንቲካ ዛሪዴ፤ «ሃቃን ጊጊሳናዳን ኮያይ?» ያጊ ኦቺዲና። 10 ኢካ፤ «ሂንቲንቲ፤ ካታማ ጌሊያ ዋዴ ኦቲዋና ሃላ ቶኬዳ ቢታኒ * ሂንቲንቲና ጋኬታናዋ፤ ኢ ጌሊያ ጎሊያ አ ካሊዴ ጌሊቲ፤ 11 ሄ ጎሊያዋካ፤ ተማሪሲያዌ ኔና፤ «ታኒ፤ ታና ካሊያዋንቲና አቲፔ ፓሲጋ ቁማ ሚያ ኢማላ ከፊሊ ሃቃ ባጋና ዴዒ?» ያጌ፤ ጌቲ። 12 ሄ ቢታኒካ ፖቄያ ቦላን ዴዒያ ሂጃቲ

22:1 ኬስ 12:1-27 * 22:10 ሃላ ቶኬዳ ቢታኒ፡ ሄ ዋዴ ሄ ጋዴን አሳ ጎሊን ከቲቲያ አቲማ ቆማይ ሃላ ቶኮፔ፡ ሄ ጎሊ ዲሬ ጊዲያዋ ቤሴ።

ኡቴዳ አኮ ኪፊሊያ ሂንቴንታ ቤሳናዎ፤ ሄዋሂካ ሳዓ ገሊሲቴ» ያጌዳ።

13 ኡንቴንቱ ቢዳ፥ ዩሱሲ ጎዋዳንካ ቢታኒያ ዳሚዳ ፓሲጋ ቁማ ገሊሴዲኖ። 14 ፓሲጋ ቁማይ ሜቴቲያ ሳቲ ጋኮ ዎዳ፥ ታማኔ ላዑ ከቴቶዎንቴና ኢቲፔ ቁማ ማናው ኡቴዳ። 15 ኢካ፥ «ታና ሜቱ ጋካናፔ ካሲያን ሂንቴንቴና ሃ ፓሲጋ ቁማ ማናው ዳሮ አዎታዳ ዳዓይ። 16 አዪሲ ጎፔ፥ ታ ሂንቴው ኡዲያዌ፥ ሃዌ ያሳ ካወቴላን ፖሌታና ጋካናው፥ ታኒ ላዔሉዋ ሃዋፔ ሚኬ» ያጌዳ።

17 ፀዓ አኪዳ፥ ያሳ ጋላቲዳ፥ «ሃዋ ሄይቴ፥ ሂንቴንቱ ገደዋን ገሺቲ ኡሺቴ። 18 አዪሲ ጎፔ፥ ታ ሂንቴንቶ ያጋይ፥ ያሳ ካወቴላይ ያና ጋካናው፥ ሃፔፔ ደማዳ ዎዪኒያ ኤሳ ኡሺኬ» ያጌዳ።

19 ቃሲ ማጋጌ ኡኪላ አኪዳ፥ ያሳ ጋላቲዳ፤ ሄ ኡኪላ ሚንሊ ኡንቴንቶ አሚዳ፥ «ሃዌ ሂንቴንቶ አሚቴያዌ ታ አሹዋ፤ ሃዋን ታና ቆፓና ማላ ሃዋ ሚቴ» ያጌዳ። 20 ካወዋ ዋዋፔ ጉዪያን፥ ካሲዎዳን ፀዓ ዳንሊ ኡንቴንቶ አሚዳ፥ ሃዋዳን ያጌዳ፥ «ሃ ፀዓይ፥ ታ ሂንቴንቱ ዲራው ጉሲያ ታ ሱላ ቆፔሊያ ኦራላ ጫቁዋ።

21 ሺን ቤዒቲ፥ ታና አሊ አማናው ዳዒያ ቢታኒ ገዪታን ታናና ኢቲፔ ሜ። 22 አያው ጎፔ፥ ታኒ አሳ ናዓይ ያሳይ ጎዋዳን ባይ፤ ሺን ታና አሊዳ አሚያ ኡራው አው አዬ» ያጌዳ። 23 ኡንቴንቱ ገደፔ ሄዋ አላናው ዳዒያዌ ኦና ገዳኔንቶ፥ ባሬንቱ ገደን አሻ ደሚዲኖ።

ኡባፔ አዲያዌ ኦኔ? ያገያ ኦሻ

24 ቃሲ ባሬንቱ ገደፔ ኦኒ አዲንቶ ያጌቲያ ፓሉማይ ኡንቴንቱ ገደን ኬሴዳ። 25 ዩሱሲ ኡንቴንታ ያጌዳ፥ «ሃ አላሚያ ዋዲያዎንቱ ባሬንቱ አሳ ቦላ ጎዳቲኖ፤ ኡንቴንታ ዋዲያዎንቱ ከካቱዋ ጌቲቲኖ። 26 ሺን ሂንቴንቱ ሃዋዳን ሃናፒቴ፤ ዩወዋን ቃሲ ሂንቴንቱፔ ቶቃ ገዴደዌ ሂንቴ ኡባፔ ጉዲያዎ፤ ሂንቴንታ ዋዲያዌካ፥ ሂንቴንቶ ቆማዳን ሃኖ።

27 «ቁማ ማናው ኡቴዳዋፔኔ ቁማ አሳው አሊያዋፔኔ ኦኒ ቦንቹቲ? ቁማ ማናው ኡቴዳዋ ገዴኔ? ታኒ ቃሲ ሂንቴንቱ ገደን ቁማ አሊያ ቆማ ማላ። 28 ቃሲ ታኒ ፓጩቲያ ዎዲያን ሂንቴንቱ ታናና ኢቲፔ ሚኒ ኤቁዳዎንታ። 29-30 አ ካወቴላ አይዲያን ኡታና ማላ ታ አኮ ታና ሱንሶዋዳን፥ ታኒ ቃሲ ታ ካወቴላን ታ ጋይታፔ ማናዲኔ ኡሻናዳን፥ ታማኔ ላዑ ኢሰራዔሊያ ያራቱዋ

22:20 ማኮ 26:26-28፤ ማር 14:22-24፤ 1ቆር 11:23-25 22:26 ማኮ 23:11፤ ማር 9:35

ቦላ ፒርዲዴ፣ ካውቴላ ኦይዲያን ኡታና ማላ ሂንቴንታ ሱንላዲ» ያጌዳ።

ጳጳርሲ ካዳናዋ ዩሱሲ ካሴቲዳ ኦዴዳ
(ማት 26:31-35፤ ማር 14:27-31፤ ዮሀ 13:36-38)

31 ጎዳይ፣ «ሲሞና፣ ሲሞና፣ ታኒ ኦዲያዋ ሲሳ፤ ፃላሂ ሂንቴንታ አሳይ ዛርጋ ሃልዲያዋዳን፣ ሃልዳናው ያሳ ዋሴዳ። 32 ሺን ታኒ ኔ አማኑ ባዬናዳን ኔ ዲራው ጋናታዲ። ኔኒ ታኮ ሲሚያ ዋዴ ኔ አሻቱዋ ሚኒሳ» ያጌዳ። 33 ሲሞኒ ዛሪዴ፣ «ጎዳው፣ ታኒ ኔናና ቃሽታናውኔ ኔናና አቲፔ ሃይቃናው ጊጋ ኡታዲ» ያጌዳ።

34 ዩሱሲ ቃሲ፣ «ጳጳርሳ፣ ታኒ ኔው ያጋይ፤ ሃቼ ቢላሂያን፣ ኩቱ ዋሳናሲ ሄዙ ጌዴ ታና ኔኒ፣ ላኦ ታኒ ኤሪኬ» ጋዴ ካዳናሳ» ያጌዳ። 35 ዩሱሲ ባሬና ካሊያዋንቶ፣ «ኮሮጂ፣ ቃርጨቲኔ ጨማይ ባንታን ታኒ ሂንቴንታ ከቶ ዋዴ፣ ሂንቴንቶ አቲባይ ፓጮዌ ዴዒ?» ያጌዳ።

ኡንቴንቱካ፣ «አቲ ባይኔ ኦሲ ፓጪ ቤና» ያጌዲና።

36 ኢካ ዛሪዴ፣ «ሃዲ ቃሲ ኮሮጂ ዴዲያዌ አኪ ቦ፤ ቃርጨቲ ዴዲያዌካ ሄዋዳን ኡዴ፤ ባይናዌ ቃይ ባሬ ማዩዋ ዛሊዲዴ ማሻ ሻዎ። 37 አያው ጎፔ ታ ሂንቴው ያጋይ፣ ላዋ ማካላንቻቱና አቲፔ ፓይዴቱዳ» ያጌቲ ያሳ ማፃፋን ፃፊቱዳዌ፣ ታናን ፖሌቴናን አቴና። ኤ፣ ታው ጌቱቱዳዌ ሃዲ ፖሌታናዋ» ያጌዳ።

38 አ ካሊያዋንቱ፣ «ጎዳው፣ ሃዋን ላዑ ማሻይ ዴዴ» ያጌና ኢካ፣ «ሄዌ ጊዳናዋ» ያጌዳ።

ዩሱሲ ዴብሬ ዛይቲ ዴሪያን ዋሴዳ
(ማት 26:36-40፤ ማር 14:32-42)

39 ዩሱሲ ካታማፔ ኬሲዴ፣ ሃራ ጋላሲ ቢያዋዳንካ ዴብሬ ዛይቲ ቤዳ። ቃሲ አ ካሊያዋንቱካ አ ጌዴዋ ቤዲና። 40 ሄ ሳዓ ጋኪዴ፣ «ፓጪያን ሂንቴንቱ ጌሌናን አታና ማላ፣ ዋሴቲ» ያጌዳ።

41 ሹቻ ኦሊና ጋኪያሳ ኮና አንቴንቱፔ ሃኪ ቤዳ። ጉልባቲዴ፣

42 «ታ አቦ፣ ኔኒ ኮዩያዋ ጊደፔ፣ ሃ ሜቱዋ ፀዓ ታፔ ዲጋ፤ ሺን ታ ሸኔ ጊደፖ፤ ኔ ሸኔ ጊደፔ አቲን» ያጌዴ ዋሴዳ። 43 ሳሉዋፔ ዪዴ ሚኒሲያ ከታንቻይ አው ቤቱዳ። 44 ባሬ ዋዛና ጊደን ሴሌቲዴ፣ ዳሪ ዋሴዳ። ኢ ጨዋቲያ ጨወካ ሳዓ ቦላን ያኪያ ሱላ ማላቲዳ።

45 ዋሳፔ ዴንዲዴ፣ ባሬና ካሊያዋንቱኮ ጉዬ ቢዴ፣ ኡንቴንቱ ዳርፔ ቃሬቲዳ ዲራው፣ ዳቡሪዴ ጌሚዲሾዋንታ ፃሊዴ፣

46 «እያው ጌሚሲሺቲ? ፓጩያን ጌሌናዳን ዳንዲ ዋሲቲ» ያጌዳ።

ዩሱሲ ባሬ ሞርኬቱዋ ኩሺያን ኦይቄቲዳ (ማጥ 26:47-56፤ ማር 14:43-50፤ ዮሀ 18:3-11)

47 ዩሱሲ ሄዋ ሃሳይ ዳዒሺን፣ ጮራ አሳይ ዩዲኖ። ታማኔ ላዑ አ ካሊያዋንቱ፤ ኢቱዋ ጌዴዳ ዪሁዳ ጌቲቲያዌ ሄ አሳ ካሌሊዴ ዩራናው ዩሱሳኮ ሺቄዳ። 48 ዩሱሲ ቃይ፣ «ዪሁዳው፣ ኔኒ ታና አሳ ናዓ ዩራዴ አላ ኢማይ?» ያጌዳ።

49 አ ዩሹዋን ዳዒያ አ ካሊያዋንቱ ሃኔቲያ ዩወዋ ቤዖ ዎዴ አ፣ «ጎዳው፣ ሃ አሳ ኔኒ ማሻን ቃንፃ?» ያጌዲኖ። 50 ኡንቲንቱ፤ ኢቱ፣ ቄሳቱዋ ኡባቱዋ ካፑዋ ቆማ ሾጩዴ፣ አ ኡሼቻ ሃይላ ቃንፃ ኦሌዳ።

51 ዩሱሲ ቃይ ዛሬዴ፣ «አገቲ፣ ባሺቲ» ያጌዳ። ቢታኒያ ሃይላካ ቦቹዴ ፓሌዳ። 52 ዩሱሲካ ባሬኮ ዩዳ ቄሳቱዋ ካፓቶ፣ ጌሻ ጎሊያ ናጊያዋንቶ፣ ሱንላቱዋሲኔ ጋዲያ ጨማቶ፣ «ፓኑዋ ኦይቄያዋዳን ማሻኔ ፃምዓ ኦይቄዴ ዩቲ? 53 ጌሻ ጎሊያን ታኒ ጋላሳን፣ ጋላሳን ሂንቲንቱና ዳዒያ ዎዴ፣ ታና ኦይቄቤይኪታ፤ ሺን ሃዒ ሃዌ ሂንቲንቱ ዎዴኔ ጴማ ዎልቃ ዎዴ» ያጌዳ።

ጳዕረሲ ዩሱሳ ካዴዳ (ማጥ 26:57-58፣ 69-72፤ ማር 14:53-54፣ 66-72፤ ዮሀ 18:12-18፣ 25-27)

54 ዩሱሳ ኦይቄ ቃቸዴ፣ ቄሳቱዋ ኡባ ካፑዋ ጎሌ አፊዴ ጌሊሴዲኖ። ጳዕረሲካ ኡንቲንቱ፤ ጉዬ ሃኩዋን ኡንቲንቱ ጌዲዋ ካሌ። 55 ዲርሳ ጊደን ታማ ኤሊዴ፣ ኢቲ፤ ኡቲ ዳዒሺን፣ ጳዕረሲ ኡንቲንቱ ጊደን ዩዴ ኡቲ አጌዳ። 56 ታማይ ፖዒያ ባጋና ጳዕረሲ ኡቲዴ ዳዒሺን፣ ኢቲ አሺካራታ ሎይላ ፃላዴ፣ «ሃዌካ አናና ኢቲ፤ ዴዔ» ያጋዳ።

57 ጳዕረሲ ቃይ፣ «ሃኔ ሚሺራቲ፣ ታኒ አ ኤሪኬ» ያገ ካዴዳ። 58 ጉላ ዎዲያ፤ ጉዩያን፣ ሃራ ቢታኒ ጳዕረሳ ቤዒዴ፣ «ኔኒ ኡንቲንቱና ጋላ ዳዳ» ያገና፤

ጳዕረሲ ቃሲ፣ «ሃዎ ቢታኔው፣ ታኒ አናና ጋላ ዳዒኬ» ያጌዳ። 59 ኢቲ ሳቲ ጊዲያዋ ጋሚዒዴ ሃራ ቢታኒ ቆንጨሲዴ፣ «ኢ ጋሊላ ጋዴ አሳ ጊዲያ ዲራው፣ ሃ ቢታኒ አናና ኢቲ፤ ዳዒያዌ ቱማ» ያጌዳ። 60 ጳዕረሲ ቃሲ፣ «ሃ ቢታኔው፣ ኔኒ ጊያዌ አዩንቶ ታኒ ኤሪኬ» ያጌዳ። ሄ ዎዲያን ኢ ቢርካ ሃሳይ ዳዒሺን፣ ኤሌካ ኩቱ ዋሲ አጌዳ። 61 ጎዳይ ጉዬ ሰሚዴ፣ ጳዕረሳ ጻሌዳ። ጳዕረሲ

ጎዳይ ባሪና፡ «ሃቼ ኩቱ ዋሳና ጋካናው፡ ሄዙ ጌዳ ታና ካዳናሳ» ጌዳ ጎዳ ቃላይ አው ቆፊቲ አጌዳ። 62 ጳጳርሲ ዲርሳፕ ካሪ ኬሲዳ፡ ሴሌቲዳ ዩኬዳ።

63 ዩሱሳ ኦይቄዳ አሳይ ቂሊጨኖኔ ሾጨኖ። 64 አ አይፊያ ጎዚ ባቂዳ፡ «ኔና ባቂዳዌ ኦኔ? ናቢያ ጊደፔ ኔና ዳቻዋ ኦኔ ኦዳ» ያጊዳ አ ኦቼዲኖ። 65 ቃሲ አ ሃራ ጮራ ቦሪያ ቦሬዲኖ።

ዩሱሳ ፒርዳው አፊዲኖ

(ማጥ 26:59-66፤ ማር 14:55-64፤ ዮሀ 18:19-24)

66 ሳዓይ ዋንቲና ጋዲያ ጨማ አሳቱ፡ ቄሳቱዋ ካፓቱኔ ሙሴ ሂጊያ ታማሪሲያዋንቱ፡ ዩሱሳ ባሪንቱ ሺቄዳሳ አፊዳ። 67 «ኪሪሰቶሲ ኔኔ? ኦኔ ኦ ደዳ» ያጌዲኖ።

ሺን ኢ፡ «ታኒ ሂንቱንቶ ኦደፔ ታና አማኒኪታ፤ 68 ቃሲ ሂንቱንታ ታኒ ኦቸፔ ኦዲኪታ፤ ዋይ ቃሹዋፔ ታና ቢሊኪታ። 69 ሺን ሃ ሳቲያፔ ደሚን ታኒ አሳ ናዓይ፡ ሃዒፔ ደማዳ፡ ዋልቃማ ያሳ ኡሺቻ ባጋና ኡታና» ያጌዳ።

70 ኡንቱንቱ ኡባይ ዩሱሳ፡ «ያተና ኔኒ ያሳ ናዔ?» ያጌዲኖ። አካ ዛሪዳ፡ «ታኒ ያሳ ናዓ ጊደዋ ሂንቱንቱ ሃሳዩዲታ» ያጌዳ።

71 ኡንቱንቱካ፡ «ኦኒ ኦ ሁጳው አ ደናፔ ሲሴደ፤ ሃዋፔ ሲንላው አይ ማርካ ኮሺ?» ያጌዲኖ።

23

ጲላዖሲ ዩሱሳ ኦቼዳ

(ማጥ 27:1፤ 2፤ 11-14፤ ማር 15:1-5፤ ዮሀ 18:28-38)

1 ሄዋን ሺቄዳ ኡባቱካ ኢቲፔ ዳንዲዳ፡ ዩሱሳ ጲላዖሳኮ አፊዲኖ። 2 ኡንቱንቱካ፡ «ሃቢታኒ ኦ አሳ ባሌላዳ፡ አሳይ ሮሜ ቢታ ካዉዋ ቄሳራው ገራ ኢማና ማላ ዲጊዳ፡ ቃሲ፡ «ታኒ ካቲያ» ያጊሺን ዳሜዶ» ያጊዳ ሞቱዋ ደሜዲኖ።

3 ጲላዖሲካ ዩሱሳ፡ «ሃዎ፡ አዩሁዳቱዋ ካቲ ኔኔ?» ያጊዳ ኦቼዳ።

ዩሱሲ ዛሪዳ አ፡ «ኔኒ ጋ ዳዓሳ» ያጌዳ። 4 ጲላዖሲ ቄሳቱዋ ካፓቱዋሲኔ አሳሲ ኦዲዳ፡ «ታኒ ሃ ቢታኒያ ቦላን አይኔ ኢታ ኦሱዋ ዳማ ቤይኬ» ያጌዳ።

5 ጊደፔ አቲን ኡንቱንቱ፡ «ሃ ቢታኒ ጋለላፔ ደሚዳ፡ ሃራይ አቶ ሃዋ ጋካናዉካ፡ ዩሁዳ ጋዲያ ኡባ ባሪ ቲሚርቲያን ቃሊዳ ዳዔ» ያጊዳ ሚኒሲ ኦዳዲኖ።

ዩሱሲ ሄርዲሳ ሲንላ ሺቄዳ

6 ጲላጾሲካ ሃዋ ሲሲዳ፡ «ኢ ጋለላ ኣሴ?» ያገደ ኤራናው ኦቹዳ። 7 ጲላጾሲ ሄሮዲሴ ሞዲያ ጋዲያ፤ ዩሱሲ ዩዳዋ ኤሬዳ ዎዳ፡ ሄሮዲሴካ ቃይ ሄዎዲያን ዩሩሳሌሜን ዳዒያ ዲራው፡ ኣኮ ዩሱሳ ዩዳዳ።

8 ሄሮዲሴ ዳሮ ዎዲያ፤ ዶሚዳ ዩሱሳ በዓናው ኣሞቲ ዳዒያ ዲራው፡ ኣ በዔዳ ዎዳ ዳሮ፤ ስጌቴዳ። ዩሱሳ ዋሪያ ሲሴዳዎ ዲራው፡ ኢ ኦራላባ ኦሊሺን በዓናው ሂደታን ጋሚዳዳ። 9 ሄሮዲሴ ዩሱሳ ዳሮባ ኦቹዳ፤ ሺን ዩሱሲ ኣው ኣያኔ ዛሪቤና። 10 ቁሳቱዋ ካፓቱኔ ሙሴ ሂጊያ ታማሪሲያዋንቱ ሄዋን ኤቁዳ፡ ዩሱሳ ሎይሊ ሞቲዳ ዳዒና። 11 ሄሮዲሴኔ ኣ ዎታዳራቱ ዩሱሳ ካዲዳ፡ ኣ ቦላ ቂሊጩዲና። ቦንቹቴዳ ማዩዋ ኣ ማዩዚዳ፡ ጲላጾሳኮ ዛሪዳ ዩዳዲና። 12 ሄሮዲሴኔ ጲላጾሲ ሃዋ፤ ካሴና ሞርኪያን ዳዒና፤ ሺን ሄ ጋለሲ ሲጌቴዲና።

ዩሱሳ ሃይቃና ማላ ሞቲዲና (ማት 27:15-26፤ ማር 15:6-15፤ ዮሀ 18:39-19:16)

13 ጲላጾሲ ቁሳቱዋ ካፓቱዋ፡ ኣዩሲያዋንታኔ ሃራ ጮራ ኣሳ ኢቲ፤ ያሲዳ። 14 ሃዋዳን ያጌዳ፡ « ሃ ቢታኒ ኣሳ ማካላቴፋው ዳንሴሴ»፤ ያገደ ታኮ ኣሄዲታ፤ ታካ ሂንቲንቱ ሲንሳን ቢዳ ያላዳ፡ ሂንቲንቱ ሺሹዳ ሞቲዋን ኢቲ ባላኔ ኣ ቦላን ዳማ በይኬ። 15 ቃሲ ሄሮዲሴካ ኣ ቦላን ኣይኔ ዳሚቤና ዲራው፡ ሃ ኦኮ ዛሪ ዩዳዳ፤ ሂንቲንቱ በዒያዎዳንካ፡ ሃቢታኒ ኣ ሃይቆ ጋሊያባ ኣይኔ ኡዲቤና። 16 ሃዋ ዲራው ታኒ ኣ ሙራዳ ቢላና» ያጌዳ። 17 *

18 ኣሳይ ኡባይ ኢቲ፤ ገዲዳ፡ «ሃ ቢታኒያ ያ ዲጋ! ባርባና ጊያ ዩሱሳ ኦሲ ቢላ!» ያገደ ጫቦቴዲና። 19 ባርባን ካታማን ዋላሳ ዳንሴዳ፡ ኣሳ ዎዴዳ ዲራው፡ ቃሹቴዳዎ።

20 ጲላጾሲ ዩሱሳ ቢላናው ኮዩዳ፡ ኣሳው ላዔሉዋ ጉጂዳ ሃሳዩዳ። 21 ሺን ኡንቲንቱ፡ «ማሰቃሊያ ቦላ ሚሲማሪያን ዲሻዳ ካቃ! ካቃ!» ያገ ዋሴዲና።

22 ጲላጾሲካ ሄዘንሉዋ ኡንቲንታ፡ «ኣያው? ሃቢታኒ ኦሴዳ ኢታ ኦሱ ኣዩ? ታኒ ኣ ሃይቆ ጋሊያ ናቁዋ ኣይኔ ኣ፤ ዳማበይኬ፤ ሃዋ ዲራው፡ ኣ ሙራዳ ቢላ ዩዳና» ያጌዳ።

23 ሺን ኡንቲንቱ ባሪንቱ ኮሻ ቶቁ ኦሴዳ፡ ካቁታናዳን ዳሪ ዋሴዲና። ኡንቲንቱ ዋሱካ ጲላጾሳ ቆፋ ላሜዳ። 24 ሃዋ ዲራው፡

* 23:17 ሃ ፓይዳ፡ «ጲላጾሳው ፓሲጋ ባላ ቦንቹዋ ጋላሳን ኢቲ ኡራ ቃሹዋ፤ ቢሊያ ዳያይ ዳዒ» ያጌ። ሺን፡ ዳውሮሉዋ ጌሻ ማፃፋ ኦራላ ጫቁዋ ገዲዋን ሃ ፓይዳ ዓፊቲ በና ጋሱ፡ ሃራ ጌሻ ማፃፋቱዋ ቢሊላቱዋን ኡባቱዋንካ ዓፊቲ በና ዲራሳ።

ጲላዎሲካ ኡንቱንቱ ኦሻይ ሲማናዳን ዩሱሳ ቦላን ፒርዴዳ።
25 አሳ ማካላው ዴንጤዲዬ ኸምጥዋ ዋዲዳ። ቃሼቲዳ ቢታኒያ ቢሌታናዳን ኡንቱንቱ ዋሶ ዲራው። ሄ ቢታኒያ ቢሌዳ። ሺን ዩሱሳ ባሬንቱ ሺኒያዳን ኮዮዋ ኦላና ማላ። አላ ኢሜዳ።

ዩሱሲ ማስቃሊያን ካቄቲዳ

(ማጥ 27:31-44፤ ማር 15:21-32፤ ዮሀ 19:17-27)

26 ዩሱሳ ኦይቂ አፊዴ ዴዲሺን፣ ሲሞና ጌቲቲያ ቄርና ቢታኒ ሄራፔ ዩዴ ዴዲሺን ዴሚዴ። ማስቃሊያ ቶሲዴ ዩሱሳና ባና ማላ ኡዴዲዳ። 27 ዳር ጮራ አሳይኔ ዩኪያ ማጫዋንቱ ጉዩና ካሊዳ። 28 ዩሱሲ ጉዩ ሲሚዴ ኡንቱንቱ፣ «ሂንቲና፣ ዩሩሳሌም ማጫዋንቱ፣ ሂንቲንቱ ሁጳውኔ ሂንቲንቱ ናናው ዩኪቲፔ አቲን፣ ታው ዩኮፒቲ፤ 29 «ማንላ ጊዴዳዋንቱኔ ዩሊቤና ኡሉ፣ ቋንሊቤና ቋንላይ፣ አንጃቲዳዋንታ» ጌቲቲያ ዋዲ ያናዋ። 30 ሄ ዋዲያን፣ «ዘዛቶ፣ ኑ ቦላ ዋዲቲ፤ ዙኩላቲዋካ፣ ኑና ቆሲቲ» ያጋኒታ። 31 ሲሚ ቃዬ ሚላን ሃዋዳን ሃናፔ፣ ሜላ ሚላን ዋናናዌ?» ያጌዲ።

32 ዩሱሳና ኢቲፔ ካቄታና ማላ፣ ኢታ ኦሱዋ ኦሌዳ ሃራ ለዑ አሳቲዋካ አፊዲዳ። 33 ቄራኔው ጌቲቲያሳ ጋኬዳ ዋዲያን፣ ዩሱሳ ካቄዲዳ። ኢታ ኦሳዋንታካ፣ ኢቲዋ ኡሺቻና፣ ዮኩዋ ሃዲርሳና ካቄዲዳ።

34 ዩሱሲ፣ «ታ አቦ፣ ኡንቱንቱ ባሬንቱ ኦሊያዋ ኤሬና ዲራው፣ ኡንቱንቱ ናጋራ አቶ ጋ» ያጌዲ።

ኡንቱንቱካ አ ማዩዋ ሳማ ዩጌቲዴ ጊሼቲ አኬዲዳ። 35 አሳይ ኤቂ ዩሊሺን፣ ጋዲያ ሞዲያዋንቱ፣ «ሃራንታ አሼ፤ ያሳን ዶሬቲዳ ኪሪሰቶሲ አ ጊዶፔ፣ አኔ ባሬ ሁጲያ አሼኔ?» ያጌዴ ቂሊጩዲዳ።

36 ቃሲ ዋታዳራቲካ ሸቂዴ ቂሊጩዲዳ፤ ጫሜዳ ዋዲያ ኤሳ አው አሂ ኢሚዴ። 37 «ሃዋ፣ ኔኒ አዩሁዳ ካቲያ ጊዶፔ፣ ኔ ሁጲያ አሻ!» ያጌዲዳ።

38 ሁጲሳናካ፣ «ሃዌ አዩሁዳ ካቲያ» ያጌያ ዓፋዋ ዓፊዲዳ። 39 ኢታ ኦሊዴ ካቄቲዳዋንቲፔ ኢቲ፣ ቦሪዲኔ ቶቲዴ፣ «ሃዋ ኔኒ ኪሪሰቶሳ ጊዲኪ? አኔ አ ጊዶፔ፣ ኔ ሁጲያኔ ኑና አሻ» ያጌዲ።

40 ዮኩ ቃይ አ፣ «ኔኒ ሃዋ ማላቲያ ፒርዳ ቦላ ዴዳዴካ ያሳው ያዩኪ? 41 ኔኒ ኪቲቲዳ ባላን ሙራ አኪዴ ዴዴቶ፤ ኑሲ ቤሲያ ሙራ ቦላን ዴዴቶ፤ ሺን ሃ ቢታኒ ኢቲ ኢታባኔ ኦሊቤና» ያጌ ዛሬዲ።

42 ኢ. ዩሱሳ፡ «ኔኒ ኔ ካዉቲላ ዋልቃን ዪያ ዋዴ፡ ታና ቆፓ» ያጌዳ። 43 ዩሱሱካ፡ «ታኒ ኔው ቱሙዋ ኦዳይ፡ ሃቹ ታናና ኢቲፔ ጋናቲያን ዴዓናሳ» ያጌዳ።

ዩሱሳ ሃይቁዋ

(ማጥ 27:45-56፤ ማር 15:33-41፤ ዮሀ 19:28-30)

44 ሄ ዋዴ ኡሱፑን ሳቲ ጊዲያ ኬና፤ ሄዋፔ ኡዲፑ ሳቲያ ጋካናው፡ ቢታ ኡባ ቦላን ቋማ ጊዴዳ። 45 አዋይካ ባሬ ፖዑዋ ዲጌዳ፤ ጌሻ ጎሊያ ጋሪዲካ ፔዴቲዴ ላዑዋ ኬሴዳ። 46 ዩሱሱካ ዳር ቋጭ ጌዳ ቃላን ዋሲዳ፡ «ታ አቦ፡ ታኒ ታ ሸምፑዋ ኔ ኩሺያን አላ አማይ!» ያጌ ሲሞዋፔ ጉዪያን ኢ ሃይቁዳ።

47 ዪቱዋ ካፑ ሃኔዳ ዩዉዋ ቤዔዳ ዋዴ፡ «ሃ ቢታኒ ቱማካ ዪሎ አሳ» ያጌዴ ያሳ ጋላቲዳ። 48 ሃዋ ቤዓናው ኢቲሳ ሸቁዳ አሳይ ኡባይ ሃኔዳ ዩዉዋ ቤዔዳ፡ ባሬንቱ ቲራ ባቂዴ ሲሜዲኖ። 49 ዩሱሳ ኤሪያ አሳይ ኡባይኔ ጋለላፔ ደሚዴ አ ካሌዳ ማጫዋንቱ ሃዋ ያለዴ፡ ሃኩዋን ኤቁዲኖ።

ዩሱሱ ሞጌቲዳ

(ማጥ 27:57-61፤ ማር 15:42-47፤ ዮሀ 19:38-42)

50 አዪሁዳ ሻንጋቱዋ ጊዴዳዋንቱፔ ኢቱ፡ ዮሴፋ ጌቲቲያ ሎዓኔ ዪሎ ቢታኒ ዴዔ። 51 ሃ ቢታኒ ሻንጋቱዋ ማቁዋኔ አንቱንቱ ኦሱዋን ኢቲፔቲላ ኦሲቤና። ያሳ ካዉቲላ ዩሳ ሂደታን ናጊዴ ዴዔ። 52 ዮሴፎካ ጳላያሳኮ ቢዴ፡ ዩሱሳ አጎ አካናው ዋሲዳ። 53 አካናዳን ጌቲቶዋፔ ጉዬ፡ አጎ ቦላፔ ዋሊዳ፡ ሎያ ሞጉዋ ማዩዋን ያዪዴ፡ ሹቻፔ ዋጩቲዴ ሜዴቲዳ፡ ኦኒኔ ካሴ ሞጌቲ ቤና ኦላ ጊደን ዋሌዳ። 54 ጋላሳይካ ሳምባታ ሞካናው ጊጊያ ጋላሳ፤ ሳምባታይካ ጌላና ሃኔ።

55 ጋለላፔ ደሚዴ ዩሱሳና ኢቲፔ ዩዳ ማጫዋንቱ ካሊዴ፡ ዱፋዋን አ አጎ ዋቲዴ ዋሌዲኖንቶ ቤዔዲኖ። 56 ኡንቱንቱ ሃዋፔ ሶይ ሲሚዴ፡ ሸቱዋኔ ኦኪያዋ አጎው ጊጊሴዲኖ።

ሂጊያ ማራዳን ሳምባታ ጋላሲ ሸምፔዲኖ።

24

ዩሱሱ ሃይቁዋፔ ዴንዴዳ

(ማጥ 28:1-10፤ ማር 16:1-8፤ ዮሀ 20:1-10)

1 ሳሚንታፔ ኮይሮ ጋላሳ፡ ማጫዋንቱ ጊጊሴዳ ሸቱዋ ኦይቂዴ ዳሪ ጉሪዴ ዱፋዋኮ ቤዲኖ። 2 ሹቻይካ ዱፋዋ ደናፔ ጎንደሪቲና ቤዔዲኖ። 3 ኡንቱንቱ ዱፋዋ ጋርሳ ኦላ ጌሎ ዋዴ፡ ጎዳ ዩሱሳ

አኃ ዳሚቤይኪኖ። 4 ማጫዋንቱ ሲጰዳ ዳዒሺን፣ ዋጪዋጪያ ማደዋ ማደዳ ላዑ አሳቱ፣ ቆፔናን ኡንቱንቱ ሚዲያን ኤቆዲኖ።

5 ማጫዋንቱካ ያሻፔ ዳንደዋን ሳዓ ያሊዳ ዳዒሺን፣ ላዑ አሳቱ፣ «ዳዑዋን ዳዒያዋ፣ ኣ ኣያው ሃይቆዋንቱ ጊደፔ ኮዩቱ? 6-7 ኢ ዳንዳዳ፤ ሃዋን ባዋ። ቃይካ ጋለላን ዳዒያ ዋዲያን፣ ለሳ ናዓይ ናጋራንቻቱዋ ኩሺያን ኣጰ ኢሜታናዋ፤ ማሰቃሊያ ቦላን ካቆታናዋ፣ ሄዜንሉ ጋላሲ ሃይቆዋፔ ዳንዳናዋ) ያንቶዋ ቆፒቱ» ያጌዲኖ።

8 ማጫዋንቱካ ሄ ዋዳ ቃላ ኣኬኬዲኖ። 9 ኡንቱንቱካ ዲፋዋፔ ስሚዳ ሃ ኡባ ዩዉዋ ታማኔ ኢቲ ከቲቶዋንቶኔ ኡንቱንታ ካሊያዋንቶ ኡባቶ ኦዳዲኖ። 10 ሃዋ ዩሱሲ ከቶዋንቶ ኦዳዳዋንቱ፣ ማግዳላፔ ዩዳ ማይራዋ፣ ዮሃና፣ ያዩቆባ ዳዮ ማይራዋኔ ኡንቱንቱና ኢቲፔ ዳዒያ ሃራ ማጫዋንታ። 11 ኡንቱንቶ ማጫዋንቱ ኦዲያ ቃላይ ቃጂያዋ ማላቲና ኣማኒቤይኪኖ።

12 ሺን ሄ ዋዳ ጳዒሮሲ ዳንዲዳ ዲፋዋኮ ዋዳዳ። ያ ጋኪዳ ሆኪ ያሊያ ዋዳ፣ ጋርሳን ሞጉዋ ማዮ ፃላላይ ዳዒያዋ ቤዔዳ። ሃኖ ዩዉዋንካ ማላሌቲዳ፣ ጎሌ ሲሜዳ።

ኤማሁሳ ኦጊያን ዩሱሲ ላዑ አሳቱዋሲ ቆንጩዳ (ማር 16:12፣ 13)

13 ሄ ጋላሲ ዩሱሳ ካሊያዋንቱፔ ላዑ አሳቱ ዩሩሳላሜፔ ላዑ ሳቲያ ሃኪያ ኤማሁሳ ጌቲቲያ ሄራ ቢዳ፤ 14 ኢቱ ኢቲዋና ሃኔዳ ዩዉዋ ኡባ ሃሳይ ዳዒኖ። 15 ኡንቱንቱ ሃሳዩዲኔ ዘሬቲዳ ዳዒሺን፣ ዩሱሲ ባሬ ሁጳው ዩዳ ኡንቱንቱ ሚዲያ ሸቂዳ ኡንቱንቱና ቢዳ ዳዒ። 16 ሺን ኡንቱንቱ ባሬ ኣይፊያን ያሊዳ ኣ ጊዲያዋ ሻኪ ኤራናው ዳንዳይቤይኪኖ።

17 ዩሱሲ፣ « ሂንቱንቱ ኦጊያ ቦላን ኢቱ ኢቲዋና ሃሳዩያዋ ኣዩ?» ያጊ ኦቼዳ። ኡንቱንቱካ ዳጋማን ሌቼሚዳ ኤቆዲኖ። 18 ኡንቱንቱፔ ኢቱ ቁሊዮጳ ጌቲቲያዋ፣ «ሃ ጊዲያዋን ዩሩሳላሜን ሃኖ ዩዉዋ ኤራናዋ ኔ ፃላላይ ሃጋዳው ኣማሉ?» ያጊ ዛሬዳ።

19 ዩሱሲ፣ «ኢ ኣዩ?» ያጊና፣ ኡንቱንቱካ፣ «ዶሳ ሰንጻኒኔ ኣሳ ኡባ ሲንጻን ቃላኒኔ ከታን ሚኖ ናቢያ ጊዳዳ ናዚሬቲያ ዩሱሳባ ሃሳዩቶ። 20 ኣካ ቁሳቲዋ ካፓቱኔ ኩና ሞዲያዋንቱ ሃይቆዋ ፒርዳው ኣሊ ኢሜዲኖ፤ ማሰቃሊያ ቦላን ዋዳዲኖ። 21 ኩኒ ካሴና፣ ለሲሰራዔሊያ ኣሳ ዋዛናዋ) ያጊ ሂደቶዋ ኣ፤ ሺን ሃ ዩዉ ሃኔቲዳ ኣጶዴፔ ሄዙ ቃማ ጊዳዳ። 22 ኑ ጊደፔ ኢቲ ኢቲ ማጫዋንቱ ኩና ማላሊሴዲኖ። ኡንቱንቱ ጉራን ሂኒ ዲፋዋ ቤዲኖ፣ 23 ሺን ዩሱሳ ኣኃ ኡንቱንቱ ጳዮ ዋዳ ሺሬቲ ሲሚዳ፣ «ኢ ዳንዳዳ፤ ያጊያዋ ከታንቻቱ ኦዲሺን ቤዔዳ» ያጊ ኦዳዲኖ።

24 ኑ ገደፔካ ኢቲ ኢቲ አሳይ ዲፋዎ ቢዳ ኡንቲንቲ ጎዋዲን ሃኒና ቤዔዲኖ፤ ሺን ዩሱሳ አጎ ዳሚቤይኪና» ያጌዲና።

25 ዩሱሲ ኡንቲንቲ፡ «ሂንቲኖ፡ አኬኬና አሳቶ፡ ሂንቲንቲ ዋዛናን ናባቲ ኦዶዋ ኡባ ኤሌ አማኔናዋንቶ፤ 26 ኪሪሰቶሲ ሃ ማቲዋ አካናወኔ ባሬ ቦንቹዋኮ ጌላናው ቤሴኔ?» ያጌዲ።

27 ሄዋፔ ሲሚዳ ዩሱሲ ሙሴ ማፃፋቱዋፔኔ ናባቲ ፃፊዳ ማፃፋቱዋፔ ዶሚዳ፡ ያሳ ማፃፋቱዋ ኡባን ፃፊቲዳ ባሬባ ኡንቲንቲ ቢሊዳ ኦዶዲ።

28 ኡንቲንቲ ቢዳዲያ ሄራ ማቲዳ ዋዳ፡ ዩሱሲ ሃራሳ ቢያዎ ማላቲዳ። 29 ሄ ዋዳ ኡንቲንቲ አ፡ «ጋላሳይ ቃሚዳ ዳዲያ ዲራው፡ አማርሳይ ማቲዳ፤ ኑናና ኢቲፔ አቃ!» ያጌ ሚኒሲ ዋሴዲኖ። ሃዎ ዲራው፡ ኢካ ኡንቲንቲና ኢቲፔ አቃናው ጌሌዲ።

30 ኡንቲንቲ ኢቲፔ ጋዩታን ኡቲዳ ዋዳ፡ ዳቡዋ ዳንሴዳ አንጃዳ፤ ማንሴዳ ኡንቲንቲ አሜዳ። 31 ኡንቲንቲ አይፊካ አ አኬካና ማላ ዶዬቲና፡ ዩሱሳ ገዲያዎ ኤሬዲና። ኢካ ኡንቲንቲ ሲንላፔ ጌሜዳ። 32 ኡንቲንቲካ ኢቲ ኢቲዋ፡ «ቃቆን ኢቲፔ ኑ ዳዲሺን፡ ኑና ኢ ሃሳዩሲያ ዋዲያኒኔ ያሳ ማፃፋቱዋካ ኑሲ ቆንጨሲዳ ኢ ኦዲያ ዋዲያን፡ ኑ ዋዛና ገደን ታማዲን ሴሌ ገዴኔ?» ጌቲቲዲኖ።

33-34 ሄ ዋዲያንካ ዳንዲዳ ዩራሳላሚ ሲሜዲና። ዩሱሲ ከቶ ታማኔ ኢታቶኔ ኡንቲንቲና ኢቲፔ ዳዲያዋንቶ፡ «ሳዳይ ቱሙዋካ ዳንዳዳ፡ ሲሞናወካ ቤቲዳ» ያጌዳ ሄዋን ኢቲፔ ሺቂ ኡቲዳዋንታ ዳሚዲኖ።

35 ሄ ላዳቲ፡ ቃቆን ሃኔዳዋኔ ዩሱሲ ዳቡዋ ማንሴያ ዋዳ ዋቲ አ ኤሬዲኖንቶ ኡንቲንቲ ኦዶዲኖ።

ዩሱሲ ባሬና ካሊያዋንቶ ቤቲዳ
(ማጥ 28:16-20፤ ማር 16:14-18፤ ዮሀ 20:19-23፤ ከት 1:6-8)

36 ሃዎ ኡንቲንቲ ሃሳይ ዳዲሺን፡ ዩሱሲ ኡንቲንቲ ገደን ኤቂዳ፡ «ሳሮቲላይ ሂንቲው ገደ» ያጌዲ። 37 ኡንቲንቲ ሞይቲሊያ ቤዎዎ ማላቲና ዳጋሚዳ፡ ያሻን ኩሜዲኖ። 38 ኢካ ኡንቲንታ፡ «አያው ዳጋሚቲ? አያ ዲራው ሂንቲንቲ ዋዛናይ ሲቂ? 39 ታኒ ዩሱሳ ገዲያዎ ኤራናው፡ አኔ ታ ኩሺያኔ ታ ጌዲያ ቤዳቲ፤ ታናን ሂንቲንቲ ቤዳያዋዲን፡ ሞይቲሊው አሹኔ ማቂላይ ባዎ። አኔ ታና ሂንቲንቲ ኩሺያን ኦይቂ ቤዳቲ» ያጌዳ።

40 ሃዎ ያጌ ሲሚዳ፡ ባሬ ኩሺያኔ ባሬ ጌዲያ ቤሴዳ።

41 ኡንቲንቲካ ናሺቻፔ ዳንዶዋን፡ አማኔናን ማላሊቲ ዳዲሺን ኢ፡ «ሃዋን ማቲቲያዌ ሂንቲንቲ ዳዲ?» ያጌ ኡንቲንታ ኦቼዳ።

42 ኡንቱንቱካ፡ ዓፄቴዳ ሞሊያፕ ላፋ ፑሩዋ አው ኢሜዲኖ።

43 ኢካ አኪዳ ኡንቱንቱ ሲንሳን ሜዳ።

44 ኢካ፡ «ታኒ ሂንቱንቱና ኢቲፔ ደዓዳ፡ «ሙሴ ማፃፋን፡ ናባቱዋ ማፃፋኒኔ ቃላን ፃፊቶ ማዚሙራቱን ታ ዲራው ፃፊቴዳ ኡባይ ፖሌታናው ቤሴ» ያጋዴ ሂንቱንቶ ኦዳዳ ዬዉ ሃዋ» ያጌዳ።

45 ሄ ዋዲያንካ ያሳ ማፃፋቱዋን ጌቱቶዋ አኩካና ማላ፡ ኡንቱንቱ ዋዛና ዶዬዳ። 46 ኡንቱንቶ፡ « ሳህሪሰቶሳ ሜቱ ጋካናዋ፤ ሄዜንሴያ ጋላሲ ሃይቁዋፔ ዴንዳናዋ። 47 ኢ አሱንሳን ናጋራ ፓፃላይኔ ማርታ ዴሙሳይ ዬሩሳላሜፔ ደሚዴ አሳው ኡባው ኦዳታናዋ» ያጌቲዴ ፃፊቴዳ።

48 «ሂንቱንቱካ ሃዋ ማርካቱዋ። 49 ታ ሂንቱንቶ፡ ታ አቡ ቃላ ጌሌዳ ሂደታ ዬዳና፤ ሄዌ ጋካናዉኔ ሂንቱንቶ ዋልቃይ ሳሉዋፔ ኢሜታና ጋካናው፡ ዬሩሳላሜ ካታማን ናጊሺቲ» ያጌዳ።

ዬሱሲ ሳሉዋ ሲሚዴ ቤዳ
(ማር 16:19፣ 20፤ ኪት 1:9-11)

50 ሃዋፔ ጉዪያን፡ ቢታኒያ ጌቲቲያ ካታማ ጋካናው፡ ኡንቱንታ አፌዳ፤ ባሬ ኩሺያ ሚጪዴ ኡንቱንታ አንጄዳ። 51 ኡንቱንቱፔ ሻኩቲዳ፡ ሳሉዋ ቤዳ። 52 ኡንቱንቱ አው ሳዪኒዳ፡ ዳር ናሺቻን ዬሩሳላሜ ሲሜዲኖ። 53 ቃሲ ፓጩናን ያሳ ጋላቲዳ፡ ጌሻ ሳሊያን ዴዔዲኖ።

Ooratha Caaquwaa
New Testament in Dawro (ET:dwr:Dawro)

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dawro

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 21 Feb 2024 from source
files dated 29 Jan 2022
585b63ca-b8e6-55c8-bfef-10bdc95ad69c